


# ইসলাম ও নৈতিক শিক্ষা

## চতুর্থ শ্রেণি



জাতীয় শিক্ষাক্রম ও পাঠ্যপুস্তক বোর্ড, বাংলাদেশ

জাতীয় শিক্ষাক্রম ও পাঠ্যপুস্তক বোর্ড কর্তৃক ২০১৩ শিক্ষাবর্ষ থেকে  
চতুর্থ শ্রেণির পাঠ্যপুস্তকরূপে নির্ধারিত

# ইসলাম ও নৈতিক শিক্ষা

চতুর্থ শ্রেণি

রচনা ও সম্পাদনা


অধ্যাপক মুহাম্মদ তমীযুদ্দীন

অধ্যাপক এ. বি. এম. আবদুল মান্নান মিয়া

মুহাম্মাদ কুরবান আলী

শিল্প সম্পাদনা

হাশেম খান



জাতীয় শিক্ষাক্রম ও পাঠ্যপুস্তক বোর্ড, বাংলাদেশ

# জাতীয় শিক্ষাক্রম ও পাঠ্যপুস্তক বোর্ড

৬৯-৭০, মতিঝিল বাণিজ্যিক এলাকা, ঢাকা - ১০০০

কর্তৃক প্রকাশিত

[প্রকাশক কর্তৃক সর্বস্বত্ত্ব সংরক্ষিত]

পরীক্ষামূলক সংস্করণ

প্রথম প্রকাশ : আগস্ট, ২০১২

পুনর্মুদ্রণ : , ২০২২

চিত্রাঙ্কন

মোঃ আরিফুল ইসলাম

গ্রাফিক্স

ফারহানা আক্তার দোলন

ডিজাইন

জাতীয় শিক্ষাক্রম ও পাঠ্যপুস্তক বোর্ড, বাংলাদেশ

প্রাথমিক ও গণশিক্ষা মন্ত্রণালয়ের অধীন চতুর্থ প্রাথমিক শিক্ষা উন্নয়ন কর্মসূচির আওতায়  
গণপ্রজাতন্ত্রী বাংলাদেশ সরকার কর্তৃক বিনামূল্যে বিতরণের জন্য

মুদ্রণে:

## প্রসঙ্গ-কথা

শিশু এক অপার বিস্ময়। তার সেই বিস্ময়ের জগৎ নিয়ে ভাবনার অন্ত নেই। শিক্ষাবিদ, দার্শনিক, শিশু বিশেষজ্ঞ, মনোবিজ্ঞানীসহ অসংখ্য বিজ্ঞান শিশুকে নিয়ে ভেবেছেন, ভাবছেন। তাঁদের সেই ভাবনার আলোকে জাতীয় শিক্ষানীতি ২০১০-এ নির্ধারিত হয় শিশু-শিক্ষার মৌল আদর্শ। শিশুর অপার বিস্ময়বোধ, অসীম কৌতূহল, অফুরন্ত আনন্দ ও উদ্যমের মতো মানবিক বৃত্তির সুষ্ঠু বিকাশ সাধনের সেই মৌল পটভূমিতে পরিমার্জিত হয় প্রাথমিক শিক্ষাক্রম। ২০১১ সালে পরিমার্জিত শিক্ষাক্রমে প্রাথমিক শিক্ষার লক্ষ্য ও উদ্দেশ্য পুনঃনির্ধারিত হয় শিশুর সার্বিক বিকাশের অন্তর্নিহিত তাৎপর্যকে সামনে রেখে।

শিশুর দৈহিক মানসিক, সামাজিক, আধ্যাত্মিক ও মানবিক বিষয়ে সার্বিক বিকাশ ও উন্নয়ন সাধনই হচ্ছে প্রাথমিক শিক্ষার মূল লক্ষ্য। এ লক্ষ্যে পৌঁছানোর জন্য প্রাথমিক শিক্ষার মাধ্যমে যে সাধারণ উদ্দেশ্যগুলো অর্জন করতে হবে তার মধ্যে অন্যতম হলো শিক্ষার্থীর মনে সর্বশক্তিমান আল্লাহ্‌ তায়ালার প্রতি অটল আস্থা ও বিশ্বাস, শিক্ষার্থীর আধ্যাত্মিক, সামাজিক ও নৈতিক মূল্যবোধ এবং সব ধর্মের মানুষের সাথে শান্তিপূর্ণভাবে বসবাস করতে সক্ষম করে গড়ে তোলা। এ বিষয়গুলোর প্রতি দৃষ্টি রেখে প্রাথমিক শিক্ষাস্তরে **ইসলাম ও নৈতিক শিক্ষা** বিষয়ের শিখনফল, বিষয়বস্তু ও পরিকল্পিত কাজ চিহ্নিত করে পাঠ্যপুস্তকটি প্রণয়ন করা হয়।

কোমলমতি শিক্ষার্থীদের আগ্রহী, কৌতূহলী ও মনোযোগী করার জন্য মাননীয় প্রধানমন্ত্রী শেখ হাসিনার নির্দেশে ২০০৯ সাল থেকে পাঠ্যপুস্তকগুলো চার রঙে উন্নীত করে আকর্ষণীয়, টেকসই ও বিনামূল্যে বিতরণ করার মহৎ উদ্যোগ গ্রহণ করা হয়। সরকার সারাদেশে সকল শিক্ষার্থীর নিকট প্রাক-প্রাথমিক, প্রাথমিক স্তর থেকে শুরু করে ইবতেদায়ী, দাখিল, দাখিল ভোকেশনাল, এসএসসি ভোকেশনালসহ মাধ্যমিক স্তর পর্যন্ত পাঠ্যপুস্তক বিতরণ কার্যক্রম শুরু করে, যা একটি ব্যতিক্রমী প্রয়াস।

পাঠ্যপুস্তকটি রচনা, সম্পাদনা, যৌক্তিক মূল্যায়ন এবং মুদ্রণ ও প্রকাশনার বিভিন্ন পর্যায়ে যারা সহায়তা করেছেন তাঁদের জানাই আন্তরিক কৃতজ্ঞতা ও ধন্যবাদ। সংশ্লিষ্ট ব্যক্তিবর্গের সযত্ন প্রয়াস ও সতর্কতা থাকা সত্ত্বেও পাঠ্যপুস্তকটিতে কিছু ত্রুটি-বিচ্যুতি থেকে যেতে পারে। সেক্ষেত্রে পাঠ্যপুস্তকটির অধিকতর উন্নয়ন ও সমৃদ্ধি সাধনের জন্য যেকোনো গঠনমূলক ও যুক্তিসংগত পরামর্শ গুরুত্বের সঙ্গে বিবেচিত হবে। যেসব কোমলমতি শিক্ষার্থীর জন্য পাঠ্যপুস্তকটি রচিত হয়েছে তারা উপকৃত হবে বলে আশা করছি।

প্রফেসর মোঃ ফরহাদুল ইসলাম

চেয়ারম্যান

জাতীয় শিক্ষাক্রম ও পাঠ্যপুস্তক বোর্ড, বাংলাদেশ

# সূচিপত্র

## প্রথম অধ্যায়

### ইমান ও আকাইদ

মহান আল্লাহর পরিচয়	০১
আল্লাহ মালিক	০৩
আল্লাহ সর্বশক্তিমান	০৫
আল্লাহ শান্তিদাতা	০৭
কালিমা শাহাদত	০৯
ইমান মুজমাল	১০
ইমান মুফাসসাল	১১

## পৃষ্ঠা ০১-২০

## চতুর্থ অধ্যায়

### কুরআন মজিদ শিক্ষা

আরবি বর্ণমালা	৫৬
হরকত	৫৮
তানবীন	৫৯
জযম	৬১
তাশদীদ	৬২
মাদ্দ	৬৩
তাজবীদ, মাখরাজ, ইদগাম	৬৫
ইযহার	৬৬
সূরা আন নসর	৬৮
সূরা আল লাহাব	৬৮
সূরা ইখলাস	৬৯

## পৃষ্ঠা ৫৫-৭১

## দ্বিতীয় অধ্যায়

### ইবাদত

তাহারাত	২২
গোসল, আযান	২৪
ইকামত	২৭
সালাত	৩০
জুমুআর সালাত	৩৪
ঈদের সালাত	৩৫

## ২১-৩৯

## পঞ্চম অধ্যায়

### নবি-রাসুলগণের পরিচয় ও জীবনাদর্শ

৭২-৯৩	৭২-৯৩
মহানবি হযরত মুহাম্মদ (স)-এর জীবনাদর্শ	৭২
হযরত মূসা (আ)	৭৯
হযরত হূদ (আ)	৮২
হযরত সালিহ (আ)	৮৩
হযরত ইসহাক (আ)	৮৩
হযরত লূত (আ)	৮৪
হযরত শূয়াইব (আ)	৮৬
হযরত ইলিয়াস (আ)	৮৭
হযরত যুলকিফল (আ)	৮৮
হযরত যাকারিয়া (আ)	৮৮
হামদ	৯৪
নাত	৯৫

## তৃতীয় অধ্যায়

### আখলাক

আব্বা-আম্মাকে সম্মান করা	৪১
শিক্ষককে সম্মান করা	৪২
বড়দের সম্মান ও ছোটদের স্নেহ করা	৪৩
প্রতিবেশীর সাথে ভালো ব্যবহার	৪৪
রোগীর সেবা করা	৪৫
সত্য কথা বলা	৪৬
ওয়াদা পালন করা	৪৭
লোভ না করা	৪৮
অপচয় না করা	৪৯
পরনিন্দা না করা	৫০

## ৪০-৫৪

بِسْمِ اللَّهِ الرَّحْمَنِ الرَّحِيمِ  
প্রথম অধ্যায়

## ইমান ও আকাইদ – الْإِيمَانُ وَالْعَقَائِدُ

আমরা মুসলিম। আমাদের ধর্মের নাম ইসলাম। ইসলামের মূল কথাই হলো ইমান। ইমান অর্থ বিশ্বাস। ইসলামের মূল বিষয়গুলোকে মনেপ্রাণে বিশ্বাস করাকে ইমান বলে।

ইসলামের মূল বিষয়গুলোকে অন্তরে বিশ্বাস করা, মুখে স্বীকার করা এবং সেই অনুসারে আমল করাই হলো প্রকৃত ইমান। যার ইমান আছে তাকে বলে মুমিন।

আকাইদ হলো আকিদা শব্দের বহুবচন। আকিদা অর্থ বিশ্বাস। আর আকাইদ মানে বিশ্বাসমালা। একজন মুসলিমের ইমান ও আকাইদ বিশুদ্ধ হওয়া প্রয়োজন।

### মহান আল্লাহর পরিচয় ( مَعْرِفَةُ اللَّهِ )

আমরা মানুষ। আমরা নিজে নিজে সৃষ্টি হইনি। আমাদের সৃষ্টি করেছেন মহান আল্লাহ। আমরা যে পৃথিবীতে বাস করছি তাও নিজে নিজে সৃষ্টি হয়নি। এ সুন্দর পৃথিবীও সৃষ্টি করেছেন আল্লাহ তায়ালা। আমাদের জন্য যা যা প্রয়োজন সেসবও তিনিই সৃষ্টি করেছেন।




পৃথিবী

কতো বিশাল এই পৃথিবী। এতে আছে পাহাড়-পর্বত, নদী-নালা, খাল-বিল ও গাছপালা। আছে নানা-রকম ফলফলাদি ও ফুল-ফসল। আরও আছে নানা-রকম পশুপাখি ও জীবজন্তু। এ সবই সৃষ্টি করেছেন মহান আল্লাহ। তিনি এসব সৃষ্টি করেছেন আমাদের জন্য। তিনিই আলো-বাতাস, পানি ও মাটি সৃষ্টি করে সকল সৃষ্টিকে বাঁচিয়ে রাখেন, লালন-পালন করেন। আমরা জাতীয় কবির সাথে কণ্ঠ মিলিয়ে বলব-

এই শস্য-শ্যামল ফসল ভরা মাটির ডালি খানি

খোদা তোমার মেহেরবাণী।

আমাদের মাথার উপর আছে দিগন্তজোড়া বিশাল আকাশ। আকাশে আছে চন্দ্র, সূর্য, গ্রহ, নক্ষত্র। পৃথিবীর চেয়ে লক্ষ লক্ষ গুণ বড় এক একটি নক্ষত্র। আরও আছে অসংখ্য ছায়াপথ। আর নীহারিকাপুঞ্জ। একসময় এসব কিছুই ছিল না। এসব কে সৃষ্টি করেছেন? এসবও সৃষ্টি করেছেন মহান আল্লাহ। তিনি এসব শুধু সৃষ্টিই করেন নি, অত্যন্ত সুন্দরভাবে রক্ষণাবেক্ষণও করছেন এবং সুন্দরভাবে পরিচালনা করছেন। তিনি সকল সৃষ্টির মালিক। তিনি সর্বশক্তিমান।



আকাশ ও সৌরজগৎ

মহান আল্লাহ এক, অদ্বিতীয়। তাঁর কোনো শরিক নেই। তাঁর সত্তা ও গুণের সাথে তুলনা করা যায় এমন কোনো কিছুই নেই। তিনি অনাদি, অনন্ত।

আমরা জানব ও বিশ্বাস করব—

ক. আমাদের স্রষ্টা আল্লাহ।

খ. আসমান—জমিন ও এ দুইয়ের মধ্যে যা কিছু আছে সবকিছুই সৃষ্টি করেছেন আল্লাহ।


গ. মহান আল্লাহ এক ও অদ্বিতীয় এবং অতুলনীয়। তাঁর কোনো শরিক নেই।

**পরিকল্পিত কাজ:** ‘আল্লাহ তায়ালার পরিচয়’—শিক্ষার্থীরা সংক্ষেপে নিজ নিজ খাতায় লিখবে।

## আল্লাহ মালিক ( اللهُ مَالِكٌ )

আল্লাহু মালিকুন অর্থ আল্লাহ মালিক। মালিক অর্থ অধিপতি। পরম দয়ালু আল্লাহ তায়ালার আমাদের সৃষ্টি করেছেন। তিনি আমাদের বসবাসের জন্য পৃথিবী সৃষ্টি করেছেন। কতো বড়, কতো সুন্দর এই পৃথিবী। এতে আছে পাহাড়—পর্বত, খাল—বিল, নদী—নালা, পশুপাখি, জীবজন্তু, গাছপালা ও ফুল—ফসল। এসবের মালিক আল্লাহ।

মাটির উপরে যেমন ছোট—বড় অসংখ্য সৃষ্টি আছে, মাটির নিচেও আছে অনেক কিছু। আছে তেল, গ্যাস, কয়লা, লোহা, সোনা, হীরা। আরও কতো কিছু। এসবের মালিকও মহান আল্লাহ।



আল্লাহর সৃষ্টি প্রাকৃতিক দৃশ্য

আমাদের মাথার উপরে আছে বিশাল আকাশ। আকাশে আছে চন্দ্র, সূর্য, নক্ষত্র ও তারা। আরও আছে গ্রহ, উপগ্রহ, ছায়াপথ ও নীহারিকাপুঞ্জ। এ বিশাল পৃথিবীর চেয়েও লক্ষ লক্ষ গুণ বড় এক একটি নক্ষত্র। এসব কিছুরও মালিক আল্লাহ তায়ালার।

কুরআন মজিদে আছে, “**আসমান ও জমিনে যা কিছু আছে সব কিছুরই মালিক আল্লাহ।**” আল্লাহ আমাদেরও মালিক। পরম দয়ালু আল্লাহ এসব কিছুই আমাদের জন্য সৃষ্টি করেছেন। আর আমাদের সৃষ্টি করেছেন তাঁর ইবাদতের জন্য। আল্লাহ তায়ালার ইচ্ছায় আমাদের জন্ম হয়। তাঁর ইচ্ছায় আমরা বেঁচে থাকি। আবার তাঁর ইচ্ছায়ই আমাদের মৃত্যু হয়। তিনি আমাদের জীবন-মৃত্যুর মালিক। আমাদের ধনসম্পদের মালিক আল্লাহ। আমাদের সুখ-দুঃখের মালিকও তিনি। তাঁর মালিকানায় কোনো শরিক নেই।



সৌরজগৎ

আমরা কবির কণ্ঠে কণ্ঠ মিলিয়ে বলব:

কুল মাখলুক আল্লাহ তায়ালা  
তোমার দয়ার দান  
তুমিই সবার স্রষ্টা পালক  
সর্বশক্তিমান।

বাদশাকে করো নিমিষে ফকির  
ফকিরকে করো ধরার আমীর  
জীবিতকে তুমি করিতেছো মৃত  
মৃতকে দিতেছো প্রাণ ॥

—কবি সাবির আহমেদ চৌধুরী


আমরা বিশ্বাস করি, আসমান জমিনের মালিক আল্লাহ। দুনিয়ার সকল ধনসম্পদের মালিক আল্লাহ। আমাদের সুখ-দুঃখের মালিক আল্লাহ। আমাদের জীবন-মৃত্যুর মালিকও আল্লাহ। আমরা আল্লাহর সন্তুষ্টির জন্য ভালো কাজ করব।

**পরিকল্পিত কাজ :** ‘আল্লাহ সবকিছুর মালিক’। এ বিষয়ের উপর শিক্ষার্থীরা ৫টি বাক্য খাতায় লিখবে।

### আল্লাহ সর্বশক্তিমান ( **اللَّهُ قَدِيرٌ** )

আল্লাহু কাদীরুন। কাদীর অর্থ সর্বশক্তিমান। তাঁর মতো শক্তি আর কারও নেই। সর্বশক্তিমান আল্লাহ মানুষ সৃষ্টি করেছেন। তিনি মানুষের জন্য এই বিশাল পৃথিবী সৃষ্টি করেছেন। পাহাড়-পর্বত, সাগর-মহাসাগর সৃষ্টি করেছেন। গাছপালা, পশুপাখি, জীবজন্তু এসব তিনিই সৃষ্টি করেছেন।

আমাদের মাথার উপর যে বিস্তীর্ণ আকাশ তা সৃষ্টি করেছেন কে? এই আকাশ, চন্দ্র, সূর্য, গ্রহ, নক্ষত্র, নীহারিকাপুঞ্জ, ছায়াপথ এসবই সৃষ্টি করেছেন সর্বশক্তিমান আল্লাহ। আমরা দেখি প্রতিদিন পূর্বদিক রাঙা করে সূর্য উঠে। দিন হয়, আবার দিন শেষে পশ্চিম আকাশে সূর্য অস্ত যায়। রাত হয়। দিন-রাতের এ পরিবর্তন কে করেন? সর্বশক্তিমান আল্লাহই এ পরিবর্তন করেন। তিনি অসীম শক্তির অধিকারী। তাঁর হুকুমে পৃথিবীর সবকিছু চলে। মহাকাশের সবকিছুই তাঁর হুকুমে চলে।



প্রাকৃতিক শোভামণ্ডিত জনপদের দৃশ্য

তাঁর ব্যবস্থাপনায় চন্দ্র-সূর্য, গ্রহ-নক্ষত্র ও নীহারিকাপুঞ্জ আপন কক্ষপথে পরিচালিত হয়। কোথাও কোনো অনিয়ম, বিশৃঙ্খলা বা সংঘর্ষ দেখা যায় না। মহান আল্লাহ আলো, বাতাস, আগুন, পানি সৃষ্টি করেছেন। তিনিই এসব নিয়ন্ত্রণ করেন। মেঘমালা পরিচালনা করেন। বৃষ্টিবর্ষণ করে শুকনা মাটিতে প্রাণের সঞ্চার করেন। তাঁর ইচ্ছাতেই মরুভূমির বুক চিরে সুপেয় পানির ঝরনাধারা বেরিয়ে আসে। আমরা মাটিতে বীজ বপন করি, তা হতে চারা গজায়।

আলো, বাতাস, পানি অনেক সময় আমাদের বিপদের কারণ হয়। অতিবৃষ্টি, জলোচ্ছ্বাসে ঘরবাড়ি, গাছপালা ডুবে যায়। মানুষ ও পশুপাখি ভেসে যায়। ভূমিকম্প, ঝড়-তুফানে ঘরবাড়ি ধ্বংস হয়ে যায়। বড় বড় গাছপালা উপড়ে যায়। সাজানো গোছানো জনপদ লণ্ডভণ্ড হয়ে যায়। আমাদের আশ্রয়টুকুও থাকে না। সম্প্রতি ঘটে যাওয়া ‘সিডর’ ও ‘আইলাহ’র তাণ্ডবের কথা আমরা আজও ভুলতে পারি নি। এ ধরনের দুর্ঘোণে আমরা আল্লাহর উপর ভরসা রাখব। দুর্গতদের সাহায্যে এগিয়ে আসব। আলো-বাতাস, আগুন-পানি সবকিছুই মহান আল্লাহর শক্তির অধীন।



লণ্ডভণ্ড জনপদের দৃশ্যাবলি

আল্লাহ শাস্তি দিতে চাইলে কেউ তাকে রক্ষা করতে পারে না। তিনি নমরুদ, ফিরআউনের মতো পরাক্রমশালী জালিম শাসকদের ধ্বংস করেছেন। হযরত নূহ (আ)-এর অবাধ্য সম্প্রদায়কে প্লাবনে ডুবিয়ে মেরেছেন। ছোট ছোট পাখি দ্বারা আবরাহা বাদশাহর বিশাল বাহিনীকে ধ্বংস করে দিয়েছেন।

আল্লাহ তায়ালা রক্ষা করলে কেউ তাকে মারতে পারে না। অত্যাচারী নমরুদ হযরত ইবরাহীম (আ)কে পুড়িয়ে মারার জন্য অগ্নিকুণ্ডে নিক্ষেপ করেছিল। কিন্তু আগুন তাঁকে স্পর্শও করতে পারে নি। কারণ আগুন সর্বশক্তিমান আল্লাহর অধীন। মহান আল্লাহ ফিরআউনের হাত থেকে হযরত মূসা (আ)-কে রক্ষা করেছিলেন। ঈসা (আ)-কে ঘাতকদের হাত থেকে রক্ষা করেছিলেন। আমাদের প্রিয় নবি হযরত মুহাম্মদ (স)-কেও কাফিরদের হাত থেকে রক্ষা করেছেন।

আমরা মহান আল্লাহকে সর্বশক্তিমান হিসাবে বিশ্বাস করব। তাঁর কাছেই সাহায্য চাইব। কেবলমাত্র তাঁরই উপর ভরসা রাখব।

## আল্লাহ শান্তিদাতা ( اللهُ سَلَامٌ )

আল্লাহু সালামুন। সালাম অর্থ শান্তি। আল্লাহু সালামুন অর্থ আল্লাহ শান্তিদাতা। আমাদের মন যখন ভালো থাকে, তখন শান্তি লাগে। শরীর ভালো থাকলে মনে শান্তি থাকে।

যখন আমাদের মন খারাপ হয় তখন শান্তি লাগে না। শরীর খারাপ হলেও মনে শান্তি থাকে না। সবাই আমাদের জন্য দোয়া করেন। আল্লাহ আমাদের রোগমুক্ত করেন। আমরা সুস্থ হই। শান্তি পাই।

আমাদের পরিবারে আছেন আব্বা-আম্মা, ভাইবোন। আছেন দাদা-দাদি। পরিবারের কেউ অসুস্থ হলে আমরা অস্থির হয়ে পড়ি। আমাদের শান্তি থাকে না। আমরা তাঁদের সেবা করি। আল্লাহর কাছে দোয়া করি। তিনি আমাদের বিপদমুক্ত করেন। আমরা শান্তি পাই।

অনেক সময় আমাদের বইখাতা, কলম-পেন্সিল হারিয়ে যায় তখন আমাদের মন খারাপ হয়ে যায়। শান্তি থাকে না। আবার যখন তা খুঁজে পাই, তখন শান্তি পাই। আমরা যখন বন্ধু ও সহপাঠীদের সাথে মিলেমিশে থাকি, তখন ভালো লাগে। বন্ধু ও সহপাঠীদের সাথে কখনো কখনো ঝগড়া হয়। মন খারাপ হয়। তখন শান্তি লাগে না। আমরা তাড়াতাড়ি ঝগড়া মিটিয়ে ফেলব, তা হলে শান্তি লাগবে।

রাসূল (স) বলেছেন, ‘সেই ব্যক্তিই সত্যিকার মুসলমান যার মুখ ও হাত থেকে অন্য মুসলমান নিরাপদ থাকে।’ রাসূল (স) সবসময় শান্তির জন্য কাজ করতেন। শান্তির জন্য অমুসলিমদের সাথেও সন্ধি করেছেন। একে অপরের সাথে দেখা হলে আমরা সালাম দেই। শান্তি কামনা করি। বলি ‘**আসসালামু আলাইকুম**’। অর্থ: আপনার উপর শান্তি বর্ষিত হোক। সালামের জবাবে বলি ‘**ওয়া আলাইকুমুস সালাম**’। অর্থ: আপনার উপরও শান্তি বর্ষিত হোক। সালাম বিনিময় একটি সুন্দর নিয়ম। এতে সমাজে শান্তি প্রতিষ্ঠিত হয়।



কুশল বিনিময় করছে

প্রচুর ধনসম্পদ থাকলেই শান্তি পাওয়া যায় না। অনেক আগে কারুন নামে এক ব্যক্তি ছিল। তার ধনসম্পদ ছিল প্রচুর। কিন্তু তৃপ্তি ছিল না, শান্তি ছিল না। সে আরও সম্পদ লাভের জন্য অস্থির ছিল। সে আল্লাহর শোকর করত না। গরিবের হক আদায় করত না। যাকাত দিত না। আল্লাহর হুকুমে সে তার ধনসম্পদসহ ধ্বংস হয়ে গেল।

আল্লাহ তায়ালা যাকে শান্তি দেন সেই শান্তি পায়। কুঁড়েঘরে থাকলেও শান্তি পায়। অভাব-অনটনেও শান্তিতে থাকে। আল্লাহ শান্তি দিলে কেউ তার ক্ষতি করতে পারে না।

অত্যাচারী শাসক নমরুদ নিজেকে উপাস্য দাবি করেছিল। হযরত ইবরাহীম (আ) তা মানতে পারলেন না। শাস্তি দেওয়ার জন্য নমরুদ তাঁকে জ্বলন্ত আগুনের কুণ্ডে নিক্ষেপ করল। আল্লাহ তায়ালা আগুনকে বললেন, “ হে আগুন! ইবরাহীমের জন্য ঠাণ্ডা হও, শান্তিদায়ক হও।” আগুন হযরত ইবরাহীম(আ) কে স্পর্শও করতে পারল না।

একমাত্র আল্লাহ তায়ালাই শান্তিদাতা। যারা আল্লাহর হুকুম মেনে চলে তিনি তাদের শান্তি দেন। দুনিয়াতে শান্তি দেন। আখিরাতেও শান্তি দিবেন। তাঁর একটি গুণবাচক নাম “সালাম”। শান্তিদাতা।

আমরা আল্লাহ তায়ালাকে পরম শান্তিদাতা বলে বিশ্বাস করব। তাঁর কাছেই শান্তি চাইব। সবার সাথে শান্তিতে বাস করব। শান্তির পক্ষে কাজ করব।

### কালিমা শাহাদত **كَلِمَةُ شَهَادَةٍ**

কালিমাতু শাহাদাতিন। কালিমা অর্থ বাক্য। শাহাদত অর্থ সাক্ষ্য দেওয়া। কালিমা শাহাদত মানে সাক্ষ্য দেওয়ার বাক্য। এই কালিমা দ্বারা তাওহিদ ও রিসালাতের সাক্ষ্য দেই। এ দ্বারা আমরা একমাত্র আল্লাহ তায়ালাকেই মাবুদ হিসেবে স্বীকার করে নেই। হযরত মুহাম্মদ (স) কে আল্লাহর বান্দা ও রাসুল হিসেবে সাক্ষ্য দেই। তাওহিদ ও রিসালাতের উপর ইমান আনি। এটি ইসলামের মূল বিষয়। কালিমা শাহাদত হলো:

আশ্হাদু আল-লা ইলাহা ইল্লাল্লাহু	أَشْهَدُ أَنْ لَا إِلَهَ إِلَّا اللَّهُ
ওয়াহ্দাহু লা শারীকালাহু ওয়া আশ্হাদু	وَأَشْهَدُ لَا شَرِيكَ لَهُ وَأَشْهَدُ
আন্না মুহাম্মাদান আবদুহু ওয়া রাসূলুহু	أَنَّ مُحَمَّدًا عَبْدُهُ وَرَسُولُهُ

কালিমা শাহাদতে দুটি অংশ আছে :

**প্রথম অংশ:** আশ্হাদু আল লা ইলাহা ইল্লাল্লাহু ওয়াহ্দাহু লা শারীকালাহু

অর্থ : আমি সাক্ষ্য দিচ্ছি যে, আল্লাহ ছাড়া কোনো মাবুদ নেই। তিনি এক, তাঁর কোনো শরিক নেই।

এই প্রথম অংশ দ্বারা আমরা আমাদের স্রষ্টা, পালনকারী, রিজিকদাতা, পরম দয়ালু, একমাত্র আল্লাহকে মাবুদ হিসেবে স্বীকার করে নিই। আর সাক্ষ্য দেই— আল্লাহ ছাড়া অন্য কেউ ইবাদতের যোগ্য নয়।

ওয়াহ্দাহু দ্বারা আমরা আল্লাহ তায়ালাকে একত্ববাদের স্বীকারোক্তি করি। আর ‘লা শারীকালাহু’ দ্বারা শিরককে বাতিল বলে ঘোষণা দেই।

কারণ শিরক হলো তাওহিদের বিপরীত। একজন মুমিন কোনো রকম শিরকে লিপ্ত হতে পারে না। আমরা জানি আল্লাহর কোনো শরিক নেই।

**দ্বিতীয় অংশ :** ওয়া আশহাদু আন্না মুহাম্মাদান আবদুহু ওয়া রাসুলুহু

অর্থ : “আমি আরও সাক্ষ্য দিচ্ছি, নিশ্চয়ই মুহাম্মদ (স) আল্লাহর বান্দা ও রাসুল।”

এই দ্বিতীয় অংশ দ্বারা সাক্ষ্য দেই যে, মুহাম্মদ (স) যেমন আল্লাহর বান্দা তেমনি তিনি আল্লাহর রাসুল।

আমরা আল্লাহকে চিনতাম না। আল্লাহ সম্বন্ধে জানতাম না। কোন কাজে আল্লাহ তায়ালা খুশি হন তাও জানতাম না। মুহাম্মদ (স) আমাদের আল্লাহর পরিচয় জানিয়েছেন। তাঁর বাণী শুনিয়েছেন। আল্লাহর ইবাদত করার নিয়ম শিখিয়েছেন। তিনি নিজে আল্লাহর বিধান পালন করে আমাদের তা হাতে-কলমে শিক্ষা দিয়েছেন। আমরা আল্লাহর পথে চলব। রাসুল (স)-এর দেখানো পথে চলব। তাওহিদ ও রিসালাতে বিশ্বাস হলো ইমানের মূলকথা।

**জাতীয় কবির সঙ্গে কণ্ঠ মিলিয়ে বলব :**

তুমি কতই দিলে রতন, ভাই বেরাদার পুত্র স্বজন

ক্ষুধা পেলে অনু জোগাও, মানি চাই না মানি

খোদা তোমার মেহেরবাণী ॥

খোদা তোমার হুকুম তরক করি আমি প্রতি পায়

তবু আলো দিয়ে বাতাস দিয়ে বাঁচাও এ বান্দায় ॥

শ্রেষ্ঠ নবী দিলে মোরে, তরিয়ে নিতে রোজ হাশরে

পথ না ভুলি তাইতো দিলে পাক কুরআনের বাণী

খোদা তোমার মেহেরবাণী ॥

**ইমান মুজমাল (إِيمَانٌ مُّجْمَلٌ)**

আমান্তু বিল্লাহি কামা হুয়া বিআস্মাইহি	أَمَنْتُ بِاللَّهِ كَمَا هُوَ بِأَسْمَائِهِ
ওয়া সিফাতিহী ওয়া ক্বাবিলতু জামী‘আ	وَصِفَاتِهِ وَقَبِلْتُ جَمِيعَ
আহ্কামিহী ওয়া আরকানিহী	أَحْكَامِهِ وَأَرْكَانِهِ

**অর্থ :** আমি ইমান আনলাম আল্লাহর উপর ঠিক তেমনি যেমন আছেন তিনি, তাঁর সব নাম ও গুণাবলিসহ। আর মেনে নিলাম তাঁর সব হুকুম-আহকাম ও বিধি-বিধান। ইমান অর্থ বিশ্বাস। আর মুজমাল অর্থ সৎক্ষিপ্ত। ইমান মুজমাল মানে সৎক্ষিপ্ত বিশ্বাস। ইসলামের মূল বিষয়গুলোকে সৎক্ষেপে বিশ্বাস ও স্বীকার করাকে বলে ইমান মুজমাল। ইমান মুজমাল দ্বারা সৎক্ষিপ্ত কথায় ইমানের ঘোষণা দেওয়া হয়।

আমাদের মাবুদ মহান আল্লাহ। তিনি এক, অদ্বিতীয়, অতুলনীয়। তাঁর কোনো শরিক নেই। তাঁর আছে অনেক সুন্দর গুণবাচক নাম। আল্লাহর সত্তায় যেমন বিশ্বাস করতে হয় তেমনি তাঁর সিফাত বা গুণাবলিতেও বিশ্বাস করতে হয়। তাঁর সত্তার সাথে কারও তুলনা হয় না। তেমনি তাঁর গুণের সাথে তুলনা করা যায় এমন কোনো কিছুই নেই। আল্লাহ তায়ালা বলেন, “তাঁর মতো কোনো কিছুই নেই।”

একজন মুমিন মুসলিমকে আল্লাহ তায়ালা একক সত্তায় বিশ্বাস করতে হয়। তাঁর গুণাবলিতে বিশ্বাস করতে হয়। তারপর আল্লাহর আহকাম ও আরকান বা বিধি-বিধান গ্রহণ করতে হয়। তাঁর আদেশ-নিষেধ মেনে চলতে হয়। আমাদের জন্য যা কল্যাণকর, যা ভালো তিনি তা গ্রহণ করতে বলেছেন। আর যা অকল্যাণকর, যা মন্দ তা বর্জন করতে বলেছেন। এই গ্রহণ ও বর্জন মিলেই হলো ইমান। ইমান মুজমাল খুব সৎক্ষিপ্ত। কিন্তু এর বিষয়বস্তু ব্যাপক। এর তাৎপর্য গভীর।

আমরা আল্লাহ তায়ালা সত্তায় ও গুণাবলিতে বিশ্বাস করব। মহান আল্লাহর বিধি-বিধান ও আদেশ-নিষেধ মেনে নেব।

**পরিকল্পিত কাজ :** শিক্ষার্থীরা ইমানে মুজমালের অর্থ সুন্দর করে খাতায় লিখবে।

### ইমান মুফাস্সাল (إِيمَانٌ مُفَصَّلٌ)

আমান্তু বিল্লাহি ওয়ামালাইকাতিহী ওয়াকুতুবিহী	أَمَنْتُ بِاللَّهِ وَمَلَائِكَتِهِ وَكُتُبِهِ
ওয়ান্নাসুলিহী ওয়াইয়াওমিল আখিরি ওয়ালকাদরি	وَرُسُلِهِ وَالْيَوْمِ الْآخِرِ وَالْقَدَرِ
খাইরিহী ওয়াশাররিহী মিনাল্লাহি তাআলা	خَيْرِهِ وَشَرِّهِ مِنَ اللَّهِ تَعَالَى
ওয়াল বা‘সি বা‘দাল মাউত।	وَالْبَعْثِ بَعْدَ الْمَوْتِ

**অর্থ :** আমি ইমান আনলাম আল্লাহ, তাঁর ফেরেশতা, তাঁর কিতাব ও তাঁর রাসূলগণের উপর। আরও ইমান আনলাম শেষ দিবসে ও তকদিরের ভালোমন্দে যা আল্লাহর পক্ষ থেকে হয় এবং মৃত্যুর পর পুনরুত্থানে।

ইমান অর্থ বিশ্বাস। আর মুফাসসাল অর্থ বিস্তারিত। ইমান মুফাসসাল অর্থ বিস্তারিত বিশ্বাস। আমরা মুমিন। ইসলামের কতকগুলো মূল বিষয়ের উপর আমাদের ইমান আনতে হয়। আমরা এর আগে যে বিষয়গুলোকে সৎক্ষিপ্ত কথায় স্বীকার করেছি, এখন সে বিষয়গুলোকে বিস্তারিত ভাবে জানব। বিস্তারিতভাবে স্বীকার করব। সে জন্য একে বলা হয় ইমান মুফাসসাল।

ইমান মুফাসসালে আমরা সাতটি বিষয়ের উপর ইমান আনি। বিষয়গুলো হলো :

১. আল্লাহ	২. ফেরেশতা	৩. কিতাব
৪. রাসূলগণ	৫. শেষ দিবস	৬. তকদির
৭. মৃত্যুর পর পুনরুত্থান		

### ১। ইমানের প্রথম বিষয় : আল্লাহ তায়ালায় উপর বিশ্বাস

ইমানের প্রথম কথাই হলো আল্লাহ তায়ালায় উপর বিশ্বাস। আমরা বিশ্বাস করি আল্লাহ তাঁর সন্তায় এক ও অদ্বিতীয়। তাঁর কোনো শরিক নেই। তিনি তাঁর গুণাবলিতেও অদ্বিতীয় ও অতুলনীয়। তিনি অনাদি, অনন্ত। তিনিই প্রথম, তিনিই শেষ। যখন কোনো কিছুই ছিল না তখন ছিলেন তিনি। আবার একদিন সবকিছুই ধ্বংস হয়ে যাবে তখন তিনিই থাকবেন। মহান আল্লাহ সবকিছু জানেন, সবকিছু শোনে ও দেখেন। আসমান জমিনের সবকিছু তাঁর সৃষ্টি। তিনি সকল সৃষ্টির পালনকর্তা। তিনি পরম দয়ালু। তিনিই সবকিছুর মালিক। আমরা ভালো কাজ করলে তিনি খুশি হন। মন্দ কাজ করলে তিনি অসন্তুষ্ট হন। আমরা আল্লাহর উপর ভরসা রেখে ভালো কাজ করব।

### ২। ইমানের দ্বিতীয় বিষয় : মালাইকা বা ফেরেশতাগণে বিশ্বাস

ফেরেশতাগণ আল্লাহ তায়ালায় বিশেষ সৃষ্টি। তাঁরা নূরের তৈরি। নূর মানে আলো। তাঁরা আল্লাহর আদেশে বিভিন্ন কাজে নিয়োজিত। তাঁরা কখনো আল্লাহর হুকুম অমান্য করেন না। তাঁদের পানাহারের প্রয়োজন নেই। আল্লাহর জিকিরই তাঁদের জীবিকা। তাঁদের সংখ্যা আল্লাহ ছাড়া কেউ জানে না। তাঁদের মধ্যে চারজন ফেরেশতা প্রসিদ্ধ।

- ক. হযরত জিবরাইল (আ) : তিনি নবি-রাসুলগণের কাছে আল্লাহর ওহি নিয়ে আসতেন। ওহি মানে আল্লাহর বাণী।
- খ. হযরত মিকাইল (আ) : তিনি জীবের জীবিকা বণ্টন ও মেঘবৃষ্টির দায়িত্বে নিয়োজিত।
- গ. হযরত আযরাইল (আ) : তিনি আল্লাহর হুকুমে জীবের জান কবজ করেন।
- ঘ. হযরত ইসরাফিল (আ) : তিনি শিঙ্গা হাতে আল্লাহর আদেশের অপেক্ষায় আছেন। তিনি প্রথম ফুঁ দেবেন, তাতে সকল সৃষ্টি ধ্বংস হয়ে যাবে। দ্বিতীয় ফুঁ দেবেন তখন সবকিছু জীবন ফিরে পাবে।

একদল ফেরেশতা আছেন, যারা মানুষের ভালো-মন্দ কাজের হিসাব রাখেন। তাঁদের বলে কিরামান কাতিবিন। মানে সম্মানিত লেখকগণ। মুনকার-নকির নামে আরও ফেরেশতা আছেন। তারা কবরে প্রশ্ন করবেন। প্রশ্ন করবেন- আল্লাহ, রাসুল ও দীন সম্বন্ধে। আল্লাহর অনুগত বান্দারা এসব প্রশ্নের উত্তর দিতে পারবেন।

### ৩। ইমানের তৃতীয় বিষয় : আসমানি কিতাবে বিশ্বাস

আল্লাহ তায়ালা নবি-রাসুলের কাছে ওহি পাঠিয়েছেন। ওহি হলো আল্লাহর বাণী। আল্লাহর বাণীসমূহের সমষ্টিকে বলে আসমানি কিতাব। আসমানি কিতাবে আছে মানুষের জন্য হিদায়াত। মুক্তির কথা।

আসমানি কিতাব হলো ১০৪ খানা। ৪ খানা বড়। আর ১০০ খানা ছোট। ছোট কিতাবকে সহীফা বলে। সহীফা মানে পুস্তিকা।

৪ খানা বড় কিতাব হলো :

১. তাওরাত : হযরত মুসা (আ)-এর উপর অবতীর্ণ হয়েছিল।
২. যাবূর : হযরত দাউদ (আ)-এর উপর অবতীর্ণ হয়েছিল।
৩. ইনজিল : হযরত ঈসা (আ)-এর উপর অবতীর্ণ হয়েছিল।
৪. কুরআন মজিদ : হযরত মুহাম্মদ (স)-এর উপর অবতীর্ণ হয়েছিল।

কুরআন মজিদ সর্বশেষ আসমানি কিতাব। এতে আছে কিয়ামত পর্যন্ত বিশ্বের সকল মানুষের সব সমস্যার সমাধান, ভালো হওয়ার শিক্ষা। আমরা সকল কিতাবে বিশ্বাস করব। আর কুরআন মজিদের শিক্ষা মেনে চলব।

### ৪। ইমানের চতুর্থ বিষয় : নবি-রাসুলে বিশ্বাস

আমরা আগেই জেনেছি মানুষের হিদায়াতের জন্য আল্লাহ তায়ালা ওহি পাঠিয়েছেন। ওহি আসত নবি-রাসুলগণের কাছে। নবি-রাসুলগণ মানুষের শিক্ষক। তাঁরা আদর্শ শিক্ষক। তাঁরা ছিলেন নিঃস্বার্থ মানবদরদি। তাঁরা মানুষকে আল্লাহর পথে ডাকতেন। তাঁকে খুশি করার পথ দেখাতেন। কিতাবে বিশ্বাস করা যেমন ইমানের অঙ্গ, নবি-রাসুলে বিশ্বাস করাও তেমনি ইমানের অঙ্গ।

প্রথম নবি হলেন হযরত আদম (আ)। আর শেষ নবি হলেন হযরত মুহাম্মদ (স)। এই দুজনের মাঝে অনেক নবি-রাসুল এসেছেন। আল্লাহ বলেন “এমন কোনো জনপদ নেই যেখানে আমি কোনো নবি পাঠাইনি।”

কুরআন মজিদে ২৫ জন নবি-রাসুলের নাম উল্লেখ আছে। যেমন হযরত আদম (আ), হযরত ইদরীস (আ), হযরত নূহ (আ), হযরত ইবরাহীম (আ), হযরত ইসমাইল (আ), হযরত ইসহাক (আ), হযরত ইয়াকুব (আ), হযরত ইউসূফ (আ), হযরত হূদ (আ), হযরত সালিহ (আ), হযরত লূত (আ), হযরত শূআইব (আ), হযরত আইয়ুব (আ), হযরত জাকারিয়া (আ), হযরত দাউদ (আ), হযরত সুলাইমান (আ), হযরত মূসা (আ), হযরত হীসা (আ), হযরত মুহাম্মদ (স)। আমরা সকল নবি-রাসুলগণে বিশ্বাস করব। সম্মান করব। আর সর্বশেষ ও সর্বশ্রেষ্ঠ নবি হযরত মুহাম্মদ (স)-এর আদর্শ মেনে চলব।

### ৫। ইমানের পঞ্চম বিষয় : শেষ দিবসে বিশ্বাস

আমরা এই দুনিয়ায় চিরদিন বেঁচে থাকি না। এ জীবন চিরস্থায়ী নয়, ক্ষণস্থায়ী। আমাদের যেমন জন্ম আছে, তেমনি মৃত্যুও আছে। সকল প্রাণীরই মৃত্যু আছে। যার জীবন আছে তার মৃত্যু আছে। আমাদের সুন্দর পৃথিবীও একদিন ধ্বংস হয়ে যাবে। শেষ হয়ে যাবে। একমাত্র আল্লাহ ছাড়া আর কোনো কিছুই অবশিষ্ট থাকবে না।

আমাদের মৃত্যুর পরের জীবনকে বলে আখিরাত। আখিরাত মানে পরকাল। মৃত্যুর পরেই এ জীবনের শুরু হয়। কবর, কিয়ামত, হাশর, জান্নাত, জাহান্নাম-এসবই আখিরাতের জীবনের অন্তর্ভুক্ত। আখিরাতের জীবনের শুরু আছে শেষ নেই। সে জীবন অনন্ত কালের। আল্লাহ বলেন, “এ দুনিয়ার জীবনতো অস্থায়ী উপভোগের বস্তু। আর আখিরাতই হচ্ছে চিরস্থায়ী আবাস।”

ইমানের অন্যান্য বিষয়ের উপর বিশ্বাস যেমন জরুরি, আখিরাত বা শেষ দিবসে বিশ্বাসও তেমনি জরুরি। দুনিয়ায় যে যেমন কাজ করবে আখিরাতে তেমনি ফল ভোগ করবে। ভালো কাজ করলে আখিরাতে পুরস্কার পাবে। আর মন্দ কাজের জন্য শাস্তি ভোগ করতে হবে। শেষ দিবস বা আখিরাতে বিশ্বাসী ব্যক্তি তার কাজকর্মে সতর্ক হয়। পুরস্কারের আশায় ভালো কাজ করে। আর শাস্তির ভয়ে মন্দ কাজ থেকে বিরত থাকে। এতে তার নৈতিক চরিত্র উন্নত হয়।

কবি যথার্থই বলেছেন,

দুনিয়াটা আখিরাতের  
খামার বাড়ি ভাই  
ভবের হাটের ক্ষেতখামারে  
ফসল ফলান চাই ॥  
এই ফসলের নেইকো জুড়ি  
এক কণা তার হয় না চুরি  
হিসাব লেখেন দুই মুহুরী  
সদা সর্বদাই ॥  
অচিন দেশের যাত্রী সবাই  
টারমিনালে ক্ষণিকের ঠাই  
কখন যে হয় ঘণ্টা বাজে  
ঘড়ির সময় হলে ॥

—কবি সাবির আহমেদ চৌধুরী

**৬। ইমানের ষষ্ঠ বিষয় :** তকদিরে বিশ্বাস

তকদির মানে ভাগ্য। আমাদের ভাগ্যের নিয়ন্ত্রণকারী আল্লাহ তায়ালা। আমাদের জীবনে যা ঘটে, যা হয় সবই হয় আল্লাহর নির্ধারিত হুকুমে। এই নির্ধারিত হুকুমকে বলে তকদির। আমাদের ভাগ্যে কী আছে, আমরা তা জানি না। আমরা চেষ্টা করব, কাজ করে যাব। আর ফলাফলের জন্য আল্লাহর উপর নির্ভর করব। সফল হলে শোকর করব। বিফল হলে সবুর করব, তকদির বলে মেনে নিব। তকদিরে বিশ্বাস মানুষকে অলস করে না।

আশায় উজ্জীবিত করে।

**৭। ইমানের সপ্তম বিষয় :** মৃত্যুর পর পুনরুত্থানে বিশ্বাস

মৃত্যুই আমাদের শেষ কথা নয়। ইহকালে আমরা যেসব কাজ করি তার জবাবদিহি করতে হবে পরকালে। সকলকে আবার জীবিত করে হাশরের ময়দানে উঠানো হবে। সেখানে হিসাব-নিকাশ ও সাক্ষ্যপ্রমাণ নিয়ে বিচার করা হবে। বিচারক হবেন মহান আল্লাহ। ভালো কাজের পুরস্কার হিসেবে জান্নাত দেওয়া হবে। জান্নাত হলো পরম সুখের স্থান। যারা পাপ করবে, খারাপ কাজ করবে তাদের শাস্তির জন্য নিক্ষেপ করা হবে জাহান্নামে। জাহান্নাম হলো চরম দুঃখ-কষ্ট ও ভীষণ শাস্তির স্থান।

পুনরুত্থানে বিশ্বাস মানুষকে দায়িত্বশীল করে তোলে। পুরস্কারের আশায় সৎকর্মশীল করে তোলে। আর শাস্তির ভয়ে মন্দ কাজ থেকে বিরত রাখে। এতে নৈতিক চরিত্র উন্নত হয়। আমরা—

একমাত্র আল্লাহ তায়ালাকেই মাবুদ বলে বিশ্বাস করব।

আল্লাহর ফেরেশতাগণে বিশ্বাস করব।

আল্লাহর রাসূলগণকে বিশ্বাস করব।

শেষ দিবসে বিশ্বাস করব।

তকদিরে বিশ্বাস করব।

মৃত্যুর পর পুনরুত্থানে বিশ্বাস করব।

আখিরাতে পুরস্কারের আশায় ভালো কাজ করব।

আখিরাতে শাস্তির ভয়ে মন্দ কাজ থেকে বিরত থাকব।

আমাদের নৈতিক চরিত্র উন্নত করব।

**পরিকল্পিত কাজ:**

১. শিক্ষার্থীরা ইমান মুফাস্সালের অর্থ সুন্দর করে খাতায় লিখবে।
২. শিক্ষার্থীরা চারজন প্রধান ফেরেশতার নাম ও তাঁদের কাজ খাতায় লিখবে।
৩. শিক্ষার্থীরা দশজন নবি-রাসূলের নাম খাতায় লিখবে।

## অনুশীলনী

### নৈর্ব্যক্তিক প্রশ্ন

#### ক.বহু নির্বাচনি প্রশ্ন

সঠিক উত্তরের পাশে টিক ( ✓ ) চিহ্ন দাও।

- ১। ইমান অর্থ কী?
 

ক. সত্য কথা বলা	খ. বিশ্বাস
গ. গচ্ছিত রাখা	ঘ. শৃঙ্খলা
- ২। আমাদের স্রষ্টা কে?
 

ক. মাতা	খ. পিতা
গ. আল্লাহ	ঘ. পিতামাতা উভয়ই
- ৩। আমাদের জীবন-মৃত্যুর মালিক কে?
 

ক. আল্লাহ	খ. আযরাইল (আ)
গ. নবিগণ	ঘ. রাসূলগণ
- ৪। কাদীর অর্থ কী?
 

ক. অধিপতি	খ. শান্তি দাতা
গ. সর্বশক্তিমান	ঘ. সর্বত্র বিরাজমান
- ৫। সালাম শব্দের অর্থ কী?
 

ক. দয়া	খ. শান্তি
গ. সৃষ্টি	ঘ. ক্ষমা
- ৬। শাহাদত অর্থ কী?
 

ক. দীক্ষা দেওয়া	খ. সাক্ষ্য দেওয়া
গ. পরীক্ষা দেওয়া	ঘ. দান করা
- ৭। ইমান মুজমাল অর্থ কী?
 

ক. সংক্ষিপ্ত বিশ্বাস	খ. আন্তরিক বিশ্বাস
গ. বিস্তারিত বিশ্বাস	ঘ. মৌখিক বিশ্বাস

৮। ইমান মুফাসসালে কয়টি বিষয়ের উল্লেখ আছে?

- |           |          |
|-----------|----------|
| ক. তিনটি  | খ. চারটি |
| গ. পাঁচটি | ঘ. সাতটি |

৯। ওহি নিয়ে আসতেন কোন ফেরেশতা?

- |                |                |
|----------------|----------------|
| ক. আযরাইল (আ)  | খ. মিকাইল (আ)  |
| গ. ইসরাফিল (আ) | ঘ. জিবরাইল (আ) |

১০। আসমানি কিতাব কতো খানা?

- |             |             |
|-------------|-------------|
| ক. ৪ খানা   | খ. ১০০ খানা |
| গ. ১০৪ খানা | ঘ. ১১০ খানা |

খ. শূন্যস্থান পূরণ কর :

- ১) যার ইমান আছে তাকে বলে ——— ।
- ২) আল্লাহু সালামুন অর্থ আল্লাহ ——— ।
- ৩) পরস্পরে দেখা হলে আমরা ——— দেই ।
- ৪) মুহাম্মদ (স) আল্লাহর ——— ও রাসুল ।
- ৫) তকদির মানে ——— ।

গ. রেখা টেনে অর্থ মেলাও :

- |           |              |
|-----------|--------------|
| ১) মালিক  | বাক্য        |
| ২) কাদীর  | শান্তি       |
| ৩) সালাম  | অধিপতি       |
| ৪) কালিমা | সর্বশক্তিমান |

## ঘ. রেখা টেনে সঠিক উত্তর মেলাও :

- |                |                               |
|----------------|-------------------------------|
| ১) আযরাইল (আ)  | ওহি আনতেন                     |
| ২) জিবরাইল (আ) | মেঘবৃষ্টি ও রিজিকের দায়িত্বে |
| ৩) ইসরাফিল (আ) | জীবের জান কবজ করেন            |
| ৪) মিকাইল (আ)  | শিজ্জা ফুঁ দেবেন              |

## সংক্ষেপে উত্তর দাও :

- ১) আল্লাহ তায়ালার পাঁচটি গুণের নাম লেখ।
- ২) ইমান মুফাসসালে কয়টি বিষয়ের উল্লেখ আছে?
- ৩) চারজন প্রসিদ্ধ ফেরেশতার নাম লেখ।
- ৪) চারখানা বড় কিতাবের নাম লেখ।
- ৫) দশজন নবি-রাসুলের নাম লেখ।
- ৬) আসমানি কিতাব কতো খানা?
- ৭) ছোট কিতাবকে কী বলে?
- ৮) সর্বশেষ নবি কে?
- ৯) সর্বশেষ আসমানি কিতাব কী?

## বর্ণনামূলক প্রশ্ন :

- ১) সংক্ষেপে আল্লাহর পরিচয় দাও।
- ২) আল্লাহ তায়ালার কয়েকটি গুণের নাম লেখ।
- ৩) ‘আল্লাহ সর্বশক্তিমান’ কথাটির অর্থ বুঝিয়ে লেখ।
- ৪) ‘আল্লাহ শান্তিদাতা’ বাক্যটি বুঝিয়ে লেখ।
- ৫) কালিমা শাহাদত অর্থসহ বাংলায় লেখ।
- ৬) ইমান মুজমাল অর্থসহ বাংলায় লেখ।

- ৭) ইমান মুফাসসালে উল্লিখিত বিষয়গুলোর নাম লেখ।
- ৮) আল্লাহর উপর বিশ্বাস কথাটি বুঝিয়ে লেখ।
- ৯) প্রসিদ্ধ ফেরেশতাদের নাম ও তাঁদের কাজ বর্ণনা কর।
- ১০) আসমানি কিতাব কাকে বলে? সংক্ষেপে সর্বশেষ আসমানি কিতাবের বর্ণনা দাও।

### পরিকল্পিত কাজ

ক. এই শব্দগুলো খাতায় লেখ।

يَا اللَّهُ	يَا مَالِكُ
يَا سَلَامُ	يَا قَدِيرُ

খ. প্রকৃতির একটি ছবি আঁকো।

## দ্বিতীয় অধ্যায়

# ইবাদত (عِبَادَةٌ)

ইবাদত অর্থ গোলামি করা, মালিকের কথামতো চলা। আল্লাহ তায়ালা ও তাঁর রাসুল (স)-এর কথামতো কাজ করাকে ইবাদত বলে। ইবাদত শব্দটির অর্থ ব্যাপক। যেমন, সালাত আদায় করা, কুরআন মজিদ তিলাওয়াত করা, রোগীর সেবা করা, কথা বলার সময় সত্য কথা বলা সব কিছুই ইবাদত।

### ইবাদতের পরিচয়

আল্লাহ তায়ালা কুরআন মজিদে বলেন, “ আমি সৃষ্টি করেছি জিন এবং মানুষকে এজন্য যে, তারা শুধু আমারই ইবাদত করবে। ”

এর অর্থ হলো :

১. আমরা কেবল আল্লাহ তায়ালায় গোলামি করব, অন্য কারও নয়।
২. আমরা কেবল আল্লাহ তায়ালায় আদেশমতো চলব, অন্য কারও নয়।
৩. কেবলমাত্র তাঁরই সামনে মাথা নত করব, অন্য কারও নয়।
৪. কেবলমাত্র তাঁকেই ভয় করব, অন্য কাউকে নয়।
৫. কেবলমাত্র তাঁর কাছে সাহায্য চাইব, অন্য কারও কাছে নয়।

এই পাঁচটি জিনিসকে আল্লাহ তায়ালা বুঝিয়েছেন ইবাদত শব্দ দ্বারা। কুরআন মজিদের বিভিন্ন আয়াত হতে ইবাদত শব্দের এরূপ অর্থ পাওয়া যায়। তাই অর্থ বুঝে ইবাদত করা উচিত। আমাদের প্রিয় নবি (স) এবং তাঁর পূর্ববর্তী সকল নবির শিক্ষার সারকথা হলো, “আল্লাহ ছাড়া আর কারও ইবাদত করো না।” আমরা সালাতের প্রতি রাকআতে সূরা ফাতিহা পড়ি; তখন একথাগুলোরই ঘোষণা করে থাকি।

ইয়্যাকানা না'বুদু ওয়া ইয়্যাকানা নাসতাদ্দিন

إِيَّاكَ نَعْبُدُ وَإِيَّاكَ نَسْتَعِينُ

**অর্থ** : আমরা শুধু তোমারই ইবাদত করি। আমরা শুধু তোমারই নিকট সাহায্য প্রার্থনা করি।

আল্লাহ তায়ালা আমাদের উপর বিভিন্ন ইবাদত ফরজ করেছেন। যেমন সালাত, সাওম, যাকাত ও হজ।

**দলীয় কাজ :** দলে বসে পরস্পর আলাপ-আলোচনা করে ইবাদতের একটি তালিকা তৈরি করে মার্কার দিয়ে পোস্টার পেপারে লিখবে।

## তাহারাত - طَهَارَةٌ

আল্লাহ তায়ালা বলেন, “যারা পাক-পবিত্র থাকে আল্লাহ তাদের ভালোবাসেন।”

মহানবি (স) বলেন, “পবিত্রতা ইমানের অঙ্গ।”

পাক-পবিত্র থাকাকেই তাহারাত বলে। তাহারাত অর্থ পবিত্রতা। ওযু করা, গোসল করা ইত্যাদি। যারা পাকসাফ থাকে, পরিষ্কার পোশাক পরে, তাদেরকে সবাই ভালোবাসে। সবাই তাদের আদর করে। পাকসাফ থাকলে দেহমন ভালো থাকে। লেখাপড়ায় মন বসে। আল্লাহ খুশি হন।

## ওযু - وُضُوءٌ

কুরআন মজিদে আল্লাহ তায়ালা সালাত আদায়ের আগে ওযু করার নির্দেশ দিয়েছেন। পাকসাফ ও পবিত্র থাকার অনেক নিয়ম আছে। ওযু তার মধ্যে একটি উত্তম নিয়ম। সালাতের আগে ওযু করা ফরজ। ওযু ছাড়া সালাত আদায় হয় না।

## ওযুর ফরজ

ওযুর ফরজ চারটি। যথা :

১. মুখমণ্ডল ধোয়া।
২. কনুইসহ উভয় হাত ধোয়া।
৩. চার ভাগের এক ভাগ মাথা মাসাহ করা।
৪. গিরাসহ উভয় পা ধোয়া।

**পরিকল্পিত কাজ :** ওযুর ফরজগুলোর একটি তালিকা তৈরি করবে।

## ওযুর সুন্নত

ওযুর সুন্নত ১১টি। যথা:

১. নিয়ত করা,
২. বিসমিল্লাহ বলে ওযু আরম্ভ করা,
৩. দাঁত মাজা,
৪. কজ্জি পর্যন্ত দুই হাত তিনবার ধোয়া,
৫. তিনবার কুলি করা,
৬. পানি দিয়ে তিনবার নাক সাফ করা,
৭. প্রত্যেক অঙ্গ তিনবার ধোয়া,
৮. কান মাসাহ করা,
৯. হাত-পা ধোয়ার সময় ডান হাত ও ডান পা আগে ধোয়া,
১০. সম্পূর্ণ মাথা একবার মাসাহ করা,
১১. ওযুর কাজগুলো ধারাবাহিকভাবে পর পর করা।

আব্বা-আম্মা, বড় ভাইবোন, শিক্ষক ও মসজিদের ইমাম সাহেব ভালোভাবে ওযু করেন।  
আমরা তাঁদের ওযু দেখে ভালোভাবে ওযু করা শিখব।

**পরিকল্পিত কাজ :** শিক্ষক প্রথমে ওযু করে শিক্ষার্থীদের দেখাবেন। এরপর শিক্ষার্থীরা ওযু করবে। শিক্ষক দেখবেন। প্রয়োজন অনুযায়ী নির্দেশনা দেবেন।

## ওযু নফ্ট হওয়ার কারণ

নানা কারণে ওযু নফ্ট হয়। এগুলোর প্রতি আমাদের খেয়াল রাখতে হবে। যেসব কারণে ওযু নফ্ট হয় তা হলো :

১. পেশাব বা পায়খানার রাস্তা দিয়ে কিছু বের হলে।
২. মুখ ভরে বমি করলে।
৩. কোনো কিছু ঠেস দিয়ে বা শূয়ে ঘুমিয়ে পড়লে।
৪. অজ্ঞান হলে।
৫. রক্ত বা পুঁজ বের হয়ে শরীর থেকে গড়িয়ে পড়লে।
৬. সালাতের মধ্যে উচ্চস্বরে হেসে ফেললে।

ওযু করা ফরজ। ওযু ছাড়া সালাত আদায় হয় না। ওযু সম্পর্কে আমরা সাবধান থাকব।

ওযু নফ্ট হলে ওযু করে নেব।

**পরিকল্পিত কাজ :** ওযু নফ্ট হওয়ার কারণগুলো লিখবে।

## গোসল ( غَسْلٌ )

সুস্থ শরীর ও সুন্দর মনের জন্য পাকসাফ থাকার প্রয়োজন। কিন্তু নানা কাজে নানাভাবে শরীর ময়লা হয়, অপবিত্র হয়। তাই অস্বস্তি লাগে। এই ময়লা ও অপবিত্রতা দূর করার উত্তম উপায় হলো গোসল করা। পানি দিয়ে সারা শরীর ধোয়াকে গোসল বলে।

গোসল করলে গায়ের ঘাম দূর হয়। দুর্গন্ধ দূর হয়। দেহমন পবিত্র হয়। মন ভালো থাকে। কাজে উৎসাহ আসে।

### গোসলের নিয়ম

আমরা গোসলের শুরুতে দুই হাত ধুয়ে নেব। গড়গড়াসহ কুলি করে মুখ পরিষ্কার করব। পানি দিয়ে নাক সাফ করব। পরে সারা শরীর ভালো করে তিনবার ধুয়ে ফেলব। এভাবে গোসল করব।

### গোসলের ফরজ

গোসলের ফরজ তিনটি। যথা:

- ১) গড়গড়াসহ কুলি করা,
- ২) পানি দিয়ে ভালোভাবে নাক সাফ করা।
- ৩) পানি দিয়ে সারা শরীর ধোয়া।

খেয়াল রাখতে হবে সারা শরীরের কোনো অংশ যেন শুকনা না থাকে। নিয়মিত গোসল করলে শরীর ভালো থাকে। গোসল করা আল্লাহ তায়ালার হুকুম। এটাও একটা ইবাদত।

**পরিকল্পিত কাজ :** গোসলের ফরজ কাজগুলোর তালিকা তৈরি করবে।

## আযান ( أَذَانٌ )

সালাত জামাআতের সাথে আদায় করতে হয়। মহানবি (স) জামাআতে সালাত আদায় করতে তাগিদ দিয়েছেন। জামাআতে সালাত আদায়ের জন্য কীভাবে ডাকতে হয় কেউ তা জানত না। মহানবি (স) সাহাবীদের নিয়ে একদিন পরামর্শে বসলেন, আলোচনা চলল। কেউ বললেন, সালাতের সময় হলে ঘণ্টা বাজানো হোক। কেউ বললেন, শিঙায় ফুঁ দিয়ে ডাকা হোক। কেউ বললেন, আগুন জ্বালানো হোক। আরও অনেকেই অনেক কথা বললেন। মহানবি (স) কোনোটাই পছন্দ করলেন না।

গভীর রাত। সাহাবি হযরত আবদুল্লাহ গভীর ঘুমে মগ্ন। স্বপ্ন দেখেন, একজন ফেরেশতা তাঁকে আযানের বাক্যগুলো শুনচ্ছেন। ভোরে তিনি ঐ বাক্যগুলো মহানবি (স)-কে শুনালেন। আশ্চর্যের কথা, হযরত উমর (রা)ও একই স্বপ্ন দেখেন। বাক্যগুলো মহানবি (স)-এর খুব পছন্দ হলো। তিনি বললেন, ‘এটা মহান আল্লাহরই নির্দেশ।’

মহানবি (স) হযরত বিলাল (রা)-কে আযান দিতে বললেন। হযরত বিলালের কণ্ঠে ধ্বনিত হলো প্রথম আযান। হযরত বিলাল হলেন ইসলামের প্রথম মুয়াজ্জিন।

### আযানের বাক্যগুলো হলো:

আল্লাহু আকবার, আল্লাহু আকবার,

اللَّهُ أَكْبَرُ، اللَّهُ أَكْبَرُ،

আল্লাহু আকবার, আল্লাহু আকবার,

اللَّهُ أَكْبَرُ، اللَّهُ أَكْبَرُ،

আশহাদু আল-লা ইলাহা ইল্লাল্লাহ

أَشْهَدُ أَنْ لَا إِلَهَ إِلَّا اللَّهُ

আশহাদু আল-লা ইলাহা ইল্লাল্লাহ

أَشْهَدُ أَنْ لَا إِلَهَ إِلَّا اللَّهُ

আশহাদু আন্বা মুহাম্মাদার রাসুলুল্লাহ

أَشْهَدُ أَنَّ مُحَمَّدًا رَسُولُ اللَّهِ

আশহাদু আন্বা মুহাম্মাদার রাসুলুল্লাহ

أَشْهَدُ أَنَّ مُحَمَّدًا رَسُولُ اللَّهِ

হুইইয়া আলাস সালাহ, হুইইয়া আলাস সালাহ

حَيَّ عَلَى الصَّلَاةِ - حَيَّ عَلَى الصَّلَاةِ -

হুইইয়া আলাল ফালাহ, হুইইয়া আলাল ফালাহ

حَيَّ عَلَى الْفَلَاحِ - حَيَّ عَلَى الْفَلَاحِ -

আল্লাহু আকবার, আল্লাহু আকবার

اللَّهُ أَكْبَرُ، اللَّهُ أَكْبَرُ،

লা ইলাহা ইল্লাল্লাহ

لَا إِلَهَ إِلَّا اللَّهُ -

**অর্থ :** আল্লাহ সবচেয়ে বড়, আল্লাহ সবচেয়ে বড়, আল্লাহ সবচেয়ে বড়, আল্লাহ সবচেয়ে বড়।

আমি সাক্ষ্য দিচ্ছি যে, আল্লাহ ছাড়া আর কোনো মাবুদ নেই। (দুইবার)

আমি সাক্ষ্য দিচ্ছি যে, মুহাম্মদ (স) আল্লাহর রাসুল। (দুইবার)

সালাত আদায়ের জন্য এসো, সালাত আদায়ের জন্য এসো।

কল্যাণ ও মজ্গলের জন্য এসো, কল্যাণ ও মজ্গলের জন্য এসো।

আল্লাহ সবচেয়ে বড়, আল্লাহ সবচেয়ে বড়। আল্লাহ ছাড়া কোনো মাবুদ নেই।

ফজরের আযানে হুইইয়া আলাল ফালাহ—এর পর ঘুম ভাঙানো ডাক দেয়া হয়। বলতে হয়:

আসসালাতু খাইরুম মিনান নাউম **الصَّلَاةُ خَيْرٌ مِنَ النَّوْمِ**

আসসালাতু খাইরুম মিনান নাউম **الصَّلَاةُ خَيْرٌ مِنَ النَّوْمِ**

**অর্থ :** ঘুম থেকে সালাত উত্তম, ঘুম থেকে সালাত উত্তম।

আযানের এই মর্মস্পর্শী ডাক শুনে কোনো মুমিনব্যক্তি বসে থাকতে পারে না। প্রকৃত মালিকের দরবারে হাজির হয়ে তাঁর সামনে মাথা নত না করে সে কিছুতেই শান্তি পায় না।

আমাদের জাতীয় কবি কাজী নজরুল ইসলাম বলেন :

বাজল কিরে ভোরের শানাই  
নিদমহলা আঁধার পুরে।  
শুনাই আযান গগনতলে  
অতীত রাতের মিনার চূড়ে ॥

কবি কায়কোবাদ বলেন:

কে ওই শোনাল মোরে আযানের ধ্বনি  
মর্মে মর্মে সেই সুর  
বাজিল কী সুমধুর  
আকুল হইল প্রাণ নাচিল ধমনী ॥

**একক কাজ :** শিক্ষার্থীরা আযানের বাক্যগুলো বাংলায় মার্কার দিয়ে পোস্টার পেপারে লিখবে।

আযানের শেষে এই দোয়া পড়তে হয় :

**اللَّهُمَّ رَبِّ هَذِهِ الدَّعْوَةُ التَّامَّةُ وَالصَّلَاةُ الْقَائِمَةُ أَيْ مُحَمَّدَانِ الْوَسِيْلَةَ وَالْفَضِيْلَةَ  
وَالدَّرَجَةَ الرَّفِيْعَةَ وَابْعَثْهُ مَقَامًا مَّحْمُودًا فِي الدِّيْنِ وَعَدَّتْهُ . إِنَّكَ لَا تُخْلِفُ الْبَيْعَادَ .**

আল্লাহুন্মা রাব্বা হাযিহি দাওয়াতিত তাম্মাতি ওয়াসসালাতিল কাইমাতি আতি মুহাম্মাদানিল ওয়াসীলাতা ওয়ালফাযীলাতা ওয়াদ্দারাজাতার রাফিয়াতা ওয়াবআসহু মাকামাম মাহমুদানিল্লাযী ওয়া আদতাহু। ইন্নাকা লা তুখলিফুল মীয়াদ।

মুয়াজ্জিন প্রতিদিন পাঁচবার আযান দেন। রেডিও-টেলিভিশনে আযান প্রচার করা হয়। আমরা তা মনোযোগ দিয়ে শুনব। আমরা আযান শুনে সালাতের জন্য তৈরি হব। সময়মতো সালাত আদায় করব।

### ইকামত ( اِقَامَةٌ )

আযান হলো সালাতের আহ্বান। আর ইকামত হলো জামাত শুরুর ঘোষণা। ইকামতের সাথে সাথে জামাতা শুরু হয়। ইকামতে আযানের বাক্যগুলোই বলতে হয়। শুধু হাইয়া আলাল ফালাহ বলার পর—

ক্বাদ কামাতিস সালাহ      قَدْ قَامَتِ الصَّلَاةُ

ক্বাদ কামাতিস সালাহ      قَدْ قَامَتِ الصَّلَاةُ

দুইবার বলতে হয়। এর অর্থ সালাত শুরু হলো।

### তাশাহুদ ( تَشَهُدٌ )

সালাতে দুই রাকআতের পর এবং শেষ বৈঠকে একটা দোয়া পড়তে হয়। এটিকে তাশাহুদ বলে। দোয়াটি হলো :

اَللّٰحِيَّاتُ لِلّٰهِ وَالصَّلٰوٰتُ وَالطَّيِّبٰتُ - اَلسَّلَامُ عَلَیْكَ اَیُّهَا النَّبِیُّ وَرَحْمَةُ اللّٰهِ  
وَبَرَكَاتُهُ - اَلسَّلَامُ عَلَیْنَا وَعَلٰی عِبَادِ اللّٰهِ الصّٰلِحِیْنَ - اَشْهَدُ اَنْ لَا اِلهَ اِلَّا اللّٰهُ  
وَ اَشْهَدُ اَنَّ مُحَمَّدًا عَبْدُهُ وَرَسُوْلُهُ -

**উচ্চারণ:** আন্তাহিয়াতু লিল্লাহি ওয়াস সালাওয়াতু ওয়াততায়্যিবাতু। আসসালামু আলাইকা আইয়্যুহান নাবিয়্যু ওয়া রাহমাতুল্লাহি ওয়া বারাকাতুহু। আসসালামু আলাইনা ওয়া আলা ইবাদিল্লাহিস সালিহীন। আশহাদু আল্-লা ইলাহা ইল্লাল্লাহু ওয়া আশহাদু আন্না মুহাম্মাদান আবদুহু ওয়া রাসুলুহু।

**অর্থ :** আমাদের সব সালাম, শ্রদ্ধা, আমাদের সব সালাত এবং সব পবিত্রতা একমাত্র আল্লাহ তায়ালায় জন্য। হে নবি! আপনার প্রতি সালাম, আপনার উপর আল্লাহর রহমত এবং অনুগ্রহ বর্ষিত হোক। আমাদের ও আল্লাহর নেক বান্দাদের উপর আল্লাহর শান্তি বর্ষিত হোক। আমি সাক্ষ্য দিচ্ছি যে, আল্লাহ ছাড়া কোনো মাবুদ নেই। আরও সাক্ষ্য দিচ্ছি যে, হযরত মুহাম্মদ (স) আল্লাহর বান্দা এবং রাসুল।

## দরুদ

সালাতে তাশাহহুদের পর দরুদ পড়তে হয়। দরুদ হলো—

আল্লাহুন্মা সাল্লি আলা মুহাম্মাদিওঁ ওয়া আলা আলি  
মুহাম্মাদিন কামা সাল্লাইতা আলা ইবরাহীমা  
ওয়াআলা আলি ইবরাহীমা ইন্বাকা হামিদুম মাজ্জীদ  
আল্লাহুন্মা বারিক আলা মুহাম্মাদিওঁ ওয়াআলা আলি  
মুহাম্মাদিন কামা বারাকতা আলা ইবরাহীমা  
ওয়াআলা আলি ইবরাহীমা ইন্বাকা হামিদুম মাজ্জীদ

اللَّهُمَّ صَلِّ عَلَى مُحَمَّدٍ وَعَلَى آلِ  
مُحَمَّدٍ كَمَا صَلَّيْتَ عَلَى إِبْرَاهِيمَ  
وَعَلَى آلِ إِبْرَاهِيمَ إِنَّكَ حَمِيدٌ مَّجِيدٌ  
اللَّهُمَّ بَارِكْ عَلَى مُحَمَّدٍ وَعَلَى آلِ  
مُحَمَّدٍ كَمَا بَارَكْتَ عَلَى إِبْرَاهِيمَ  
وَعَلَى آلِ إِبْرَاهِيمَ إِنَّكَ حَمِيدٌ مَّجِيدٌ

**অর্থ:** হে আল্লাহ! দয়া ও রহমত কর হযরত মুহাম্মদ (স)-এর প্রতি এবং তাঁর বংশধরদের প্রতি যেমন তুমি রহমত নাজিল করেছ হযরত ইবরাহীম (আ) ও তাঁর বংশধরদের উপর। নিশ্চয়ই তুমি অতি উত্তম গুণের আধার এবং মহান। হে আল্লাহ! বরকত নাজিল কর হযরত মুহাম্মদ (স) এবং তাঁর বংশধরদের উপর যেমন তুমি হযরত ইবরাহীম (আ) এবং তাঁর বংশধরদের উপরে করেছ। নিশ্চয়ই তুমি অতীব সৎগুণবিশিষ্ট ও মহান।

## দোয়া মাসুরা

কুরআন-হাদিসে বর্ণিত দোয়াগুলোকে দোয়া মাসুরা বলা হয়। সালাতে দোয়া মাসুরা পড়া ভালো। মহানবি (স) সালাতে দোয়া মাসুরা পাঠ করতেন। সালাতে দরুদের পর এই দোয়া মাসুরাটি পড়া হয়।

আল্লাহুন্মা ইন্নি য়ালামতু নাফসী যুলমান কাসীরাওঁ  
ওয়ালা ইয়াগফিরুয যুনূবা ইল্লা আনতা ফাগফিরলী  
মাগফিরাতাম মিন ইনদিকা ওয়ারহামনী ইন্বাকা  
আনতাল গাফুরুর রাহীম।

اللَّهُمَّ إِنِّي ظَلَمْتُ نَفْسِي ظُلْمًا كَثِيرًا  
وَلَا يَغْفِرُ الذُّنُوبَ إِلَّا أَنْتَ فَاعْفِرْ لِي  
مَغْفِرَةً مِّنْ عِنْدِكَ وَارْحَمْنِي إِنَّكَ  
أَنْتَ الْعَفُورُ الرَّحِيمُ۔

**অর্থ:** হে আল্লাহ! আমি আমার নিজের উপর অধিক পরিমাণে জুলুম করেছি। তুমি ছাড়া আমার অপরাধ ক্ষমা করার ক্ষমতা কারো নেই। (অতএব আমি আমার অপরাধসমূহের জন্য তোমার নিকটই ক্ষমা প্রার্থনা করছি)। আমার উপর রহমত বর্ষণ কর, আমার উপর অনুগ্রহ কর। নিশ্চয়ই তুমি অত্যন্ত ক্ষমাশীল ও দয়াময়।

## সালাম- سَلَامٌ

সালাতের শেষ গুরুত্বপূর্ণ কাজটি হলো সালাম। দোয়া মাসুরা পড়ার পর প্রথমে ডানে ও পরে বামে সালাম ফেরাতে হয়। সালামের বাক্যটি হলো :

আসসালামু আলাইকুম ওয়া রহমাতুল্লাহ **السَّلَامُ عَلَيْكُمْ وَرَحْمَةُ اللَّهِ**

**অর্থ :** তোমাদের উপর শান্তি ও আল্লাহর রহমত বর্ষিত হোক।

## মুনাজাত- مُنَاجَاةٌ

আল্লাহ তায়ালার কাছে আবেদন-নিবেদন, কাকুতি-মিনতি করাকে মুনাজাত বা দোয়া বলে। প্রত্যেক ফরজ সালাত শেষে মুনাজাত কবুল হওয়ার একটি উপযুক্ত সময়। এ সময় যে কোনো ভালো দোয়া করা যায়। কুরআন মজিদ ও হাদিস শরিফে অনেক মুনাজাত আছে। একটি সঞ্ক্ষিপ্ত এবং সুন্দর মুনাজাত হলো:

রব্বানা আতিনা ফিদদুনইয়া হাসানাতাওঁ ওয়াফিল **رَبَّنَا آتِنَا فِي الدُّنْيَا حَسَنَةً وَفِي**

আখিরাতি হাসানাতাওঁ ওয়াকিনা আযাবান নার। **الْآخِرَةِ حَسَنَةً وَقِنَا عَذَابَ النَّارِ۔**

**অর্থ:** হে আমাদের প্রতিপালক, আমাদের এ দুনিয়ায় কল্যাণ দাও আর আখিরাতেও কল্যাণ দাও এবং দোযখের শাস্তি থেকে আমাদের রক্ষা কর। - সূরা বাকারা-২০১



নামাজ শেষে মুনাজাত করছে

## সালাত- صَلَاةٌ

সবচেয়ে গুরুত্বপূর্ণ ইবাদত হলো সালাত বা নামায। সালাতের কতকগুলো নিয়ম আছে। এই নিয়মগুলো পালন করা ফরজ।

## সালাতের আহকাম- أَحْكَامُ الصَّلَاةِ

সালাত শুরুর আগে সাতটি ফরজ কাজ করতে হয়। এগুলোকে বলে সালাতের আহকাম। আহকাম ঠিকমতো পালন না করলে সালাত আদায় হয় না।

- ১। শরীর পাক হওয়া ২। কাপড় পাক হওয়া ৩। সালাতের জায়গা পাক হওয়া
- ৪। সতর ঢাকা ৫। কিবলামুখী হওয়া ৬। নিয়ত করা
- ৭। সময়মতো সালাত আদায় করা।

## সালাতের ওয়াক্ত - أَوْقَاتُ الصَّلَاةِ

সময়মতো সালাত আদায় করা আল্লাহ তায়ালার আদেশ। সময়মতো আদায় না করলে সালাত আদায় হয় না। মহান আল্লাহ বলেন, “ সঠিক সময়ে সালাত আদায় করা মুমিনের জন্য ফরজ।” সালাতের নির্দিষ্ট সময় হলো :

ফজর	রাত শেষে পূর্ব আকাশে সাদা আভা দেখা দিলে ফজর শুরু হয়। সূর্য উঠার পূর্ব মুহূর্তে তা শেষ হয়।
যোহর	দুপুরে সূর্য পশ্চিমে নামতে আরম্ভ করলে যোহর শুরু হয়। আর কোনো কাঠির ছায়া সে কাঠির মূলছায়া বাদে তার দ্বিগুণ হলে তা শেষ হয়।
আসর	যোহর শেষ হওয়ার সাথে সাথে আসর শুরু হয়। সূর্য ডোবার পূর্বে তা শেষ হয়।
মাগরিব	সূর্য ডোবার পর মাগরিব শুরু হয়। পশ্চিম আকাশে আলোর লাল আভা মুছে যাওয়ার সাথে সাথে তা শেষ হয়।
এশা	মাগরিব শেষ হওয়ার পর এশা শুরু হয়। ফজরের পূর্ব পর্যন্ত এশার সালাতের সময় থাকে। তবে মধ্য রাতের পূর্বে এশার সালাত পড়া ভালো।

## সালাতের আরকান- أَرْكَانُ الصَّلَاةِ

সালাতের ভিতরে সাতটি ফরজ কাজ আছে। এগুলোকে সালাতের আরকান বলে। যথা:

- ১। তাকবির-ই-তাহরিমা বা আল্লাহু আকবর বলে সালাত শুরু করা।
- ২। কিয়াম অর্থাৎ দাঁড়িয়ে সালাত আদায় করা। তবে কোনো কারণে দাঁড়াতে অক্ষম হলে বসে, এমনকি শুয়েও সালাত আদায় করা যায়।
- ৩। কিরাত অর্থাৎ কুরআন মজিদের কিছু অংশ তিলাওয়াত করা।
- ৪। রুকু করা।
- ৫। সিজদাহ করা।
- ৬। শেষ বৈঠকে বসা।
- ৭। সালাম-এর মাধ্যমে সালাত শেষ করা।

এর কোনো একটি বাদ পড়লে সালাত আদায় হয় না। তাই এগুলো আদায়ের ব্যাপারে আমরা খুবই সাবধান থাকব।

## সালাত আদায়ের নিয়ম

সালাত সবচেয়ে বড় ইবাদত। মহানবি (স) যেভাবে সালাত আদায় করতেন আমরাও সেভাবে সালাত আদায় করব। আমরা সালাত আদায়ের জন্য দাঁড়াব। আমাদের মুখ থাকবে পবিত্র কিবলার দিকে। আমরা পাকসাফ হয়ে সারা জাহানের বাদশাহ আল্লাহ তায়ালার দরবারে হাজির হব। সালাতে যা যা পড়বো তার অর্থ জেনে নেব।



কিবলামুখী হয়ে সালাতে দাঁড়ানো অবস্থায়

সর্বপ্রথম বলব : আল্লাহু আকবর— **الله أكبر**

অর্থ: আল্লাহ সবচেয়ে বড়।

মুখে এ বিরাট অঙ্গীকার করে পৃথিবীর যাবতীয় জিনিস হতে নিজের সম্পর্ক ছিন্ন করব। প্রতীক হিসেবে কান পর্যন্ত দুই হাত তুলব। এরপর সারা জাহানের বাদশাহর সামনে আল্লাহু আকবর বলে হাত বেঁধে দাঁড়াব।



তাকবিরে তাহরিমার দৃশ্য

এরপর বিনয় সহকারে সানা পড়ব। সানা হলো—

সুবহানালা আল্লাহুম্মা ওয়াবিহামদিকা ওয়া তাবারাকাসমুক ওয়াতায়াল্লা জাদ্দুকা ওয়া লা ইলাহা গাইরুকা।

এরপর আউযু বিল্লাহি মিনাশ শায়তনির রাজিম এবং বিসমিল্লাহির রাহমানির রাহীম পড়ব।

তারপর সূরা ফাতিহা পাঠ করে অন্য কোনো সূরা বা সূরার অংশ পাঠ করব। আল্লাহু আকবর বলে রুকু করব। রুকুতে তিনবার সুবহানা রাব্বিয়াল আযীম পড়ব। সামি আল্লাহু লিমান হামিদাহ বলে সোজা হয়ে দাঁড়াব। দাঁড়ানো অবস্থায় রব্বানা লাকাল হামদ বলব। এরপর আল্লাহু আকবর বলে সিজদাহ করব।

এরপর আল্লাহু আকবর বলে সোজা হয়ে দাঁড়াব। সূরা ফাতিহা পাঠ করে অন্য কোনো সূরা পাঠ করব। পরে প্রথম রাকআতের মতো বুকু সিজদাহ করে স্থির হয়ে বসব। তাশাহুদ, দরুদ ও দোয়া মাসূরা পাঠ করব। এরপর প্রথমে ডান দিকে মুখ ফিরিয়ে আসসালামু আলাইকুম ওয়া রহমাতুল্লাহ, পরে বাম দিকে মুখ ফিরিয়ে বলব আসসালামু আলাইকুম ওয়া রহমাতুল্লাহ। এভাবে দুই রাকআত বিশিষ্ট সালাত আদায় করব।



সালাম ফেরানোর দৃশ্য

যদি তিন বা চার রাকআত বিশিষ্ট সালাত হয় তবে আবদুহু ওয়া রাসূলুহু পর্যন্ত পড়ে আর বসব না। আল্লাহু আকবর বলে উঠে দাঁড়াব। তারপর আগের মতো তৃতীয় ও চতুর্থ রাকআত পড়ব। তবে ফরজ সালাতের ক্ষেত্রে তৃতীয় ও চতুর্থ রাকআতে শুধুমাত্র সূরা ফাতিহা পাঠ করব। মহানবি (স) জামাআতের সাথে সালাত আদায় করতেন। আমরাও জামাআতের সাথে সালাত আদায় করব।



ফরজ সালাতের আগে চার রাকআত কাবলাল জুমুআ সালাত পড়া সুন্নত। ফরজের পর চার রাকআত বাদাল জুমুআ সালাত পড়াও সুন্নত। এ ছাড়া সময় পেলে নফল সালাত পড়াও উত্তম।

জুমুআর সালাত যোহরের ওয়াক্তেই জামাআতে আদায় করতে হয়। জামাআত ছাড়া জুমুআর ফরজ আদায় হয় না।

জুমুআর জন্য দুটি আযান দেওয়া হয়। প্রথম আযান মিনারায় বা মসজিদের বাইরে দিতে হয়। ইমাম সাহেব খুতবা দিতে মিম্বারে বসলে দ্বিতীয় আযান দিতে হয়। এরপর ইমাম মিম্বারে দাঁড়িয়ে দুটি খুতবা দেন। খুতবা অর্থ বক্তৃতা। খুতবায় ইসলামের বিভিন্ন বিষয় আলোচনা করা হয়।

খুতবা শোনা ওয়াজিব। এ সময় কথা বলা বা অন্য কিছু করা যায় না। এমনকি সালাত আদায় করাও নিষেধ।

খুতবা শেষে ইমামের সাথে দুই রাকআত ফরজ সালাত আদায় করতে হয়। ফরজের আগে নিয়ত করব, “আমি কিবলামুখি হয়ে আল্লাহর ওয়াক্তে দুই রাকআত জুমুআর ফরজ সালাত এই ইমামের সাথে পড়ার নিয়ত করলাম আল্লাহু আকবর।” তবে নিয়ত মুখে উচ্চারণ করা বা পড়া আবশ্যিক নয়।

জুমুআর সালাত মোট দশ রাকআত। চার রাকআত কাবলাল জুমুআ সুন্নত। দুই রাকআত ফরজ। চার রাকআত বাদাল জুমুআ সুন্নত।

## ঈদের সালাত

ঈদ হলো খুশির দিন। বিশ্বের মুসলিমগণ দুটি ঈদ উৎসব করেন। একটি রোযার শেষে ঈদুলফিতর। আরেকটি হলো কুরবানির ঈদ বা ঈদুলআযহা। ঈদের দিন সারা এলাকার মুসল্লিগণ ঈদগাহে একত্রিত হন। দুই রাকআত ঈদের সালাত আদায় করে আল্লাহর প্রতি কৃতজ্ঞতা প্রকাশ করেন। ঈদের সালাত পড়া ওয়াজিব।

## ঈদুলফিতর

পবিত্র রমযান মাসে সিয়াম সাধনার পর শাওয়াল মাসের প্রথম দিন হলো ঈদুলফিতর এর দিন। ঈদ অর্থ আনন্দ। ফিতর অর্থ রোযা ভঙ্গ করা। দীর্ঘ একমাস রোযা রাখার তাওফিক দানের জন্য মুসলিমগণ এদিন আল্লাহর প্রতি কৃতজ্ঞতা প্রকাশ করেন। এটি নিছক আনন্দ উৎসবের দিন নয়।

এদিন পাড়া-প্রতিবেশী, গরিব-দুঃখীর খোঁজখবর নিতে হয়। বিধবা, ইয়াতীম, সকলের মুখে সাধ্যমতো হাসি ফুটানোর চেষ্টা করতে হয়। ধনীদের উপর এ দিন সাদকায়ে ফিতর আদায় করা ওয়াজিব। কারণ আনন্দের দিন যাতে কেউ অভুক্ত না থাকে। ঈদের দিনে রোযা রাখা হারাম।

**ঈদের দিনের সুন্নত:** সকালে গোসল করা, খুশবুমাখা, পরিষ্কার কাপড় পরা, মিষ্টি জাতীয় কিছু খাওয়া, ঈদের সালাত মাঠে আদায় করা।

ইমামের সাথে দুই রাকআত ঈদুলফিতরের সালাত আদায় করা ওয়াজিব। এতে ছয়টি অতিরিক্ত ওয়াজিব তাকবির দিতে হয়।

### ঈদের সালাত আদায় করার নিয়ম

প্রথমে কাতার করে ইমামের পিছনে দাঁড়াব। নিয়ত করব। আল্লাহু আকবর বলে কান পর্যন্ত হাত উঠিয়ে তাহরিমা বাঁধব। সানা পাঠ করব। এরপর কান পর্যন্ত হাত উঠিয়ে ইমামের সাথে তিন তাকবির দিব। প্রথম দুইবার হাত না বেঁধে ছেড়ে রাখব। তৃতীয় তাকবির দিয়ে সালাতে হাত বাঁধার মতো দুই হাত বাঁধব। এরপর ইমাম সাহেব অন্যন্য সালাতের মতো সূরা ফাতিহা ও যে কোনো সূরা পাঠ করবেন এবং যথারীতি বুকু সিজদাহ করে প্রথম রাকআত শেষ করবেন। অতঃপর দ্বিতীয় রাকআতে ইমাম সাহেব সূরা ফাতিহা ও যে কোনো সূরা পাঠ করবেন। এরপর তিন তাকবির দিবেন। আমরাও তিনবার আল্লাহু আকবর বলব। তিনবারই কান পর্যন্ত হাত উঠিয়ে নামিয়ে রাখব, হাত বাঁধব না। পরে চতুর্থবার আল্লাহু আকবর বলে বুকু করব।

এরপর অন্যন্য সালাতের মতো সিজদাহ করব, তশাহুদ, দরুদ, দোয়া মাসুরা পাঠ করে ইমামের সাথে সালাম ফিরাব। সালাত শেষে ইমাম সাহেব দুইটি খুতবা দেবেন। খুতবা শোনা ওয়াজিব।

**পরিকল্পিত কাজ :** শিক্ষার্থীরা ঈদুলফিতর-এর দিনের করণীয় কাজগুলোর একটি তালিকা তৈরি করবে।

### ঈদুলআযহা

দ্বিতীয় ঈদ হলো ঈদুলআযহা বা কুরবানির ঈদ। ইসলামের দৃষ্টিতে এটি গুরুত্বপূর্ণ দিন। আল্লাহর নির্দেশে এদিন হযরত ইবরাহীম (আ) নিজপুত্র হযরত ইসমাঈল (আ)-কে আল্লাহর নির্দেশে কুরবানি করতে তৈরি হন। তাঁর এ ত্যাগের স্মৃতি স্বরূপ মুসলমানের উপর

কুরবানি ওয়াজিব করা হয়েছে।

যিলহজ মাসের দশম তারিখ ঈদুলআযহার দিন। ঈদুলফিতরের মতো এদিনও গোসল করে খুশবু মেখে পরিষ্কার কাপড় পরে ঈদগাহে একই নিয়মে দুই রাকআত ওয়াজিব সালাত আদায় করতে হয়। সালাত শেষে ইমাম দুইটি খুতবা দেবেন। খুতবা শোনা ওয়াজিব। এদিন সালাতের আগে কিছু না খাওয়া ভালো। রাস্তায় জোরে জোরে তাকবির পড়া সুনুত।

ঈদের তাকবির হলো: আল্লাহু আকবর আল্লাহু আকবর, লা ইলাহা ইল্লাল্লাহু ওয়াল্লাহু আকবর, আল্লাহু আকবর, ওয়া লিল্লাহিল হামদ।

যিলহজ মাসের নবম তারিখ ফজর থেকে তের তারিখ আসর পর্যন্ত ফরজ সালাত শেষে এই তাকবির পড়া ওয়াজিব। ঈদুলফিতরের দিন এই তাকবির আস্তে আস্তে পড়তে হয়।

সালাত শেষে কুরবানি করতে হয়। কুরবানির গোশত তিন ভাগ করে একভাগ নিজের জন্য রাখব, একভাগ আত্মীয়দের মাঝে বিতরণ করব, আরেক ভাগ গরিবদের মাঝে বণ্টন করব। এভাবে ঈদের খুশিতে সবাই শরিক হতে পারে। এতে সমাজে মধুর সম্পর্ক স্থাপিত হয়।

আমরা ঈদের এ মহান শিক্ষা নিজেদের জীবনে বাস্তবায়িত করব। সবার সঙ্গে মিলেমিশে ঈদের আনন্দ উপভোগ করব। ঈদের এ শিক্ষাকে সমাজে ছড়িয়ে দেব।

## অনুশীলনী

### নৈব্যক্তিক প্রশ্ন

#### ক. বহু নির্বাচনী প্রশ্ন:

সঠিক উত্তরের পাশে টিক (✓) চিহ্ন দাও

১। ওযুর ফরজ কয়টি?

ক. ৩টি

খ. ৪টি

গ. ৫টি

ঘ. ৬টি

২। সালাতের আরকান কয়টি?

- |        |        |
|--------|--------|
| ক. ৭টি | খ. ৬টি |
| গ. ৫টি | ঘ. ৪টি |

৩। সালাতের আহকাম কয়টি?

- |        |        |
|--------|--------|
| ক. ৪টি | খ. ৫টি |
| গ. ৬টি | ঘ. ৭টি |

৪। সালাত কয় ওয়াক্ত?

- |              |              |
|--------------|--------------|
| ক. ৬ ওয়াক্ত | খ. ৭ ওয়াক্ত |
| গ. ৫ ওয়াক্ত | ঘ. ৩ ওয়াক্ত |

৫। সালাতে দরুদ কখন পড়তে হয়?

- |                      |                      |
|----------------------|----------------------|
| ক. দাঁড়ানো অবস্থায় | খ. সিঁজদাহ্ অবস্থায় |
| গ. বুকুতে            | ঘ. শেষ বৈঠকে         |

খ. শূন্যস্থান পূরণ কর :

- ক. পবিত্রতা ----- অঙ্গ।
- খ. তাহারাত অর্থ -----।
- গ. সালাতের আগে ----- করতে হয়?
- ঘ. ওয়ু ছাড়া ----- হয় না।
- ঙ. জুমুআর ----- রাকআত সালাত ফরজ।

গ. রেখা টেনে মেলাও :

- |                                   |             |
|-----------------------------------|-------------|
| ১) আল্লাহ ছাড়া কারো              | চারটি       |
| ২) পবিত্রতা ইমানের                | সালাত       |
| ৩) ওয়ুর ফরজ                      | আনন্দ       |
| ৪) সবচেয়ে গুরুত্বপূর্ণ ইবাদত হলো | অঙ্গ        |
| ৫) ঈদ অর্থ                        | ইবাদত কর না |

**সংক্ষেপে উত্তর দাও:**

১. পঁচ ওয়াক্ত সালাতের নাম লেখ।
২. তাহরাত সম্পর্কে মহানবি (স) কী বলেন?
৩. আসসালাতু খাইরুম মিনান নাওম এর অর্থ কী?
৪. মাগরিব নামাযের ওয়াক্ত কখন শুরু ও শেষ হয়?
৫. ঈদের দিনের সুন্নত কাজগুলো কী কী?

**বর্ণনামূলক প্রশ্ন:**

১. ইবাদত শব্দের অর্থ কী? ইবাদত কাকে বলে?
২. ওয়ুর ফরজ কয়টি ও কী কী?
৩. গোসলের ফরজ কয়টি ও কী কী?
৪. আযানের গুরুত্ব বর্ণনা কর।
৫. সালাতের আহকাম কয়টি ও কী কী লেখ।
৬. সালাতের আরকান কয়টি ও কী কী?
৭. সালাতের সামাজিক গুণাবলি বর্ণনা কর।
৮. ঈদের সালাত আদায়ের নিয়ম লেখ।
৯. ঈদের সালাতের সামাজিক তাৎপর্য লেখ।

## তৃতীয় অধ্যায়

### আখলাক (الْأَخْلَاقُ)

মানুষের স্বভাব ও চরিত্রকে আরবিতে আখলাক বলে। চরিত্র ভালো হলে জীবন সুন্দর হয়। সুখের হয়। আখিরাতে শান্তি পাওয়া যায়। সুখ পাওয়া যায়। সুন্দর ও ভালো চরিত্রই সচ্চরিত্র। যেমন সত্য কথা বলা। রোগীর সেবা করা। আব্বা-আম্মাকে সম্মান করা। প্রতিবেশীর সাথে ভালো ব্যবহার করা।

মন্দ স্বভাব ও খারাপ চরিত্রকে অসচ্চরিত্র বলা হয়। চরিত্র অসৎ হলে কেউ তাকে ভালোবাসে না। সকলে ঘৃণা করে। তার সাথে কেউ মেলামেশা করে না। খেলা করে না। আল্লাহ তাকে অপছন্দ করেন। মন্দ স্বভাব ও খারাপ চরিত্র হলো মিথ্যা কথা বলা, লোভ করা, অপচয় করা, পরনিন্দা করা ইত্যাদি।

আমাদের মহানবি (স) ছিলেন উত্তম চরিত্রের অধিকারী। আল্লাহ তায়ালা বলেন, “নিশ্চয়ই তোমাদের জন্য আল্লাহর রাসুলের মধ্যে রয়েছে উত্তম আদর্শ।”

মহানবি (স) বলেন, “সত্যিকার মুমিন তারাই, যাদের চরিত্র সুন্দর।”

নিচে সচ্চরিত্র এবং অসচ্চরিত্রের একটি তালিকা দেওয়া হলো :

	সচ্চরিত্রের তালিকা		অসচ্চরিত্রের তালিকা
১	আব্বা-আম্মার সাথে ভালো ব্যবহার করা	১	আব্বা-আম্মার সাথে খারাপ ব্যবহার করা
২	শিক্ষককে সম্মান করা	২	লোভ করা
৩	বড়দের সম্মান করা	৩	অপচয় করা
৪	ছোটদের স্নেহ করা	৪	পরনিন্দা করা
৫	সত্য কথা বলা ও ওয়াদা পূরণ করা	৫	অহংকার করা
৬	সালাত আদায় করা	৬	সালাত আদায় না করা

আমরা চরিত্র সুন্দর করব। সকলে আমাদের ভালোবাসবে। আল্লাহ আমাদের উপর খুশি হবেন। দুনিয়াতে আমরা শান্তি পাব। পরকালে পাব জান্নাত।

আমরা সর্বদা—

ইমান আনব, সালাত আদায় করব।  
আব্বা-আম্মা, শিক্ষক ও বড়দের সম্মান করব।  
ছোটদের স্নেহ করব, সত্য কথা বলব।  
শ্রুতাব চরিত্র সুন্দর করব, শান্তি পাব।

**পরিকল্পিত কাজ :** শিক্ষার্থীরা সচ্চরিত্রের একটি তালিকা তৈরি করবে।

### আব্বা-আম্মাকে সম্মান করা

আব্বা-আম্মা আমাদের সবচেয়ে আপনজন। তাঁরা আমাদের জন্য অনেক কষ্ট করেন। স্নেহ-মমতা ও দরদ দিয়ে লালন-পালন করেন। না খেয়ে আমাদের খাওয়ান। আমাদের অসুখ-বিসুখ হলে তাঁরা সেবায়ত্ন করেন। সুস্থ না হওয়া পর্যন্ত তাঁরা আল্লাহর কাছে দোয়া করেন। আমাদের সুখে তারা সুখী হন। আনন্দ পান। আমাদের কষ্টে কষ্ট পান। দুঃখ পান। তারা সবসময় আমাদের কল্যাণ কামনা করেন। দোয়া করেন।

সবসময় আব্বা-আম্মার সাথে ভালো ব্যবহার করা আমাদের কর্তব্য। আমরা তাঁদের সম্মান করব। শ্রদ্ধা করব। তাঁদের সাথে রাগারাগি করব না। ঝগড়া-বিবাদ করব না। কর্কশ ভাষায় কথা বলব না। তাঁদের মনে কষ্ট দেব না। সব সময় হাসিমুখে কথা বলব। বাড়ি থেকে বের হওয়ার সময় আব্বা-আম্মাকে সালাম দিয়ে বের হব। আবার বাড়িতে ফিরে আসলে আব্বা-আম্মাকে সালাম জানাব। সুন্দর সুন্দর কথা বলব।

আল্লাহ তায়ালা বলেন, “**قُلْ لَهُمَا قَوْلًا كَرِيمًا** (কুল লাহুমা ক্বাওলান কারীমা)।”

**অর্থ :** তুমি আব্বা-আম্মার সাথে সুন্দর সুন্দর কথা বল।

তাঁদের ভালো খাওয়া-পরার ব্যবস্থা করব। তাঁদের অসুখ হলে সেবায়ত্ন করব। তাঁদের আদেশ-নিষেধ মেনে চলব। তাঁরা বুড়ো হয়ে গেলে তাঁদের সাথে খুব ভালো ব্যবহার করব। তাঁদের কাজে ও চলাফেরায় সাহায্য করব।

আল্লাহ বলেন, “**وَبِالْوَالِدَيْنِ إِحْسَانًا** (ওয়াবিল ওয়ালিদাইনি ইহসানা)।”

**অর্থ :** আব্বা-আম্মার সাথে উত্তম ব্যবহার করো।

আব্বা-আম্মার মৃত্যুর পর তাঁদের প্রতি আমাদের অনেক কর্তব্য রয়েছে। আব্বা-আম্মার জিম্মায় যদি কোনো ঋণ থাকে তা পরিশোধ করব। দান-খয়রাত এবং নফল ইবাদত করে তাঁদের আত্মার মাগফেরাত চাইব। মজল কামনা করব। আমরা সবসময় আব্বা-আম্মার জন্য দোয়া করব –

رَبِّ اَرْحَمْهُمَا كَمَا رَبَّيْنِي صَغِيرًا۔ (রাব্বির হামতুমা কামা রাব্বাইয়ানী সাগীরা) ।

**অর্থ :** হে আমার প্রতিপালক, আমার আব্বা-আম্মা আমাকে ছোটবেলায় যেমনি সেবাযত্নে লালন-পালন করেছেন, আপনি তাঁদের প্রতি তেমনি দয়া করুন।

মহানবি (স) বলেছেন, “মায়ের পায়ের নিচে সন্তানের জান্নাত।”

আমরা সর্বদা-

আব্বা-আম্মার কথা শুনব ও মানব।

তাঁদের শ্রদ্ধা করব, সম্মান করব।

তাঁদের অবাধ্য হব না।

তাঁদের জন্য আল্লাহর কাছে দোয়া করব।

**পরিকল্পিত কাজ:** কী কী উপায়ে আব্বা-আম্মার সম্মান করা যায়, শিক্ষার্থীরা তার একটি তালিকা তৈরি করবে।

**শিক্ষককে সম্মান করা ( اِكْرَامُ الْمُعَلِّمِ )**

আব্বা-আম্মার মতো শিক্ষক আমাদের প্রকৃত মানুষরূপে গড়ে তোলেন। তিনি আমাদের কুরআন, সালাত ও আদব-কায়দা শেখান। তিনি সৎ ও ন্যায়ের পথে চলতে শেখান। অন্যায় ও অসৎ পথে চলতে নিষেধ করেন। তিনি আমাদের আপনজন। আমরা তাঁকে শ্রদ্ধা করব।

কেমনভাবে লিখতে হয়? কীভাবে পড়তে হয়? এসব শিক্ষক আমাদের শেখান। জ্ঞান-বিজ্ঞানের নানা বিষয় আমরা তাঁর কাছে শিখি। কুরআন ও হাদিসের কথা শিখি। দেশ ও দেশের কথা শিখি। আমরা তাঁকে সম্মান করব। তাঁকে মর্যাদা দেব।

শিক্ষকের সাথে সব সময় ভালো ব্যবহার করব। তাঁর সাথে দেখা হলে তাঁকে সালাম দেব। তাঁকে ভালোমন্দ জিজ্ঞাসা করব। তিনি শ্রেণিকক্ষে যা পড়াবেন মনোযোগ দিয়ে শুনব। তাঁর সাথে সবসময় নম্রভাবে কথা বলব। তিনি শ্রেণিতে থাকা অবস্থায় যদি বাইরে যাওয়ার প্রয়োজন হয় তাহলে তাঁর অনুমতি নিয়ে যাব। তিনি অসুস্থ হলে তাঁকে দেখতে যাব।

তঁার সেবায়ত্ন করব। তঁার আদেশ-উপদেশ মেনে চলব। তঁার সাথে কখনো বেয়াদবি করব না। সব সময় তঁার কথা শুনব। তঁার জন্য আল্লাহর কাছে দোয়া করব।

আমরা ওয়াদা করব,

শিক্ষকের আদেশ-উপদেশ মানব  
তঁাকে সালাম দেব, তঁার সেবা করব  
তিনি যা শেখাবেন মন দিয়ে শিখব  
তঁাকে সম্মান করব, দোয়া করব।

**বড়দের সম্মান ও ছোটদের স্নেহ করা ( إِكْرَامُ الْكِبَارِ وَإِزْحَامُ الصِّغَارِ )**

আব্বা-আম্মা আমাদের আদর করেন। দাদা-দাদি ও নানা-নানি আদর করেন। শিক্ষক আমাদের স্নেহ করেন। যারা বয়সে বড় তঁারা আমাদের ভালোবাসেন। স্নেহ করেন। আমরা বড়দের সম্মান করব।

যেসব ছেলেমেয়েরা আমাদের উপরের শ্রেণিতে পড়ে আমরা তাদের সম্মান করব। আমাদের বাড়ির যেসব কাজের লোক বয়সে বড় আমরা তঁাদের শ্রদ্ধা করব। সম্মান করব।

যারা বয়সে বড় তাদের সাথে দেখা হলে আমরা তাদের সালাম দেব। আদবের সাথে কথা বলব। ভালো ব্যবহার করব। আদেশ-উপদেশ মেনে চলব।

আমাদের ছোট ভাইবোন আছে। নিচের শ্রেণিতে অনেক ছেলেমেয়ে পড়াশোনা করে। যারা আমাদের চেয়ে বয়সে ছোট, আমরা তাদের আদর করব। স্নেহ করব। তারা কাঁদলে মাথায় হাত বুলিয়ে দেব। কোলে নেব। ভালো কথা শেখাব। তাদের কাঁদাব না। মারব না। গালি দেব না। তাদের সালাম দেওয়া শেখাব। পড়া বলে দেব।

বাস, স্টিমার বা অন্য কোনো যানবাহনে বৃন্দ লোক উঠেন। বসার জায়গা না পেয়ে দাঁড়িয়ে থাকেন। আমরা বসে থাকলে উঠে দাঁড়াব। তঁাদের বসতে দেব। তঁারা খুশি হবেন। আমাদের জন্য দোয়া করবেন। আল্লাহ খুশি হবেন।

ফুয়াদ চতুর্থ শ্রেণিতে পড়ে। যারা তার চেয়ে বয়সে বড়, সে তাদের সালাম দেয়। শ্রদ্ধা করে। সম্মান করে। যারা তার চেয়ে বয়সে ছোট, সে তাদের আদর করে। স্নেহ করে। সকলে ফুয়াদকে ভালোবাসে।

মহানবি (স) বড়দের সম্মান করতেন। ছোটদের স্নেহ করতেন। সকলের সাথে ভালো ব্যবহার করতেন। মহানবি (স) বলেন, “যে ছোটদের স্নেহ করে না, আর বড়দের সম্মান দেখায় না, সে আমার উম্মত না।”

আমরা সর্বদা—

বড়দের শ্রদ্ধা ও সম্মান করব  
ছোটদের আদর ও স্নেহ করব  
বড়-ছোটর মধ্যে ভালো সম্পর্ক গড়ব  
আল্লাহকে খুশি রাখব।

**পরিকল্পিত কাজ:** কীভাবে বড়দের সম্মান এবং ছোটদের স্নেহ করতে হয় শিক্ষার্থীরা তা খাতায় লিখবে।

**প্রতিবেশীর সাথে ভালো ব্যবহার ( حُسْنُ السُّلُوكِ بِالْجَارِ )**

আমাদের আশেপাশে যারা বসবাস করে তারা আমাদের প্রতিবেশী। বাস, ট্রেন, লঞ্চ, স্টিমারে সহযাত্রী আমাদের প্রতিবেশী। বিভিন্ন ছাত্রাবাসে অবস্থানকারী ছাত্রছাত্রীরা একে অপরের প্রতিবেশীর মতো।

আমরা প্রতিবেশীর সাথে ভালো ব্যবহার করব। তাদের সাথে কুশল বিনিময় করব। কেউ ক্ষুধার্ত হলে তাকে খাদ্য দেব। মহানবি (স) বলেছেন, “যে নিজে পেটভরে খায় অথচ তার প্রতিবেশী ক্ষুধার্ত থাকে সে মুমিন নয়।”

প্রতিবেশী অসুস্থ হলে সেবা করব। বিপদে সাহায্য করব। তার যাতায়াতের রাস্তা বন্ধ করে দেব না। তার সুখে খুশি হব। তার কষ্টে কষ্ট পাব। যেখানে সেখানে ময়লা-আবর্জনা ফেলব না। জোরে টেলিভিশন, রেডিও-ক্যাসেট বাজাব না, যাতে প্রতিবেশীর অসুবিধা হয়।

প্রতিবেশীর সাথে ঝগড়া করব না। কষ্ট দেব না। হিংসা করব না। মিলেমিশে থাকব। তাহলে পরিবেশ সুন্দর হবে। সুখ-শান্তি বজায় থাকবে। আল্লাহ খুশি হবেন। পরকালে জান্নাত পাওয়া যাবে। আর যদি প্রতিবেশীর সাথে ঝগড়া করি, হিংসা করি তাহলে আল্লাহ অসন্তুষ্ট হবেন। দুনিয়াতে শান্তি পাব না। পরকালেও শান্তি পাব না।

মহানবি (স) বলেন, “যার অত্যাচার ও অন্যায় আচরণ থেকে তার প্রতিবেশী রক্ষা পায় না, সে জান্নাতে প্রবেশ করবে না।”

প্রতিবেশীর মৃত্যু হলে তার বাসায় যাব। বাসার সবাইকে সান্ত্বনা দেব। সহানুভূতি জানাব। জানাজায় শরিক হব। ভালো ব্যবহার করব। যদি প্রতিবেশী হিন্দু, বৌদ্ধ বা অন্য ধর্মের লোকজন হয়, তাদের সাথেও সুন্দর ব্যবহার করব। সকল প্রতিবেশীর সাথে উত্তম ব্যবহার করব। আল্লাহ খুশি হবেন। মহানবি (স) বলেন, “আল্লাহর কাছে সেই প্রতিবেশী সবচেয়ে উত্তম, যে তার প্রতিবেশীর কাছে উত্তম।”

আমরা সর্বদা—

প্রতিবেশীর সাথে ভালো ব্যবহার করব, বিপদে সাহায্য করব, অসুখ হলে সেবা করব, ঝগড়া করব না, কষ্ট দেব না, মিলেমিশে থাকব, শান্তি বজায় রাখব।

**পরিকল্পিত কাজ:** প্রতিবেশীর প্রতি যেসব কর্তব্য পালন করতে হয় শিক্ষার্থীরা তার একটি তালিকা তৈরি করবে।

**রোগীর সেবা করা ( عِيَادَةُ الْمَرِيضِ )**

আমাদের বাড়িতে আব্বা-আম্মা, দাদা-দাদি, ভাইবোন আছেন। বাড়ির আশেপাশে প্রতিবেশীরা আছেন। বিদ্যালয়ে সহপাঠীরা আছে। আত্মীয়- স্বজন ও খেলার সাথি আছে।

আমাদের মধ্যে কারও জ্বর হয়। নানা রকমের রোগ হয়। অসুখ হয়। আমরা বিভিন্ন সময়ে অসুস্থ হয়ে যাই। শরীর দুর্বল হয়ে যায়। অসহায় বোধ করি। জ্বর হলে ভীষণ খারাপ লাগে। কোনো কিছু খেতে ভালো লাগে না। তখন চিকিৎসার দরকার। ডাক্তার ডাকা দরকার। সেবাযত্নের প্রয়োজন। জ্বর হলে মাথায় পানি দেওয়া প্রয়োজন। জ্বরের মাত্রা বেশি হলে সমস্ত শরীর ভেজা কাপড় দিয়ে মুছিয়ে দিতে হবে। ডাক্তারের পরামর্শে ওষুধ খেতে হবে। রোগীর সেবা করতে হবে। ইনশাআল্লাহ রোগ ভালো হয়ে যাবে। রোগ থেকে মুক্তি পাবে।

অসুখ-বিসুখ ও রোগশোক আল্লাহর পক্ষ থেকে মুমিনের জন্য একটি পরীক্ষা। রোগীর সেবা করতে হবে। চিকিৎসার ব্যবস্থা করতে হবে। মহানবি (স) সবসময় রোগীর সেবা করতেন।

মহানবি (স) বলেছেন, “ **عُودُوا الْمَرِيضَ** ” অর্থ, তোমরা রোগীর সেবা কর।

ফুয়াদ খুব ভালো ছেলে। একবার তার আন্নার ভীষণ জ্বর হলো। বাসায় আর কেউ নেই। সে তার আন্নার চিকিৎসার জন্য ডাক্তার ডেকে নিয়ে আসলো। ডাক্তার সাহেব তার আন্মাকে



অসুস্থ মাকে সেবা করছে

পরীক্ষা করে বলল, “ফুয়াদ, তোমার আন্নার মাথায় পানি দাও। আর এই ওষুধ সময়মতো খাওয়াবে। ইনশাআল্লাহ ভালো হয়ে যাবে।” ফুয়াদ সময়মতো তার আন্মাকে ওষুধ খাওয়াল। মাথায় পানি দিল। আল্লাহর কাছে তার আন্নার আরোগ্য লাভের জন্য দোয়া করল। আল্লাহর রহমতে তার আন্মা সুস্থ হয়ে উঠলেন। ফুয়াদ আল্লাহর শোকরিয়া আদায় করল।

আমরা রোগীর সেবায়ত্ন করব, তার খোঁজখবর নেব, আল্লাহর কাছে আরোগ্যের জন্য দোয়া করব।

**পরিকল্পিত কাজ:** কী কী উপায়ে রোগীর সেবা করা যায় শিক্ষার্থীরা তা খাতায় লিখবে।

**সত্যকথা বলা (قَوْلُ الصِّدْقِ)**

সত্যকথা বলা মহৎ গুণ। যে সত্যকথা বলে তাকে সত্যবাদী বলে। সত্যবাদীকে আরবিতে সাদিক (صَادِقٌ) বলা হয়।

যে সত্যকথা বলে তাকে সকলে ভালোবাসে। সকলে বিশ্বাস করে। আল্লাহও তাকে ভালোবাসেন। সে আল্লাহর কাছে প্রিয়। পৃথিবীতে সে সকলের কাছে প্রিয় ও সম্মানিত। পরকালে সে জান্নাত লাভ করবে।

মিথ্যা সকল পাপের মূল। যে মিথ্যাকথা বলে তাকে মিথ্যাবাদী বলে। আরবিতে তাকে কাযিব ( كاذب ) বলা হয়। মিথ্যাবাদীকে কেউ ভালোবাসে না। বিশ্বাস করে না। সকলে তাকে ঘৃণা করে। অপছন্দ করে। তার বিপদে কেউ সাহায্য করে না। আল্লাহও তাকে ঘৃণা করেন। ভালোবাসেন না। পরকালে তার জন্য জাহান্নাম।

আমাদের মহানবি (স) ছোটবেলা থেকে আজীবন সকলের কাছে সত্যবাদী বলে পরিচিত ছিলেন। তিনি সবসময় সত্যকথা বলেছেন। অন্যদেরকে সত্যকথা বলতে নির্দেশ দিয়েছেন। উৎসাহ দিয়েছেন। তিনি কখনো মিথ্যা কথা বলেন নি। তাই সকলে তাঁকে সম্মান করতেন। শ্রদ্ধা করতেন।

মহানবি (স) বলেন, “ সত্য মানুষকে মুক্তি দেয়, আর মিথ্যা ধ্বংস করে। ” মহানবি (স) আরও বলেন, “ তোমরা সবসময় সত্য বলবে। কেননা সত্য পুণ্যের পথে নিয়ে যায়। আর পুণ্য জান্নাতে নিয়ে যায়। ”

### একটি ঘটনা :

একদিন মহানবি(স)-এর কাছে একজন লোক এসে বলল, ‘হে আল্লাহর নবি(স), আমি চুরি করি। মিথ্যা কথা বলি। আরও অনেক অন্যায় করি। এখন আমি এগুলো ছেড়ে দিতে চাই। বলুন, আমি প্রথমে কোনটি ছেড়ে দেব?’

মহানবি (স) বললেন, “মিথ্যা কথা বলা ছেড়ে দাও।” লোকটি মিথ্যা কথা বলা ছেড়ে দিল। আর মিথ্যা বলা ছেড়ে দেওয়ার কারণে সব অন্যায় থেকে সে বেঁচে গেল।

আমরাও সব-সময় সত্য কথা বলব, সকলের সম্মান ও আদর পাব, মিথ্যাকথা বলব না, জাহান্নাম থেকে রক্ষা পাব।

**পরিকল্পিত কাজ:** সত্য কথার সুফল এবং মিথ্যা বলার কুফল শিক্ষার্থীরা খাতায় লিখবে।

### ওয়াদা পালন করা

ওয়াদা পালন করা অর্থ কথা দিয়ে কথা রাখা। কথামতো কাজ করা। চুক্তি রক্ষা করা। কারও সাথে কোনো কথা দিলে তা রক্ষা করার নাম ওয়াদা পালন করা।

আমরা কথাবার্তায় বা কাজকর্মে কারও সাথে কোনো কথা দিয়ে থাকলে বা চুক্তি করলে তা পূরণ করব। তাহলে সবাই আমাদের বিশ্বাস করবে। ভালোবাসবে। আল্লাহও খুশি হবেন।

আল্লাহ বলেন, “হে মুমিনগণ! তোমরা ওয়াদা পূরণ কর।”

যে ওয়াদা পালন করে সে সকলের কাছে প্রিয় হয়। সম্মানিত হয়। সকলে তাকে বিশ্বাস

করে, ভালোবাসে। বিপদে পড়লে সাহায্য করে। আল্লাহ তার প্রতি খুশি থাকেন। আখিরাতে সে সুখ পায়। শান্তি পায়। জান্নাত লাভ করে।

ওয়াদা পালন না করা খুবই অন্যায়। মারাত্মক অপরাধ। যে ওয়াদা পালন করে না তাকে কেউ ভালোবাসে না। বিশ্বাস করে না। বিপদে সাহায্য করে না। সম্মান করে না। আল্লাহও তাকে ভালোবাসেন না। আখিরাতে সে কষ্ট পাবে। সে জাহান্নামে শাস্তি ভোগ করবে।

আমাদের মহানবি (স) কাউকে কোনো কথা দিলে তা রক্ষা করতেন। ওয়াদা করলে তা পালন করতেন। মহানবি (স) এবং কুরাইশদের মধ্যে হুদাইবিয়ার সন্ধি হয়েছিল। কুরাইশগণ যখন এ সন্ধি অমান্য করল তখন মহানবি (স) এ সন্ধি বাতিল করে দেন।

ওয়াদা পালন না করলে ধর্ম থাকে না। মহানবি (স) বলেন, “যে ওয়াদা পালন করে না, তার ধর্ম নেই।”

আমরা কথা দিয়ে কথা রাখব, ওয়াদা পালন করব। কথামতো কাজ করব, মানুষের ভালোবাসা লাভ করব। কখনো ওয়াদা ভঙ্গ করব না, অবিশ্বাসী হব না। আল্লাহর প্রিয় হব, জান্নাত লাভ করব।

**পরিকল্পিত কাজ :** ওয়াদা পালনের সুফল শিক্ষার্থীরা খাতায় লিখবে।

**লোভ না করা ( تَزْكُ الْجَزِي )**

যত পায় আরও চায়। বেশি বেশি চায়। এর নামই লোভ। লোভ করা পাপ। লোভ আমাদের অনেক ক্ষতি করে। অনেক অশান্তি সৃষ্টি করে। দুঃখ-কষ্ট বাড়ায়। লোভের কারণে মানুষ নানা অন্যায়ে লিপ্ত হয়। পাপ করে। সে সুখী হয় না। শান্তি পায় না।

যে লোভ করে তাকে লোভী বলে। লোভী মানুষকে কেউ ভালোবাসে না। সম্মান দেয় না। সকলে তাকে ঘৃণা করে। কেউ তার সাথে বন্ধুত্ব করে না। মেলামেশা করে না। তার বিপদে কেউ সাহায্য করে না। সে পাপী। আর এই পাপ তাকে মৃত্যুর দিকে টেনে নেয়। ধ্বংসের দিকে নিয়ে যায়। কথায় বলে- ‘লোভে পাপ, পাপে মৃত্যু।’

**একটি কাহিনী শুনব**

হযরত দাউদ (আ)-এর উপর যাবূর কিতাব নাজেল হয়েছিল। তিনি মধুর কণ্ঠে কিতাব পড়তেন। আর তা শোনার জন্য শনিবারে সমুদ্রের মাছ পর্যন্ত তীরে আসত। শনিবার তাদের মাছ ধরা নিষেধ ছিল। কিন্তু কিছু লোভী লোক সে নিষেধ অমান্য করল। তারা ঐদিন ফাঁদ

পেতে মাছ আটকে রাখল এবং পরে ধরল। অন্যায় করল। তাদের উপর আল্লাহর আজাব এল। এই লোভের কারণে তারা ধ্বংস হয়ে গেল।

আমাদের মহানবি (স)-এর মধ্যে কোনো লোভ-লালসা ছিল না। মহানবি (স) বলেন, “তোমরা লোভ থেকে সাবধান থাক। লোভ তোমাদের পূর্ববর্তী লোকদের ধ্বংস করে দিয়েছে।”

আমরা লোভ করব না, অন্যায় করব না।

ধ্বংস হব না, লোভ থেকে বিরত থাকব।

**পরিকল্পিত কাজ:** লোভ-লালসার অপকার সম্বন্ধে শিক্ষার্থীরা একটি কাহিনী খাতায় লিখবে।

**অপচয় না করা ( تَرْكُ الْإِسْرَافِ )**

অপচয় অর্থ ক্ষতি, অপব্যয়, নষ্ট। বিনা প্রয়োজনে কোনো কিছু নষ্ট করাকে অপচয় বলে। অপচয় করা বড় পাপ।

আল্লাহ বলেন, “**إِنَّ الْمُبْتَدِرِينَ كَانُوا إِخْوَانَ الشَّيْطَانِ** (ইন্নাল মুবাজ্জিরীনা কানু ইখওয়ানাশ শায়াতীন)।”

**অর্থ :** নিশ্চয়ই অপচয়কারীরা শয়তানের ভাই।

আমরা অনেক সময় অনেক জিনিস নষ্ট করি। অপচয় করি। প্রয়োজনের বেশি খাবার নিই। খেতে পারি না। ফেলে দেই। বিনা প্রয়োজনে ফুলের ও ঘরের বাতি জ্বালিয়ে রাখি। ফ্যান চালাই। পানির কল খুলে রাখি। এতে বিদ্যুৎ অপচয় হয়। পানি নষ্ট হয়। অকারণে গ্যাসের চুলা জ্বালিয়ে রাখি। মনে করি যে একটা দিয়াশলাইয়ের কাঠি বেঁচে গেল। কিন্তু এতে প্রচুর গ্যাস অপচয় হলো।

আমাদের মধ্যে অনেকে বাজি পোড়ায়। পটকা ফোটেয়। এসব অপচয়। অনেকে বিড়ি, সিগারেট খায়। এগুলো খাওয়া স্বাস্থ্যের জন্য মারাত্মক ক্ষতিকর। এগুলো খেলে ক্যান্সার হয়। টাকা-পয়সার অপচয় হয়। অনেকে দুফটামি করে খড়কুটায় আগুন দেয়। এতে অনেক সময় বিপদ ঘটে। ঘরে আগুন লাগে। দোকানে আগুন লাগে। এ সবকিছুই অপচয়।

আমরা কোনো কিছু অপচয় করব না। আমরা প্রয়োজনের বেশি কিছু করব না। নেব না। নষ্ট করব না। অপব্যয় করব না। অপচয় করা থেকে বিরত থাকব। তাহলে কম খরচ হবে। অভাব দূর হবে। সুখ-শান্তি থাকবে। ব্যক্তিগত ও জাতীয় সম্পদ রক্ষা পাবে। আল্লাহ খুশি হবেন।

আমরা কোনো জিনিস নষ্ট করব না,  
 অপচয় করব না, যথাযথ ব্যবহার করব।  
 ব্যক্তিগত ও জাতীয় সম্পদ রক্ষা করব  
 আল্লাহর হুকুম মেনে চলব।

**পরিকল্পিত কাজ:** শিক্ষার্থীরা অপচয়মূলক কাজের একটি তালিকা তৈরি করবে।

### পরনিন্দা না করা ( تَرْكُ الْغَيْبَةِ )

পরনিন্দা করা অর্থ গিবত করা, পরচর্চা করা, দুর্নাম রটানো। কারও অনুপস্থিতিতে তার দোষের কথা বলার নাম গিবত বা পরনিন্দা।

যে পরনিন্দা করে তাকে পরনিন্দুক বলে। পরনিন্দা করা হারাম। মহান আল্লাহ পরনিন্দা করতে নিষেধ করেছেন।

আল্লাহ তায়ালা বলেন, “তোমরা একে অপরের দোষ খুঁজে বেড়াবে না।”

আল্লাহ তায়ালা পরনিন্দা করাকে মৃত ভাইয়ের গোশত খাওয়ার সাথে তুলনা করেছেন। কোনো ভাই তার মৃত ভাইয়ের গোশত কখনো খেতে পারে না। এটা জঘন্যতম অপরাধ। এটা মহাপাপ।

পরনিন্দুক মহাপাপী। সে সমাজে শান্তি নষ্ট করে। আল্লাহ তাকে ঘৃণা করেন, ভালোবাসেন না। যে ব্যক্তি পরনিন্দা বা গিবত করে সে জান্নাতে যেতে পারবে না।

মহানবি (স) বলেন, “পরনিন্দাকারী জান্নাতে প্রবেশ করবে না।”

পরনিন্দা না করা সুন্দর চরিত্রের একটি বিশেষ গুণ। পরনিন্দার কারণে শত্রুতা সৃষ্টি হয়। সমাজে শত্রুতা ছড়িয়ে পড়ে। ফলে স্নেহ, মমতা, ভালোবাসা, সম্মান, শ্রদ্ধা লোপ পায়। শান্তি নষ্ট হয়।

আমরা পরনিন্দা বা গিবত করব না। কারও কুৎসা রটাব না। কারও দুর্নাম করব না। অপবাদ দেব না। পরনিন্দা থেকে বিরত থাকব। তাহলে আমাদের মাঝে অশান্তি থাকবে না। আমাদের মাঝে সুখ-শান্তি বজায় থাকবে। একটি সুন্দর সুখী সমাজ গড়ে উঠবে। আল্লাহ খুশি হবেন। দুনিয়াতে আল্লাহর রহমত লাভ করব। পরকালে জান্নাতের অনন্ত সুখ-শান্তি ভোগ করব।

আমরা-

পরনিন্দা করব না, পরনিন্দা শুনব না।  
সুন্দর জীবন গড়ব, সুন্দর সমাজ গড়ব।

## অনুশীলনী

নৈর্ব্যক্তিক প্রশ্ন

ক. বহুনির্বাচনি প্রশ্ন:

সঠিক উত্তরের পাশে টিক (✓) চিহ্ন দাও।

১) সুন্দর স্বভাব ও ভালো চরিত্রকে আরবিতে কী বলে?

ক. মুনাজাত

খ. আখলাক

গ. ইবাদত

ঘ. সালাত

২) সচ্চরিত্র কোনটি?

ক. পরনিন্দা করা

খ. লোভ করা

গ. মিথ্যা বলা

ঘ. সত্য কথা বলা

৩) সত্যিকার মুমিনের চরিত্র কেমন?

ক. সুন্দর

খ. অসুন্দর

গ. মিথ্যুক

ঘ. অসৎ

৪) বাড়ি থেকে বের হওয়ার সময় আমরা কী করব?

ক. শরীর ভালো রাখব

খ. ভালো জামাকাপড় পরব

গ. আব্বা-আম্মাকে সালাম দেব

ঘ. চিন্তা করব

৫) অসৎ চরিত্র কোনটি?

ক. রোগীর সেবা করা

খ. শিক্ষককে সম্মান না করা

গ. ইবাদত করা

ঘ. শিক্ষককে সম্মান করা



১৪) যে ওয়াদা পালন করে, সকলে তাকে কী করে?

- |                 |                |
|-----------------|----------------|
| ক. অসম্মান করে  | খ. ঘৃণা করে    |
| গ. অবিশ্বাস করে | ঘ. বিশ্বাস করে |

১৫) “যত পায় আরও চায়”-এর নাম কী?

- |           |             |
|-----------|-------------|
| ক. লোভ    | খ. অপচয়    |
| গ. শান্তি | ঘ. ভালোবাসা |

১৬) পরনিন্দা করা অর্থ কী?

- |                |                  |
|----------------|------------------|
| ক. পরোপকার     | খ. সাহায্য করা   |
| গ. পরচর্চা করা | ঘ. সহযোগিতা করা। |

খ. শূন্যস্থান পূরণ কর :

১. মন্দ স্বভাব ও খারাপ চরিত্রকে ..... চরিত্র বলা হয়।
২. মায়ের পায়ের নিচে সন্তানের .....।
৩. যাঁরা বয়সে ..... আমরা তাঁদের সালাম দেব।
৪. লোভ আমাদের অনেক ..... করে।
৫. আমরা কোনো কিছু ..... করব না।

গ. বাম পাশের কথাগুলোর সাথে ডান পাশের কথাগুলো মিল কর :

বাম পাশ	ডান পাশ
চরিত্র ভালো হলে	চলতে শেখান
আব্বা-আম্মার সাথে সুন্দর	ফেলব না
শিক্ষক সৎ ও ন্যায়ের পথে	জীবন সুন্দর হয়
যেখানে সেখানে ময়লা-আবর্জনা	তার ধর্ম নেই
যে ওয়াদা পালন করে না	ব্যবহার কর

সংক্ষেপে উত্তর দাও:

১. আমাদের মহানবি (স)-এর চরিত্র কেমন ছিল?
২. আব্বা-আম্মার সাথে কিরূপ ব্যবহার করব?
৩. শিক্ষকের সাথে দেখা হলে কী করব?
৪. দাদা-দাদি ও নানা-নানি আমাদের কী করেন?

৫. মহানবি (স) বড়দের সাথে কেমন ব্যবহার করতেন?
৬. মহানবি (স) ছোটদের কী করতেন?
৭. আমরা কাজের লোকদের সাথে কেমন ব্যবহার করব?
৮. প্রতিবেশী ক্ষুধার্ত হলে আমরা কী করব?
৯. আমরা রোগীর কী করব?
১০. সত্যবাদী কাকে বলে?
১১. সব পাপের মূল কোনটি?
১২. ওয়াদা পালন করা অর্থ কী?
১৩. যে লোভ করে তাকে কী বলে?
১৪. অপচয় অর্থ কী?
১৫. কারও অনুপস্থিতিতে তার দোষের কথা বলার নাম কী?

### বর্ণনামূলক প্রশ্ন :

১. সচ্চরিত্র কাকে বলে? উদাহরণ দাও।
২. আব্বা-আম্মার সাথে ভালো ব্যবহারের তালিকা তৈরি কর।
৩. আব্বা-আম্মার জন্য কুরআন মজিদে বর্ণিত দোয়াটি আরবিতে লেখ।
৪. বড়দের সাথে আমাদের কেমন ব্যবহার করা উচিত?
৫. শিক্ষক আমাদের কী কী শেখান?
৬. প্রতিবেশী কারা? আমরা প্রতিবেশীর সাথে কিরূপ ব্যবহার করব?
৭. ফুয়াদের আম্মার জ্বর হলে ফুয়াদ কী করেছিল?
৮. সত্যবাদীর প্রতি মানুষের ধারণা কেমন?
৯. ওয়াদা পালন করার উপকারিতা কী?
১০. লোভ মানুষের কী কী ক্ষতি করে?
১১. অপচয় থেকে বিরত থাকার জন্য আমরা কী করব?
১২. আল্লাহ পরনিন্দা না করার জন্য কী বলেছেন?

## চতুর্থ অধ্যায়

# কুরআন মজিদ শিক্ষা

কুরআন মজিদ আল্লাহর কালাম। সর্বশেষ আসমানি কিতাব। মহানবির (স) এর উপর নাজিল হয় এ কিতাব।

আমাদের জন্য কুরআন মজিদে বলে দেয়া হয়েছে আমরা দুনিয়াতে কীভাবে শান্তিতে বসবাস করব, কী কাজ করলে আখিরাতে শান্তি পাব, কীভাবে আল্লাহর ইবাদত করব, কোন কাজ অন্যায, কোন কাজে শাস্তি হবে এ সবকিছু কুরআন মজিদে আছে।

আমরা কুরআন মজিদ শুদ্ধ করে শিখব। অপরকে শিখাব। কুরআন মজিদের নির্দেশমতো চলব।

সালাতে কুরআন মজিদ তিলাওয়াত করা ফরজ। তাই তিলাওয়াত শুদ্ধ হওয়া দরকার। মহানবি (স) বলেছেন, “ তোমাদের মধ্যে সে উত্তম যে নিজে কুরআন শিখে এবং অপরকে শিখায়”।



কুরআন মজিদ

**পরিকল্পিত কাজ :** শিক্ষার্থীরা কুরআন মজিদ শিক্ষা সম্বন্ধে মহানবি (স) -এর বাণীটি খাতায় সুন্দর করে লিখবে।

## আরবি বর্ণমালা

কুরআন মজিদের ভাষা আরবি। আরবি পড়তে হয় ডান দিক থেকে। আরবিতে মোট ২৯টি হরফ বা অক্ষর আছে।

ج	ث	ت	ب	ا
জিম	ছা	তা	বা	আলিফ
ر	ذ	د	خ	ح
রা	যাল	দাল	খা	হা
ض	ص	ش	س	ز
দোয়াদ	সোয়াদ	শিন	সিন	যা
ف	غ	ع	ظ	ط
ফা	গাইন	আইন	যোয়া	তোয়া
ن	م	ل	ك	ق
নূন	মীম	লাম	কাফ	ক্বাফ
	ي	ء	ه	و
	ইয়া	হামযা	হা	ওয়াও

আরবি হরফগুলোর নাম বলো :

ا	ب	ج	د	هـ
م	ن	و	ز	ح
ر	ي	ك	ل	م
ش	ط	ق	ص	ض
ع	ك	ظ	ف	غ
و		ح	خ	د

খালি ঘরগুলোতে আরবি হরফ বসাতো

	ش			ا
ر			خ	
و		هـ		
	م		ظ	
ن		ل		ق
	ي		ح	

## হরকত

আমরা জানি যবর < যের > এবং পেশ < > -কে হরকত বলে। যেমন :

১। হরফের উপর যবর থাকলে উচ্চারণে া-কার হবে। যথা :

ا	=	আলিফ যবর আ
ب	=	বা যবর বা
ت	=	তা যবর তা

আমরা এখন যবরসহ নিচের শব্দগুলো পড়ব। যথা :

نَصَرَ = নূন যবর না, সোয়াদ যবর সা, রা যবর রা = নাসারা

دَخَلَ	كَتَبَ	فَتَحَ	خَلَقَ	نَصَرَ
وَلَدَ	طَلَعَ	ذَكَرَ	طَلَبَ	فَعَلَ

২। হরফের নিচে যের থাকলে উচ্চারণে ি-কার হবে। যথা :

بِ	=	বা যের বি
تِ	=	তা যের তি
سِ	=	সা যের সি

আমরা এখন যের সহ নিচের শব্দগুলো পড়ব। যথা:

لِيَا = লাম যের লি, মীম আলিফ যবর মা = লিমা

إِذَا	بِئَا	هِيَ	إِلَى	إِذَا
شَهَدَ	سَبَّحَ	عَلِمَ	رَجِمَ	سَلِمَ

৩। হরফের উপর পেশ থাকলে উচ্চারণে ُ - কার হবে। যথা :

بُ = বা পেশ বু  
 تُ = তা পেশ তু  
 سُ = সা পেশ সু

আমরা এখন পেশসহ নিচের শব্দগুলো পড়ব। যথা :

كُتِبَ = কাফ পেশ কু , তা যের তি, বা যবর বা = কুতিবা

هُوَ	هَبَا	كَبَا	كُمُ	هُمُ
خُلِقَ	جُبِعَ	نُصِرَ	نُصِبَ	كُتِبَ
كُرِمَ	بَعُدَ	قُرِبَ	حُسِنَ	كَثُرَ

**পরিকল্পিত কাজ:** শিক্ষার্থীরা হরকতযুক্ত আরবি বর্ণগুলো খাতায় সুন্দর করে লিখবে।

**তানবীন**

দুই যবর ُ , দুই যের ِ ও দুই পেশ ُ -কে তানবীন বলে।

তানবীনের উচ্চারণ নূনযুক্ত হয়।

এবার আমরা তানবীন সহ চার্টটি পড়ব। যথা :

جُ	شُ	تُ	بُ	أُ
رُ	ذُ	دُ	خُ	حُ
ضُ	صُ	شُ	سُ	زُ

و	و	و	و	و
و	و	و	و	و
	و	و	و	و

و	و	و	و	و	و
و	و	و	و	و	و
و	و	و	و	و	و
و	و	و	و	و	و
و	و	و	و	و	و
و	و	و	و	و	و

ا	ب	ت	ث	ج
ح	د	ذ	ر	ز
س	ش	ص	ض	ط
ظ	ع	غ	ف	ق
ك	خ	د	ذ	ر
ز	س	ش	ص	ض

### জযম

আমরা জানি জযম ৮ যুক্ত হরফকে সাকিন বলে। যথা :

اَلْ	=	আলিফ লাম যবর আল।
فِي	=	ফা ইয়া যের ফী।
قُلْ	=	ক্বাফ লাম পেশ ক্বুল।

জযম-এর আকৃতি সাধারণত ৮ এরূপ হয়। তবে ' এভাবেও লেখা হয়।

এবার আমরা জযমযুক্ত হরফের চার্টটি পড়ব :

قُلْ	كُنْ	مِنْ	فِي	قُمْ
قَلْبُ	حَدُّ	نَصْرُ	فَيْلُ	فَتْحُ

এবার খালি হরফে জযম বসাও :

حَمْدٌ	قَوْلٌ	حَرْفٌ	فِعْلٌ	إِسْمٌ
--------	--------	--------	--------	--------

**পরিকল্পিত কাজ:** শিক্ষার্থীরা জযমযুক্ত আরবি কয়েকটি শব্দ খাতায় সুন্দর করে লিখবে।

### তাশদীদ

একই হরফ পাশাপাশি দুবার উচ্চারণ করাকে তাশদীদ বলে। তাশদীদের চিহ্ন **و** এরূপ।  
যেমন :

أَنَّ = أَنْ + نَ = আলিফ নূন যবর আন, নূন যবর না = আন্না

رَبِّ = رَبٌّ + بَ = রা বা যবর রাব, বা যবর বা = রাব্বা

এবার আমরা তাশদীদসহ চারটি পড়ব:

رَبِّ	ثُمَّ	مَسَّ	حَقَّ	أَنَّ
رَبٌّ + بَ	ثُمَّ + مَ	مَسٌّ + سَ	حَقٌّ + قَ	أَنَّ + نَ

এবার এগুলো দেখ এবং খালি হরফে হরকতসহ তাশদীদ বসাও :

رَبٌّ + بَ	أَب + بَ	أَن + نَ	حَق + قَ	ثُمَّ + مَ
رَب	أَب	أَن	حَق	ثُمَّ

**পরিকল্পিত কাজ:** শিক্ষার্থীরা তাশদীদযুক্ত পাঁচটি শব্দ খাতায় সুন্দর করে লিখবে।

## মাদ্দ

কুরআন মজিদের কোনো কোনো হরফ টেনে পড়তে হয়। এই টেনে পড়াকে মাদ্দ বলে।

যথা : **حَمَّ الْمَ**

মাদ্দ-এর হরফ তিনটি। যথা: **ا-و-ى**

১। যবর-এর পরে | আলিফ থাকলে একটু টেনে পড়তে হয়। যথা :

**مَاذَا** - মা-যা

**قَالَ** - কা-লা,

২। যের-এর পরে জযমযুক্ত **ي** ইয়া থাকলে একটু টেনে পড়তে হয়। যথা :

**قِيلَ** = কী-লা.

**فِيهَا** = ফী-হা,

৩। পেশ-এর পরে জযমযুক্ত **و** ওয়াও থাকলে একটু টেনে পড়তে হয়। যথা :

**قَوْلُوا** = কু-লু,

**صُومُوا** = সু-মু,

আবার কোনো কোনো ক্ষেত্রে মাদ্দ-এর জন্য দুটি চিহ্ন ব্যবহৃত হয়। যথা :

১। ছোট মাদ্দ = **~**

২। বড় মাদ্দ = **—**

যে হরফের উপর **~** এরূপ চিহ্ন থাকে সে হরফটিকে একটু টেনে পড়তে হয়। যথা:

**بِمَاءٍ وَمَاءٍ الَّذِي لَا أَعْبُدُ**

যে হরফের উপর **—** এরূপ চিহ্ন থাকে সে হরফটিকে আরও বেশি টেনে পড়তে হয়।

যথা: **نَ . صَ . عَصَى . أَوْلِيكَ . ضَالِّينَ .**

মাদ্দ-এর আরও কিছু চিহ্ন আছে। যেমন :

১। খাড়া যবর ا

কোনো হরফের উপর ا এরূপ চিহ্ন থাকলে সে হরফটিকে একটু টেনে পড়তে হয়।

যথা: **طه** = তোয়া খাড়া যবর তোয়া, হা খাড়া যবর হা = তোয়া-হা

এবার খাড়া যবরযুক্ত কয়েকটি শব্দ পড়ব।

**أَمِنَ - ذَلِكْ - عَلَى - بَلَى - أَدَمَ -**

২। খাড়া যের ا

কোনো হরফের নিচে ا এরূপ চিহ্ন থাকলে সে হরফটিকে একটু টেনে পড়তে হয়।

যথা: **بِه** = বা যের বি, হা খাড়া যের হী = বিহী

এবার খাড়া যেরযুক্ত কয়েকটি শব্দ পড়ব:

**أَمْرَهُ ، خَيْرُهُ ، فَضْلُهُ ، صِفَاتِهِ ، أَهْلُهُ ،**

৩। উল্টা পেশ ا

আমরা জানি পেশ ا এরূপ। তবে উল্টা পেশ লেখা হয় ا এভাবে।

কোনো হরফে উল্টা পেশ থাকলে সে হরফটি একটু টেনে পড়তে হয়। যথা:

**لَا** = লাম যবর লা, হা উল্টা পেশ হু = লাহু।

এবার উল্টা পেশযুক্ত কয়েকটি শব্দ পড়ব:

**إِنَّهُ - مَعَهُ - نَفْسَهُ - رِسْوَلُهُ - رَحْمَتُهُ**

নিচের শব্দগুলো পড়ি:

**قِي - كُتِبَ - لَا - مَعَهُ -**

## তাজবীদ ( تَجْوِيدٌ )

কুরআন মজিদের ভাষা আরবি। আমাদেরকে আরবি ভাষা শিখতে হবে। আমরা আরবি হরফের সঠিক উচ্চারণ শিখব। সঠিক উচ্চারণে কুরআন মজিদ তিলাওয়াত করা প্রয়োজন। এতে অর্থ ঠিক থাকে। সালাত শূদ্ধ হয়। আল্লাহ পাক খুশি হন। আর সঠিক উচ্চারণে তিলাওয়াত না করলে অর্থ ঠিক থাকে না। সালাতও শূদ্ধ হয় না।

কুরআন মজিদ শূদ্ধভাবে তিলাওয়াতের জন্য যে নিয়ম রয়েছে তাকে তাজবীদ বলে।

মহানবি (স) বলেছেন, “কুরআন মজিদ তিলাওয়াত করলে প্রত্যেক হরফের জন্য ১০টি সাওয়াব পাওয়া যায়।”

## মাখরাজ ( مَخْرَجٌ )

আরবি হরফ মুখের বিভিন্ন স্থান থেকে উচ্চারিত হয়। যেমন, কণ্ঠনালি, জিহ্বা, তালু, দাঁত ও ঠোঁট।

হরফ উচ্চারণের স্থানকে মাখরাজ বলা হয়। আরবি হরফের মাখরাজ ১৭টি। এ সম্পর্কে আমরা বড় হলে জানতে পারব।

## ইদগাম ( اِدْغَامٌ )

কাছাকাছি উচ্চারণের দুটি হরফকে যুক্ত করে পড়াকে ইদগাম বলে। যথা:

فَهُمْ مُسْلِمُونَ = ফাহুম মুসলিমুন। এখানে মীম  হরফটি পরবর্তী মীম-এর সাথে ইদগাম হয়েছে।

مِنْ رَبِّ = মির রাব্বি। এখানে নূন  হরফটি পরবর্তী রা -এর সাথে ইদগাম হয়েছে।

مِنْ مِثْلِهِ = মীম মিসলিহী। এখানে নূন হরফটি পরবর্তী মীম-এর সাথে ইদগাম হয়েছে।

আমরা এখন নিম্নের শব্দগুলো ইদগামসহ পড়ব।

غَفُورٌ رَّحِيمٌ গাফুরুর রাহীম	مِنْ مَّرْقَدِنَا মিম মারকাদীনা	مَنْ يَقُولُ মাইয়াকুলু
وَلَمْ يَكُنْ لَهُ ওয়ালাম ইয়াকুল্লাহু	إِنْ كُنْتُمْ مُؤْمِنِينَ ইন কুনতুম মু'মিনীন	مِنْ رِّزْقٍ মিররিয্কিন

### ইযহার - اِظْهَارٌ

ইযহার শব্দের অর্থ প্রকাশ করা। বর্ণে বা হরফের মাখরাজ অনুযায়ী স্পষ্ট করে উচ্চারণ করা। নূন সাকিন এবং তানবীন-এর পর যদি হরফে হালকির যেকোনো একটি হরফ থাকে তখন নূন সাকিন বা তানবীনকে গুনাহ ও ইখফা ছাড়া নিজ মাখরাজ অনুসারে স্পষ্ট করে পড়াকে ইযহার বলে।

হরফে হালকি ৬ টি। যথা : ع-ح-خ-ع-غ

مِنْ خَوْفٍ - عَذَابِ الْيَمِّ - مَنْ هُوَ - مِنْ عَلَقٍ - عَلِيمٌ حَكِيمٌ - عَلِيمٌ خَبِيرٌ -

**পরিকল্পিত কাজ :** শিক্ষার্থীরা ইযহারের উচ্চারণের একটি চার্ট তৈরি করবে।

### আরবি বর্ণের শব্দ

নিচে ৪টি চার্ট দেয়া হলো। এগুলো সঠিক উচ্চারণে পড় :

#### চার্ট ১

مَلِكٌ	خَلَقَ	كَادَ	قَادَ	كَصَدَ	قَصَدَ
نَسْرٌ	نَصْرٌ	فَلَقٌ	فَلَكَ	حَرْبٌ	هَرْبٌ

## চার্ট-২

## চার বর্ণের শব্দ

سَرِيرٌ	شَرِيرٌ	اَلَيْمٌ	عَلِيمٌ	بَصِيرٌ	بَشِيرٌ
اَكْبَرٌ	اَقْرَبٌ	صُورَةٌ	سُورَةٌ	زَمِيلٌ	جَمِيلٌ

## চার্ট-৩

## পাঁচ বর্ণের শব্দ

تَصْفِيرٌ	تَصْوِيرٌ	تَكْرِيرٌ	تَقْرِيرٌ	مَشْكُورٌ	مَذْكُورٌ
اَشْفِيرٌ	تَشْرِيْبٌ	تَكْرِيْمٌ	تَقْدِيْمٌ	تَحْرِيْمٌ	تَكْبِيْرٌ

## চার্ট-৪

## ছয় বর্ণের শব্দ

يَأْكُلُونَ	يَقُولُونَ	يَذْكُرُونَ	يَشْكُرُونَ	مُفْلِحُونَ	مُسْلِمُونَ
مُكَالِبَةٌ	مُقَاتِلَةٌ	مُجْرِمُونَ	مُحْسِنُونَ	يَنْظُرُونَ	يَنْصُرُونَ

## সূরা আন নাসর

মাদানি, আয়াত- ৩

بِسْمِ اللَّهِ الرَّحْمَنِ الرَّحِيمِ

বিসমিল্লাহির রাহমানির রাহীম

إِذَا جَاءَ نَصْرُ اللَّهِ وَالْفَتْحُ ۝ وَرَأَيْتَ النَّاسَ يَدْخُلُونَ فِي دِينِ اللَّهِ أَفْوَاجًا ۝  
فَسَبِّحْ بِحَمْدِ رَبِّكَ وَاسْتَغْفِرْهُ ۝ إِنَّهُ كَانَ تَوَّابًا ۝

### বাংলা উচ্চারণ

ইযা জাআ নাসরুল্লাহি ওয়ালফাতহু। ওয়ারাআইতান নাসা ইযাদখুলূনা ফী দীনিল্লাহি আফওয়াজা। ফাসাব্বিহ বিহামদি রাব্বিকা ওয়াসতাগফিরহু। ইন্নাহু কানা তাওওয়াবা।

অর্থ : ১. যখন আল্লাহর সাহায্য ও বিজয় আসবে।

২. এবং তুমি মানুষকে দলে দলে আল্লাহর দীনে প্রবেশ করতে দেখবে।

৩. তখন তুমি তোমার প্রতিপালকের প্রশংসা কর, তাঁর পবিত্রতা ও মহিমা ঘোষণা কর এবং ক্ষমা প্রার্থনা কর, তিনি তো তওবা কবুলকারী।

পরিকল্পিত কাজ: শিক্ষার্থীরা সূরা আন নাসর বাংলা উচ্চারণে লিখবে।

## সূরা আল লাহাব

মক্কি, আয়াত- ৫

بِسْمِ اللَّهِ الرَّحْمَنِ الرَّحِيمِ

বিসমিল্লাহির রাহমানির রাহীম

تَبَّتْ يَدَا أَبِي لَهَبٍ وَتَبَّ ۝ مَا أَغْنَىٰ عَنْهُ مَالُهُ وَمَا كَسَبَ ۝ سَيَصْلَىٰ نَارًا إِذْ أَتَتْ  
لَهَبًا ۝ وَامْرَأَتُهُ ۝ حَمَّالَةَ الْحَطَبِ ۝ فِي جِيدِهَا حَبْلٌ مِّن مَّسَدٍ ۝

## বাংলা উচ্চারণ

তাব্বাত ইয়াদা আবি লাহাব্বিও ওয়াতাব্বা। মা আগনা আনহু মালুহু ওমাকাসাব। সাইয়াসলা নারান যাতা লাহাব্বিও ওয়ামরাতুহু, হাম্মালাতল হাতাব। ফী জীদিহা হাবলুম মিম মাসাদ।

- অর্থ : ১. ধ্বংস হোক আবু লাহাবের দুই হাত এবং ধ্বংস হোক সে নিজেও।  
 ২. এর ধন-সম্পদ ও এর উপার্জন তার কোনো কাজে আসে নি।  
 ৩. অচিরেই সে দগ্ধ হবে লেলিহান অগ্নিতে,  
 ৪. এবং তার স্ত্রীও- যে ইন্ধন বহন করে,  
 ৫. তার গলদেশে পাকানো রজ্জু।

## সূরা ইখলাস

মক্কি, আয়াত-৪

بِسْمِ اللَّهِ الرَّحْمَنِ الرَّحِيمِ

বিসমিল্লাহির রাহমানির রাহীম

قُلْ هُوَ اللَّهُ أَحَدٌ ۝ اللَّهُ الصَّمَدُ ۝ لَمْ يَلِدْ ۝  
 وَلَمْ يُولَدْ ۝ وَلَمْ يَكُنْ لَهُ كُفُوًا أَحَدٌ ۝

## বাংলা উচ্চারণ

কুল হুয়াল্লাহু আহাদ। আল্লাহুস সামাদ। লাম ইয়ালিদ; ওয়া লাম ইউলাদ। ওয়ালাম ইয়াকুল্লাহু কুফুয়ান আহাদ।

- অর্থ : ১. বলো, তিনি আল্লাহ, একক।  
 ২. আল্লাহ কারও মুখাপেক্ষী নন।  
 ৩. তাঁর কোনো সন্তান নাই এবং তিনি কারও সন্তান নন।  
 ৪. এবং তাঁর সমতুল্য কেউ নাই।

## অনুশীলনী

### নৈব্যক্তিক প্রশ্ন

#### ক. বহু নির্বাচনি:

সঠিক উত্তরের পাশে টিক (✓) চিহ্ন দাও :

#### ১. কুরআন মজিদ কার কালাম?

ক) মহানবি (স)-এর কালাম

খ) আল্লাহ তায়ালার কালাম

গ) ফেরেশতার কালাম

ঘ) মানুষের কালাম।

#### ২. হযরত মুহাম্মদ(স)-এর উপর কোন কিতাব নাজিল হয়েছিল?

ক) ইনজিল

খ) তাওরাত

গ) যাবূর

ঘ) কুরআন মজিদ।

#### ৩. মাদ্দ-এর হরফ কয়টি?

ক) তিনটি

খ) চারটি

গ) পাঁচটি

ঘ) ছয়টি।

#### ৪. হরফে হালকি কয়টি?

ক) পাঁচটি

খ) ছয়টি

গ) সাতটি

ঘ) আটটি।

#### ৫. ইদগাম-এর হরফ কয়টি?

ক) তিনটি

খ) চারটি

গ) পাঁচটি

ঘ) ছয়টি।

#### ৬. আরবি হরফের মাখরাজ কয়টি?

ক) ১১টি

খ) ১৩টি

গ) ১৭টি

ঘ) ১৯টি।

#### খ. শূন্যস্থান পূরণ কর

১. কুরআন মজিদ ..... কালাম।

২. হরফ উচ্চারণের স্থানকে ..... বলে।

৩. কুরআন মজিদের ..... আরবি।

গ. বাম দিকের শব্দের সাথে ডান দিকের চিহ্নের মিল কর :

- |           |   |
|-----------|---|
| ১. যবর    | ◌ |
| ২. যের    | ◌ |
| ৩. পেশ    | ◌ |
| ৪. জযম    | ∧ |
| ৫. তাশদীদ | ◌ |
| ৬. তানবীন | ◌ |

সংক্ষিপ্ত উত্তরের জন্য প্রশ্ন :

১. আরবি হরফ কয়টি?
২. হরকত কয়টি?
৩. মাদ্দের হরফ কয়টি?
৪. হরফে হালকি কয়টি?
৫. সাকিন কাকে বলে?

বর্ণনামূলক উত্তরের জন্য প্রশ্ন :

১. কুরআন মজিদ তিলাওয়াত সম্পর্কে মহানবি (স)-এর বাণীটি লেখ।
২. হরকত কাকে বলে? উদাহরণ দাও।
৩. তানবীন কাকে বলে? একটি করে উদাহরণ দাও।
৪. জযম কাকে বলে? উদাহরণ দাও।
৫. মাদ্দ কাকে বলে? মাদ্দ-এর হরফ কয়টি? উদাহরণ দাও।
৬. তাজবীদ কাকে বলে?
৭. মাখরাজ কাকে বলে? মাখরাজ কয়টি?
৮. ইদগাম কাকে বলে? উদাহরণ দাও।
৯. তিন, চার, পাঁচ ও ছয় বর্ণের একটি করে শব্দ লেখ।
১০. সূরা আন নাসর মুখস্থ বলো।
১১. সূরা ইখলাস মুখস্থ বলো।

## পঞ্চম অধ্যায়

# নবি ও রাসুলগণের পরিচয় ও জীবনাদর্শ

আল্লাহ তায়ালা আমাদের সৃষ্টি করেছেন। তিনি আমাদের খুব ভালোবাসেন। তাঁর ইচ্ছায় আমরা সুন্দর জীবন গড়ে তুলব। দুনিয়াতে সুখ-শান্তি পাব। আখিরাতে জান্নাত লাভ করব। জান্নাতে রয়েছে চরম শান্তি ও পরম আনন্দ।

কীভাবে আমরা সুন্দর জীবন গড়ে তুলব। কোন পথে চললে আল্লাহ খুশি হবেন? কী কাজ করলে দুনিয়াতে সুখে বসবাস করব ও শান্তিতে থাকব? এসবের সন্ধান পেয়েছি আমরা নবি-রাসুলের মাধ্যমে। নবি-রাসুল আমাদের শিক্ষক। তাঁরা আমাদের আল্লাহর ইবাদত করার নিয়মকানুন শিখিয়েছেন। সঠিক পথে জীবনযাপন করার পন্থতি শিখিয়েছেন।

আল্লাহ তায়ালা অনেক নবি-রাসুল পাঠিয়েছেন। কুরআন মজিদে ২৫ জন নবি-রাসুলের নাম উল্লেখ আছে। এদের মধ্যে হযরত আদম আলাইহিস সালাম পৃথিবীর সর্বপ্রথম মানুষ এবং প্রথম নবি। আর আমাদের মহানবি হযরত মুহাম্মদ সাল্লাল্লাহু আলাইহি ওয়াসাল্লাম সর্বশেষ ও সর্বশ্রেষ্ঠ নবি। এখন আমরা কয়েকজন নবি-রাসুলের জীবনাদর্শ জানব।

## মহানবি হযরত মুহাম্মদ (স)-এর জীবনাদর্শ

### জন্ম ও পরিচয়

মহানবি হযরত মুহাম্মদ (স) ৫৭০ খ্রিস্টাব্দে মক্কা নগরীতে কুরাইশ বংশে জন্মগ্রহণ করেন। তাঁর আব্বার নাম আব্দুল্লাহ। আন্নার নাম আমিনা। তাঁর দাদা আব্দুল মুত্তালিব তাঁর নাম রাখেন মুহাম্মদ (প্রশংসিত)। আর আন্না আমিনা তাঁর নাম রাখেন আহমাদ (প্রশংসাকারী)।

মহানবি(স) এর জন্মের আগেই তাঁর আব্বা ইত্তিকাল করেন। আর তাঁর ছয় বছর বয়সে আন্না ইত্তিকাল করেন। বাবা-মা হারা ইয়াতীম শিশুকে তখন থেকে লালন-পালন করতে থাকেন তাঁর দাদা আব্দুল মুত্তালিব। দাদার ইত্তিকালের পর তাঁর চাচা আবু তালিব তাঁর লালন-পালনের দায়িত্ব গ্রহণ করেন। তিনি মহানবি(স)-কে খুব আদর-স্নেহ করতেন।

তাঁর চরিত্র ছিল খুবই সুন্দর। শিশুকাল থেকেই তিনি সব সময় সত্য কথা বলতেন। মানুষের উপকার করতেন। বড়দের সম্মান করতেন। ছোটদের আদর করতেন। কখনো মিথ্যা কথা বলতেন না। কাউকে গালি দিতেন না। কারও সাথে ঝগড়া করতেন না।

মারামারি করতেন না। হিংসা করতেন না। সকলের সাথে মিলেমিশে থাকতেন।

সবাই তাঁকে ভালোবাসত। আদর করত। সম্মান করত। বিশ্বাস করত। আল-আমিন বলে ডাকত। আল-আমিন অর্থ বিশ্বাসী। মহানবি (স) এর মতো আমরা –

সত্যকথা বলব, মানুষের উপকার করব,  
বড়দের সম্মান করব, ছোটদের আদর করব,  
সকলকে ভালোবাসব, বিশ্বাস করব,

তাহলে মহানবি (স) আমাদের ভালোবাসবেন, আল্লাহ ভালোবাসবেন।

### হিলফুল ফুজুল গঠন

মহানবি (স) ছোটবেলা থেকেই অপরের অধিকার সম্পর্কে অত্যন্ত সজাগ ছিলেন। শিশু অবস্থায়ই তিনি অন্যের অধিকার সংরক্ষণ করেছেন। তাঁর দুধমা হালিমার একটি পুত্র সন্তান ছিল। তিনি তাঁর দুধমার একটি স্তনের দুধ নিজে পান করতেন এবং অন্য স্তনের দুধ তাঁর দুধ ভাইয়ের জন্য রেখে দিতেন। ছোটবেলা থেকেই তিনি অপরের দুঃখে দুঃখ পেতেন। অন্যের কষ্টে কষ্ট পেতেন, অন্যের ব্যথায় ব্যথিত হতেন।

তিনি অন্যায়ের প্রতিবাদ করতেন। কারও কোনো অসুবিধা হলে তা দূর করার চেষ্টা করতেন। অসহায় ও নিপীড়িত মানুষকে সাহায্য করতেন। সাধ্যমতো মানুষের সেবা করতেন।

জুয়াখেলা মারাত্মক অপরাধ। এতে সুসম্পর্ক নষ্ট হয়। শত্রুতা বাড়ে। অনেক কলহ ও মারামারি হয়। যুদ্ধবিগ্রহ ঘটে। একদা আরবদেশে ওকায মেলায় জুয়াখেলাকে কেন্দ্র করে কুরাইশ ও কায়েস বংশের মধ্যে এক ভয়াবহ যুদ্ধ সংঘটিত হয়। এ যুদ্ধ দীর্ঘ পাঁচ বছর স্থায়ী ছিল। অনেক লোক এ যুদ্ধে মৃত্যুবরণ করে। মহানবি (স) নিজে তাঁর চাচা যুবায়ের (রা)-এর সাথে এ যুদ্ধে অংশগ্রহণ করেন। তিনি শত্রুদের নিষ্ফিষ্ট তীরগুলো সংগ্রহ করে

চাচার হাতে তুলে দিতেন। এটি ‘হারবুল ফিজার’ (حَرْبُ الْفِجَارِ) বা ‘অন্যায় সমর’ নামে পরিচিত। এ ভয়াবহ যুদ্ধের দৃশ্য দেখে মহানবি (স)-এর প্রাণ কেঁদে উঠল। তিনি চিন্তা করলেন, কীভাবে দেশের শান্তিশৃঙ্খলা রক্ষা করা যায়? কীভাবে বিভিন্ন গোত্রের মধ্যে সুসম্পর্ক বজায় রাখা যায়? অসহায়দের সাহায্য করা যায়? এজন্য তিনি কয়েকজন উৎসাহী যুবককে সাথে নিয়ে একটি সেবাসংঘ গঠন করেন। আর এই সংঘের নাম রাখেন

হিলফুল ফুজুল ( حَلْفُ الْفُضُولِ ) বা শান্তিসংঘ। এই সংঘের মাধ্যমে তিনি দুঃখী ও অসহায় মানুষদের দুঃখ-কষ্ট দূর করার চেষ্টা করেন। সমাজে শান্তিশৃঙ্খলা ফিরে আসে। তখন মহানবি (স) এর বয়স ছিল মাত্র ১৫ বছর। এ সংঘ প্রায় ৫০ বছর স্থায়ী ছিল।

**পরিকল্পিত কাজ:** শিক্ষার্থীরা ‘হিলফুল ফুজুল’ –এর নীতিগুলো খাতায় লিখবে।

### নবুয়ত লাভ

মহানবি হযরত মুহাম্মদ (স) সমাজের দুর্াবস্থা দেখে দুঃখ পেতেন। কষ্ট পেতেন। মানুষের নৈতিক অধঃপতন তাঁকে বিশেষভাবে চিন্তিত করে। বয়স বাড়ার সাথে সাথে তাঁর চিন্তাভাবনাও বাড়তে থাকে। তিনি মক্কা থেকে তিন মাইল দূরে ‘হেরা’ নামক পর্বতের নির্জন গুহায় আল্লাহর ধ্যানে মগ্ন থাকতেন। তাঁর মনে নানা চিন্তা ও প্রশ্ন জাগত। তিনি ভাবতেন আমি কে? কোথা থেকে এসেছি? কেন এসেছি? আবার কোথায় যাব?



হেরাগুহা: আমাদের প্রিয় নবি (স) এই গুহায় ধ্যানমগ্ন থাকতেন।

এই পৃথিবী সৃষ্টির কী উদ্দেশ্য? মানুষ এত মারামারি, কাটাকাটি কেন করে ইত্যাদি।

এভাবে মহানবি (স)-এর ধ্যান ও ইবাদত চলতে থাকল। তাঁর বয়স ৪০ বছর হলো। রমযান মাসের কদর রাত। মহানবি (স) হেরাগুহায় ধ্যানরত। চারদিক নীরব, নিব্বুম। এমন সময় আঁধার গুহা আলোকিত হয়ে উঠল। আল্লাহর নির্দেশে ফেরেশতা জিবরাইল (আ) আল্লাহর মহান বাণী সর্বপ্রথম নিয়ে আসলেন। তিনি মহানবি (স)-কে লক্ষ্য করে বললেন, **اقْرَأْ** (ইকুরা-পড়ুন)। পড়তে বললেন, কুরআন মজিদের সূরা আলাকের প্রথম পেটি আয়াত।

### সূরা আলাকের প্রথম পাঁচটি আয়াতের অর্থ:

- ক) (হে মুহাম্মদ!) পাঠ করুন, আপনার সেই প্রতিপালকের নামে, যিনি সৃষ্টি করেছেন।
- খ) যিনি সৃষ্টি করেছেন মানুষকে জমাট রক্ত (আলাক) থেকে।
- গ) পাঠ করুন আপনার সেই মহিমাম্বিত প্রতিপালকের,
- ঘ) যিনি শিক্ষা দিয়েছেন কলমের সাহায্যে।
- ঙ) শিক্ষা দিয়েছেন মানুষকে যা সে জানত না।

এভাবে তিনি ৪০ বছর বয়সে নবুয়ত লাভ করলেন।

**পরিকল্পিত কাজ** : শিক্ষার্থীরা সূরা আলাকের প্রথম পাঁচটি আয়াতের অর্থ খাতায় লিখবে।

### মক্কায় ইসলাম প্রচার

মহানবি (স) নবুয়ত লাভের পর আল্লাহর তাওহিদ (একত্ববাদ) প্রচার করতে থাকলেন। তাওহিদ অর্থ একত্ববাদ। তিনি প্রথম তিন বছর আত্মীয়-স্বজন ও নিকটতম লোকদের কাছে গোপনে ইসলাম প্রচার করেন। তাঁর স্ত্রী হযরত খাদিজা (রা) সর্বপ্রথম ইসলাম গ্রহণ করেন। অতঃপর পুরুষদের মধ্যে হযরত আবু বকর (রা) এবং বালকদের মধ্যে হযরত আলী (রা) ইসলাম গ্রহণ করেন। প্রথম তিন বছরে ৪৫ জন নরনারী ইসলাম গ্রহণ করেন।

অতঃপর তিনি আল্লাহর নির্দেশে প্রকাশ্যে ইসলাম প্রচার শুরু করেন। অনেকেই ইসলামের সুশীতল ছায়ায় আশ্রয় নিতে থাকলেন। কিন্তু কুরাইশ বংশের অনেক নেতা তাঁর কথা মানল না। তারা মহানবি (স)-এর ঘোর শত্রু হলো। মহানবি (স)-এর উপর রেগে গেল। তাঁর উপর অত্যাচার শুরু করল। তাঁর চাচা আবু লাহাব তাঁকে পাথর ছুঁড়ে মারল। রক্তাক্ত করল।

কেউ কেউ তাঁকে পাগল বলতে লাগল। তাঁর উপর শারীরিক নির্যাতন শুরু হলো। তাঁর মাথার উপর ময়লা-আবর্জনা রাখল। চলার পথে কাঁটা বিছিয়ে দিল। তাঁর অনুসারীদের উপর নির্মম অত্যাচার শুরু করল। এভাবে তারা মহানবি (স) ও তাঁর অনুসারীদেরকে ইসলাম প্রচারে বাধা দিতে থাকল।

মহানবির (স) আল্লাহর উপর অটল বিশ্বাস ছিল। ইসলাম প্রচার করতে গিয়ে তিনি সব অত্যাচার সহ্য করলেন। সকল বাধা অতিক্রম করে তিনি ইসলাম প্রচার করলেন।

**পরিকল্পিত কাজ :** মক্কায় ইসলাম প্রচারে মহানবি (স) যেসব বাধার সম্মুখীন হয়েছিলেন শিক্ষার্থীরা তার একটি তালিকা তৈরি করবে।

### শ্রমের মর্যাদা দান

শ্রম মানে কাজ করা, পরিশ্রম করা। আমাদের মহানবি (স) সবসময় নিজের কাজ নিজেই করতেন। তিনি কখনো কাজ ফেলে রাখতেন না। কাজে অবহেলা করতেন না। নিজে কাজ করতেন। অপরকে সাহায্য-সহযোগিতা করতেন।

আমরা অনেক সময় কাজ করতে গেলে লজ্জা পাই। মনে করি যে, কাজ করলে লোকে আমাকে কাজের লোক বলবে। চাকর বলবে। ঘৃণা করবে। অসম্মান করবে। কিন্তু এ রকম মনে করা ঠিক না। বরং কাজ করলে সকলে তাকে ভালোবাসে। শ্রদ্ধা করে। স্নেহ করে। আল্লাহ তাকে ভালোবাসেন। মর্যাদা দান করেন।

মহানবি (স) ছেঁড়া জামাকাপড় নিজ হাতে সেলাই করতেন। জুতা মেরামত করতেন। জামা-কাপড় ধুয়ে পরিষ্কার করতেন। ঘর ঝাড়ু দিতেন। মেহমানকে নিজে খাওয়াতেন। সেবাযত্ন করতেন। তিনি পরিবারের অন্যদের সাথে কাজ করতেন। সকলের সাথে মিলেমিশে কাজ করতেন। কাজকে ঘৃণা করতেন না।

**একটি ঘটনা:** একদিন মহানবি (স) রাস্তা দিয়ে যাচ্ছেন। দেখতে পেলেন যে, এক বৃদ্ধ লোক বাগানে পানি দিচ্ছে। পানি ছিল বাগান থেকে অনেক দূরে। বৃদ্ধ লোকটির পানি আনতে খুব কষ্ট হচ্ছিল। লোকটি ছিল চাকর। মহানবির (স) দয়া হলো। তিনি লোকটির কষ্ট দেখে এগিয়ে গেলেন। বৃদ্ধের হাত থেকে পানির পাত্রটা নিজের হাতে নিয়ে বাগানে পানি দিলেন। বৃদ্ধ লোকটি মহানবির (স) উপর খুব খুশি হলেন।

মহানবি (স) চাকরদের সম্পর্কে বলেছেন, “যারা কাজ করে তারা তোমাদের ভাই। তাদের

কফ্ট দেবে না। মর্যাদা দেবে। নিজে যা খাবে তাদের তা খাওয়াবে। নিজে যা পরবে তাদের তা পরাবে। কাজকর্মে তাদের সাহায্য করবে।”

তিনি আরও বলেন, “শ্রমিককে তার গায়ের ঘাম শুকানোর আগেই পারিশ্রমিক দিয়ে দাও।”

আমাদের বাসাবাড়িতে গরিব লোকজন ও মহিলারা নানারকম কাজকর্ম করে। ছোট ছোট ছেলেমেয়েরা কাজকর্ম করে থাকে। আমরা তাদের সাথে ভালো ব্যবহার করব। কাজের লোকজন বয়সে বড় হলে তাদের সম্মান করব। বয়সে ছোট হলে আদর-স্নেহ করব। নিজেরা যা খাব তাদেরও তাই খেতে দেব। মাত্রাতিরিক্ত কাজ দেব না। তাদের কাজে সাহায্য করব। তাদের কফ্ট দেব না। দুঃখ দেব না। তারা আমাদের মতো মানুষ। তারা আমাদের ভাই। আমাদের মতো তাদেরও মর্যাদা আছে। আমরা তাদের মর্যাদা দেব। তাদের শ্রমের মর্যাদা দেব।

**পরিকল্পিত কাজ :** শিক্ষার্থীরা মহানবি (স)-এর শ্রমের মর্যাদা সম্বন্ধে ৫টি বাক্য লিখবে।

### মহানবি (স)-এর দয়া

মহানবি (স) ছিলেন দয়ার উজ্জ্বল আদর্শ। তিনি মানুষ, পশুপাখি ও গাছপালা সকলের প্রতি দয়া প্রদর্শন করতেন। কেউ ক্ষুধার্ত হলে তাকে খাদ্য দিতেন। অসুস্থ হলে তার খোঁজখবর নিতেন। সেবায়ত্ন করতেন। গরিব, ভিক্ষুক, ইয়াতীম ও অসহায়দের প্রতি দয়া দেখাতেন।

একদা মহানবি (স) সাহাবীদের নিয়ে বসে আছেন। এমন সময় এক ইয়াতীম বালক মহানবির (স) কাছে আসলো। গায়ে তার জামাকাপড় নাই। দুঃখকফ্ট সহিতে সহিতে তার বুকের হাড়গুলো বের হয়ে গেছে। বালকটি কাঁদতে কাঁদতে মহানবিকে (স) বলল, আমার আব্বু নাই। আব্বু জাহল আমাদের সম্পদ কেড়ে নিয়েছে। তার কাছে সম্পদের কিছু চাইলে সে আমাকে মারধর করে, অত্যাচার করে, তাড়িয়ে দেয়। বালকটির কথা শুনে মহানবির (স) মনে দয়া হলো। তাঁর চোখে পানি এলো। তিনি বালকটিকে নিয়ে আব্বু জাহলের কাছে গেলেন। বালকটির সব পাওনা আব্বু জাহলের কাছ থেকে আদায় করে দিলেন। ইয়াতীম বালকটি খুব খুশি হলো।

তিনি শুধু মানুষের প্রতি দয়া দেখান নি, বরং আল্লাহর সকল সৃষ্টির প্রতি দয়া দেখিয়েছেন। যারা আল্লাহর সৃষ্টির প্রতি দয়া দেখায় আল্লাহ তাদের ভালোবাসেন। তাদের প্রতি খুশি হন।

**মহানবি (স) বলেছেন,** “পৃথিবীতে যারা আছে তাদের প্রতি দয়া দেখাও, তাহলে আল্লাহ তোমাদের প্রতি দয়া দেখাবেন।”

আমরা দয়া দেখাব—

ইয়াতীম , অসহায়দের প্রতি,  
পশুপাখি ও গাছপালার প্রতি,  
সকল মানুষের প্রতি,  
আল্লাহর সকল সৃষ্টির প্রতি।

### মহানবি (স)-এর ক্ষমা

মহানবি (স) ছিলেন ক্ষমার মূর্তপ্রতীক। তিনি শত্রু-মিত্র সবাইকে ক্ষমা করতেন। তিনি তাঁর চরম শত্রুকে হাতের মুঠোয় পেয়েও প্রতিশোধ নেন নি। তাকে ক্ষমা করে দিয়েছেন।

**একটি ঘটনা:** মহানবি (স) গাতফানের যুদ্ধ শেষ করে বাড়িতে ফিরছেন। এক কাফির তাঁর কাছে আসলো। সে একটি খোলা তলোয়ার মহানবি (স)-কে দেখিয়ে বলল, “হে মুহাম্মদ, তোমাকে এই তলোয়ারের আঘাত থেকে কে রক্ষা করবে?” মহানবি (স) নির্ভয়ে উত্তর দিলেন, “আল্লাহ”। কাফির উত্তর শুনে খুবই ভয় পেল। তার হাত থেকে তলোয়ারটি পড়ে গেল। তখন মহানবি (স) ঐ তলোয়ারটি হাতে তুলে নিয়ে তাকে প্রশ্ন করলেন, “ওহে, এখন তোমাকে কে রক্ষা করবে?” কাফির খুব ভয় পেল। মহানবি (স)-এর নিকট ক্ষমা চাইলে তিনি তাকে ক্ষমা করে দিলেন।

মক্কা বিজয়ের পর মহানবি (স) সকল মক্কাবাসীকে ক্ষমা করে দিয়েছিলেন। তাঁর ক্ষমার আদর্শে মুগ্ধ হয়ে তারা ইসলাম গ্রহণ করেছিল।

**পরিকল্পিত কাজ :** শিক্ষার্থীরা মহানবি (স)-এর ক্ষমা সম্বন্ধে ৫টি বাক্য লিখবে।

### মহানবি (স)-এর মাতৃভক্তি

আব্বা-আম্মা আমাদের সবচেয়ে আপনজন। বিশেষ করে আম্মা আমাদের জন্য অনেক কষ্ট করেন। তিনি স্নেহ-মমতা ও দরদ দিয়ে আমাদের লালনপালন করেন। আমাদের কল্যাণ কামনা করেন। এহেন হিতাকাঙ্ক্ষী মায়ের ভক্তি করা একান্ত কর্তব্য।

মহানবির (স) বয়স যখন ৬ বছর তখন তাঁর আম্মা আমিনা ইন্তিকাল করেন। তাই তিনি তাঁর আম্মাকে সেবায়ত্ন করার সুযোগ পান নি। কিন্তু তাঁর দুধমা হযরত হালিমা (রা) কে তিনি চরম ভক্তিগ্ৰন্থা করতেন। সম্মান দিতেন।

**একদিনের ঘটনা:** আমাদের মহানবি (স) সাহাবীগণের সাথে বসে আছেন। সেখানে এক বৃদ্ধা আসলেন। মহানবি (স) তাঁকে দেখে আসন ছেড়ে উঠে দাঁড়ালেন। বৃদ্ধাকে সম্মান

করলেন। মর্যাদা দিলেন। নিজের গায়ের চাদর বিছিয়ে দিলেন। খুব যত্নের সাথে বসালেন। সাহাবিগণ অবাক হলেন। তাঁরা মহানবিকে (স) জিজ্ঞাসা করলেন, “ইনি কে?” তিনি উত্তরে বললেন, “ইনি আমার দুধমা হালিমা।”

**পরিকল্পিত কাজ:** শিক্ষার্থীরা মহানবি (স)-এর মাতৃভক্তি ঘটনাটি খাতায় লিখবে।

### হযরত মুসা (আ)

হযরত মুসা (আ) ছিলেন একজন বিখ্যাত নবি। তাঁর পিতার নাম ইমরান। মাতার নাম ইউখাবেজ। তিনি আনুমানিক খ্রিস্টপূর্ব ১০৪০ অব্দে মিশরে বনি ইসরাইল বংশে জন্মগ্রহণ করেন। প্রাচীনকালে মিশরের বাদশাহকে ফিরআউন বলা হতো। তাদের মধ্যে এক ফিরআউনের নাম ছিল ওলীদ। ওলীদ ছিল খুব লোভী। তার আকাঙ্ক্ষা ছিল নিজেকে উপাস্য হিসাবে প্রতিষ্ঠিত করা। সে তার মন্ত্রী ও বন্ধু হামানের পরামর্শে রাজ্যের ধর্মীয় শিক্ষাপ্রতিষ্ঠানগুলো বন্ধ করে দিল। জনগণ ধর্ম ও জ্ঞানচর্চা ভুলে মুর্খে পরিণত হলো। সুযোগ বুঝে সে নিজেকে উপাস্য বলে ঘোষণা করল। কিবতী বংশ তার অনুগত ছিল, তারা তাকে পূজা করতে শুরু করল। কিন্তু বনি ইসরাইল বংশ তখনও হযরত ইউসূফ (আ) এর একত্ববাদের ধর্ম মেনে চলত। তারা ফিরআউনকে খোদা বলতে সম্মত হলো না। ফিরআউন ও কিবতী বংশ বনি ইসরাইলদের উপর কঠিন নির্যাতন চালাতে লাগল। এরই মধ্যে ওলীদ স্বপ্নে দেখল যে, বায়তুল মুকাদ্দাস থেকে এক ঝলক আগুন বের হয়ে এসে তার রাজপ্রাসাদসহ গ্রাস করছে। তার অনুসারী কিবতী বংশকেও জ্বালিয়ে দিচ্ছে। কিন্তু বনি ইসরাইলগণ সম্পূর্ণ নিরাপদ। আগুন তাদের স্পর্শ করছে না। ফিরআউন রাজ্যের গণকদের ডেকে এর ব্যাখ্যা জানতে চাইল। বালআম বাউর নামে এক গণক বলল, “ইসরাইল বংশে একটি পুত্র শিশু জন্মগ্রহণ করবে। সে আপনার ও আপনার রাজত্বের ধ্বংসের কারণ হবে এবং কিবতী বংশ ধ্বংস হবে।” স্বপ্নের ব্যাখ্যা শুনে ফিরআউন তার সিংহাসন থেকে লাফিয়ে উঠল। সে রাজ্যময় সৈন্যদের পাহারা নিযুক্ত করল এবং জন্মগ্রহণকারী সকল ইসরাইলি শিশুপুত্রকে হত্যার নির্দেশ দিল। সৈন্যরা গর্ভবতী মহিলাদের তালিকা তৈরি করল। আর জন্মগ্রহণকারী পুত্রসন্তানকে হত্যা করতে লাগল। এভাবে অসংখ্য ইসরাইলি শিশুপুত্র ফিরআউনের লোকদের হাতে নিহত হলো।

### জন্ম

হযরত মুসা (আ)-এর মাতা গর্ভধারণ করেছিলেন। আল্লাহর কুদরতে ফিরআউনের লোকেরা তা বুঝতেই পারে নি। তাঁর জন্ম হলো। মা ফিরআউনের ভয়ে শিশু মুসাকে একটি

সিন্ধুকুে ভরে আল্লাহর নির্দেশে নদীতে ভাসিয়ে দিলেন। আল্লাহর কুদরতে সিন্ধুকটি ভাসতে ভাসতে নদীর তীরবর্তী ফিরআউনের রাজপ্রাসাদের ঘাটে গিয়ে ভিড়লো। ফুটফুটে মায়াভরা চেহরার শিশুটিকে দেখে ফিরআউনের স্ত্রী হযরত আছিয়া কোলে তুলে নিলেন। আছিয়া ছিলেন ইসরাইলি কন্যা। তিনি এক আল্লাহতে বিশ্বাস করতেন। ফিরআউন তাঁকে জোর করে বিয়ে করেছিল। শিশু মূসা (আ) অন্য কারও দুধ পান না করায় হযরত মূসা (আ)-এর বড়বোন মরিয়মের পরামর্শে মূসা (আ)-এর মাকেই ধাত্রী নিয়োগ করা হলো। আল্লাহ তায়ালার অসীম কুদরতে মূসা (আ) ফিরআউনের ঘরে, তারই অর্থব্যয়ে মায়ের কোলে লালিত পালিত হতে লাগলেন।

### মাদইয়ান বা মাদয়ান গমন

একবার মূসা (আ) দেখতে পেলেন কিবতী বংশীয় ফিরআউনের এক বাবুর্চি এক ইসরাইলী কাঠুরিয়ার প্রতি অত্যাচার করছে। তিনি ইসরাইলিকে বাঁচাবার জন্য কিবতীকে একটি ঘুষি মারলেন। এতে সে মারা যায়। পরের দিনও অনুরূপ ঘটনা ঘটল। আর এক কিবতী আগের দিনের ইসরাইলির উপর অত্যাচার করছিল। মূসা (আ) এগিয়ে গেলে ইসরাইলী ভয় পেয়ে পূর্বদিনের ঘটনা বলে দেয়। কিবতী এসে ফিরআউনকে খবর দিল যে, কিবতীর হত্যাকারী মূসা (আ)। ফিরআউন মূসা (আ)-এর দৃষ্ট ঘোষণা করল। এ ঘটনা জানতে পেয়ে মূসা (আ) মিশর ছেড়ে লোহিত সাগরের পূর্বতীরে মাদয়ান চলে যান। সেখানে তিনি বিখ্যাত নবি হযরত শূআইব (আ)-এর সাক্ষাৎ লাভ করেন। হযরত শূআইব (আ) মূসা (আ)-এর খেদমত, কর্মদক্ষতা ও চারিত্রিক গুণে মুগ্ধ হয়ে তাঁর জ্যেষ্ঠ কন্যা সফুরাকে তাঁর সাথে বিয়ে দেন। সেখানে তিনি দশ বছর কাটান। এ সময় তিনি বকরিও চরিয়েছেন।

### নবুয়ত লাভ

হযরত মূসা (আ) স্ত্রী সফুরা এবং খাদেম ও মেষ-বকরি পাল নিয়ে মায়ের সাথে দেখা করার জন্য মাদইয়ান থেকে মিশর যাত্রা করলেন। পথে আগুনের খুব প্রয়োজন ছিল। দূর থেকে আলো দেখে তিনি আগুনের খোঁজে তুর পাহাড়ের কাছে গেলেন। তিনি পাহাড়ের পাদদেশে ‘তুয়া’ নামক পবিত্র উপত্যকায় নবুয়ত লাভ করেন।

আল্লাহ তায়ালা তাঁকে বললেন, “আমি তোমাকে মনোনীত করেছি। অতএব যা আদেশ করা হয় তা শুনতে থাক।”- সূরা ত্বাহা: ১৩

এ সময় আল্লাহ তায়ালা হযরত মূসা (আ)-এর সাথে সরাসরি কথা বলেছিলেন। এজন্য তিনি ‘কালিমুল্লাহ’ উপাধিতে ভূষিত হন।

আল্লাহ তায়ালা হযরত মূসাকে (আ) ফিরআউনের নিকট গিয়ে দীনের দাওয়াত দেওয়ার নির্দেশ দিলেন। হযরত মূসা (আ) আল্লাহর কাছে তাঁর দুর্বলতা ও অসুবিধার কথা জানিয়ে দোয়া করলেন। তিনি যেন তাঁকে সাহস দেন। আল্লাহ তায়ালা তাঁর কাজ সহজ করে দেন এবং তার মুখের জড়তা দূর করে দেন। যাতে লোকেরা তাঁর কথা বুঝতে পারে। তিনি তাঁর ভাই হারুন(আ) কেও সহযোগী হিসাবে চাইলেন, আল্লাহ তায়ালা তাঁর প্রার্থনা কবুল করলেন।

হযরত মূসা(আ) তাঁর ভাই হারুন(আ) কে নিয়ে ফিরআউনের কাছে গিয়ে দীনের দাওয়াত দিলেন। তিনি আল্লাহর দেওয়া অলৌকিক ঘটনাও দেখালেন। কিন্তু ফিরআউন কিছুতেই ইমান আনল না। বরং সে হযরত মূসা (আ) কে হত্যা করার সংকল্প করল।

### দলবলসহ ফিরআউনের ধ্বংস

হযরত মূসা (আ) ফিরআউনের কুমতলব জানতে পেরে ইসরাইলিদের নিয়ে মিশর ছেড়ে চলে যাচ্ছিলেন। সংবাদ পেয়ে ফিরআউন তার সেনাবাহিনী নিয়ে তাদের পিছু ধাওয়া করল। মূসা (আ) তাঁর অনুসারীদের নিয়ে নীলনদের তীরে উপস্থিত হলেন। সামনে নীলনদ ও পেছনে ফিরআউন বাহিনী।

এমতাবস্থায় আল্লাহ তায়ালা আদেশে হযরত মূসা (আ) হাতের লাঠি দ্বারা নদীতে আঘাত করলেন। পানি দুই ধারে সরে গেল। বনি ইসরাইলের ১২টি দলের জন্য ১২টি রাস্তা হয়ে গেল। হযরত মূসা (আ) তাঁর লোকজনসহ নিরাপদে নদী পার হয়ে গেলেন। ফিরআউন নদীতে শুকনা রাস্তা দেখে সে রাস্তা ধরেই পার হতে লাগল। যেই না তারা নদীর মাঝখানে পৌঁছল, অমনি রাস্তা নদীর পানিতে মিলিয়ে গেল। ফিরআউন তার দলবলসহ ডুবে মরল। আল্লাহর নবিকে ধ্বংস করতে গিয়ে নিজেই সদলবলে ধ্বংস হলো।

### হযরত মূসা (আ)-এর তাওরাত লাভ

হযরত মূসা (আ) আল্লাহর নির্দেশে তাওরাত কিতাব আনার জন্য তুর পাহাড়ে গেলেন। সেখানে তিনি ইবাদতে নিমগ্ন ছিলেন। তাঁর অনুপস্থিতিতে সামেরী নামক এক ব্যক্তির ধোঁকায় পড়ে অনুসারীদের অনেকেই গো-বৎস পূজায় জড়িয়ে পড়ল। হযরত মূসা (আ) তাওরাত নিয়ে ফিরে এসে এ অবস্থা দেখে ভীষণ ক্ষুব্ধ ও মর্মাহত হলেন। তওবা হিসাবে গো-বৎস পূজারীদের হত্যার নির্দেশ হলো। এতে সত্তর হাজার বনি ইসরাইল নিহত হলো। হযরত মূসা (আ) ও হযরত হারুন (আ)-এর কান্নাকাটিতে অবশিষ্টদের ক্ষমা করা হলো। হযরত মূসা (আ) ১২০ বছর জীবিত ছিলেন।

## হযরত হূদ (আ)

হযরত হূদ (আ) একজন নবি ছিলেন। আল্লাহ তায়ালা তাঁকে ‘আদ’ জাতির হিদায়েতের জন্য পাঠিয়ে ছিলেন। ‘আদ’ সম্প্রদায় এবং হূদ (আ)-এর বংশতালিকা চতুর্থ পুরুষে ‘সাম’ পর্যন্ত পৌঁছে মিলে যায়। তাই হূদ (আ) তাদের বংশগত ভাই। আন্মান থেকে শুরু করে হাযরামাওত ও ইয়েমেন পর্যন্ত ‘আদজাতির’ বসতি ছিল। তারা যেমন ছিল শক্তিশালী তেমনি বিরাটাকায় সুঠামদেহের অধিকারী ছিল। তারা অহংকারী ও অত্যাচারী ছিল।

আদজাতি এক আল্লাহকে ভুলে গিয়ে মূর্তিপূজা ও নানারকম শিরকে লিপ্ত ছিল। হযরত হূদ (আ) তাদের শিরক ও মূর্তিপূজা ত্যাগ করে এক আল্লাহর ইবাদত করতে বলেন। জুলুম-অত্যাচার ত্যাগ করে ন্যায়নীতি ও সুবিচার করতে বলেন। তারা অহংকার করে আল্লাহ ও রাসুলের আদেশ অমান্য করল। হযরত হূদ (আ) তাদের আজাবের ভয় দেখান, কিন্তু তারা ভয় পেল না। আল্লাহর ইচ্ছায় প্রথমে অনাবৃষ্টি ও দুর্ভিক্ষ এলো। এতেও তারা শোধরাল না। পরে তাদের উপর লাগাতার ৭ রাত ও ৮ দিন ভীষণ ঘূর্ণিঝড় চলল। এতে তাদের ঘরবাড়ি, দালানকোঠা, গাছপালা ও লোকজন ধূলিসাৎ হয়ে গেল। গোটা এলাকা মরুভূমিতে পরিণত হলো। অহংকার তাদের পতনের কারণ হলো। আজাবের সময় হযরত হূদ (আ) তাঁর অনুসারীদের নিয়ে একটি কুঁড়েঘরে আশ্রয় নিয়েছিলেন। তাঁদের কিছুই হলো না। আল্লাহ তাঁদের নিরাপদে রাখলেন। পরে তাঁরা মক্কায় চলে যান।

## হযরত সালিহ (আ)

হাজার হাজার বছর আগে এ পৃথিবীতে ‘সামুদ’ নামে একটি জাতি বাস করত। এরা ছিল নূহ (আ)-এর পুত্র ‘সাম’-এর বংশধর। এ জাতি আরবের উত্তর-পশ্চিম এলাকায় বাস করত। এদের প্রধান শহর ছিল ‘হিজর’। বর্তমানে এটি মাদায়েনে সালিহ নামে পরিচিত।

আমরা আগেই জেনেছি এদের পূর্বে এখানে শক্তিশালী ‘আদজাতি’ বসবাস করত। তাদের হিদায়াতের জন্য তাদের কাছে হযরত হুদকে (আ) পাঠানো হয়েছিল। আল্লাহর অবাধ্যতার জন্য তাদের ধ্বংস করে দেওয়া হয়েছিল।

সামুদজাতি ‘আদজাতির’ রেখে যাওয়া ধন-সম্পদ হস্তগত করল। তারাও অর্থে-বিত্তে, শক্তিতে, বুদ্ধিতে সমৃদ্ধির অধিকারী হলো। এই জাতিও সম্পদ ও শক্তির অহংকারে আল্লাহকে ভুলে গেল।

আল্লাহ তায়ালা তাদের হিদায়াতের জন্য তাদেরই বংশের লোক হযরত সালিহ (আ)-কে তাদের কাছে পাঠালেন। তিনি ‘সামুদ’ জাতিকে এক আল্লাহর উপর ইমান আনতে বললেন, তাঁর ইবাদত করতে বললেন। তারা আল্লাহর নবির কথা মানল না। তিনি তাদের আল্লাহর আজাবের সংবাদ দিলেন। তাতেও তারা ভয় পেল না। সালিহ (আ) তাঁর সঙ্গীদের নিয়ে ‘হিজর’ ত্যাগ করলেন। সামুদ জাতির উপর আল্লাহর আজাব এল। ভীষণ শব্দ ও ভূমিকম্পে তারা ধ্বংস হয়ে গেল।

## হযরত ইসহাক (আ)

হযরত ইসহাক (আ) ছিলেন প্রসিদ্ধ নবি হযরত ইবরাহীম (আ) এর দ্বিতীয় পুত্র। তিনি হযরত ইসমাঈল (আ)-এর ছোট ভাই। তাঁর মায়ের নাম হযরত সারা (আ)। বিখ্যাত নবি ইয়াকুব (আ) ছিলেন তাঁর পুত্র। তাঁর বংশে অনেক নবি-রাসুল জন্মগ্রহণ করেছেন।

আল্লাহ তায়ালা হযরত লূত (আ)-এর নাফরমান সম্প্রদায়কে ধ্বংস করার জন্য ফেরেশতাদের পাঠিয়ে ছিলেন। তাঁরা পথে ইবরাহীম (আ)-এর মেহমান হলেন। ইবরাহীম (আ) যথারীতি আপ্যায়নের ব্যবস্থা করলেন। কিন্তু মেহমানদের আহারের ব্যাপারে অনাগ্রহ দেখে বিস্মিত হলেন। মেহমানরা বললেন, “আমরা আল্লাহর ফেরেশতা। আমরা লূত (আ)-এর পাপী সম্প্রদায়কে ধ্বংসের জন্য সামুদ যাচ্ছি।” তাঁরা এ সময় ইবরাহীম (আ) ও

তঁার স্ত্রী সারা (আ) কে তঁাদের পুত্র ইসহাক (আ) এর জন্ম এবং নবি হওয়ার সুসংবাদ দিয়েছিলেন।

ইসহাক (আ) তঁার পিতা ইবরাহীম (আ) ও ভাই ইসমাঈল (আ) –এর দীন প্রচার করতেন। তিনি বেশিরভাগ সময় ছিলেন শামের ফিলিস্তিনে।

তিনি ৪০ বছর বয়সে বিয়ে করেন। ৬০ বছর বয়সে তঁার জময দুই সন্তান ঈসু ও ইয়াকুব (আ) জন্মগ্রহণ করে। তিনি ১৮৬ বছর বয়সে ইন্তিকাল করেন।

## হযরত লূত (আ)

হযরত লূত (আ) একজন নবি ছিলেন। তিনি ছিলেন হযরত ইবরাহীম (আ)–এর ভাই হারানের পুত্র। ছোটবেলাতেই লূত (আ)–এর পিতা হারান মারা যান। তাই ইবরাহীম (আ) ভাইয়ের ইয়াতীম ছেলেকে নিজের পুত্রের মতোই লালনপালন করতেন এবং নিজের সঙ্গে রাখতেন। বৃদ্ধ বয়স পর্যন্ত ইবরাহীম (আ)–এর সন্তান ছিল না। তিনি লূত (আ)কে নিজের ওয়ারিস মনে করতেন। ইবরাহীম (আ)–এর উপর প্রথম ইমান এনেছিলেন হযরত সারা (আ) ও হযরত লূত (আ)। তিনি ইবরাহীম (আ)–এর সাথে হিজরতও করেছিলেন।

হযরত ইবরাহীম (আ) যখন কিনআনে ছিলেন তখন তিনি লূত (আ)–কে সত্য দীন প্রচারের জন্য পূর্ব জর্দানের ‘সাদুম’ ও আমুরায় পাঠিয়েছিলেন। আরব, ফিলিস্তিন ও শামের মানচিত্রে দৃষ্টিপাত করলে বর্তমান পূর্ব জর্দান ও ফিলিস্তিনের মধ্যে একটি বিখ্যাত ও বিশাল জলাশয় দেখা যায়। তাকে বলা হয় মৃতসাগর। তাকে লূত সাগরও বলা হয়।



মৃতসাগর

সাদুম ছিল অত্যন্ত উর্বর ও সবুজ-সজীব এলাকা। সেখানেই তিনি বসতি নির্মাণ করেন। সেখানকার লোকেরা অতি বিলাসী জীবনযাপন করত। তারা পাপ, লজ্জাহীনতা ও নাফরমানির কাজগুলো গর্বের সাথে প্রকাশ্যে করে বেড়াত।

লূত (আ) তাদের হিদায়াতের জন্য প্রাণপণ চেষ্টা করলেন কিন্তু কোনো ফল হলো না। তারা লূত (আ) ও তাঁর অনুসারীদের এলাকা থেকে তাড়িয়ে দেওয়ার হুমকি দিল। লূত (আ) তাদের বোঝালেন এবং আল্লাহর আজাবের কথা শোনালেন। কিন্তু তারা ঠাট্টা-বিদ্রূপ করতে

লাগল। লূত (আ) আল্লাহর আদেশে অনুসারীদের নিয়ে স্থান ত্যাগ করলেন। কিন্তু তাঁর কাফির স্ত্রী রয়ে গেল। আল্লাহ তায়ালা আজাবস্বরূপ বিকট শব্দ ও পাথরবৃষ্টি বর্ষণ করলেন এবং এলাকাটিকে উল্টিয়ে দিলেন। এতে মৃতসাগর সৃষ্টি হয়। সাদুমবাসীর আজাবের নিদর্শন এখনও বিদ্যমান।

## হযরত শূয়াইব (আ)

হযরত শূয়াইব (আ) একজন বিখ্যাত নবি। তিনি ছিলেন হযরত ইবরাহীম (আ)-এর তৃতীয় স্ত্রী কাতুরার পুত্র মাদয়ানের বংশধর। হযরত লূত (আ)-এর সাথেও তাঁর আত্মীয়তার সম্পর্ক ছিল। যে স্থানে তাঁরা বাস করতেন তাও মাদয়ান নামে অভিহিত। অতএব, মাদয়ান একটি জাতির ও একটি শহরের নাম। এটি ফিলিস্তিনের দক্ষিণ-পশ্চিম ও মায়নার পূর্বে মহাসড়কে অবস্থিত ছিল, যেখান থেকে শাম, আরব ও মিশরে বাণিজ্য কাফেলা যাতায়াত করত। এলাকাটি অত্যন্ত উর্বর ও সমৃদ্ধশালী ছিল। বাসিন্দারা অত্যন্ত ধনী ছিল। মাদয়ান শহরটি আজও পূর্ব-জর্দানের সামুদ্রিক বন্দর ‘মায়ানের’ অদূরে বিদ্যমান আছে।

হযরত মূসা (আ) মিশর থেকে মাদয়ানে এসেছিলেন এবং হযরত শূয়াইব (আ)-এর কাছে আশ্রয় নিয়েছিলেন। মূসা (আ) শূয়াইব (আ)-এর কন্যা সফুরাকে বিয়ে করেছিলেন। তিনি শূয়াইব (আ)-এর আশ্রয়ে ১০ বছর ছিলেন। শূয়াইব (আ)কে তাঁর চমৎকার বক্তৃতার জন্য খতিবুল আম্বিয়া বলা হয়।

হযরত শূয়াইব (আ)-কে যে সম্প্রদায়ের কাছে পাঠানো হয়েছিল তাদেরকে আহলে মাদয়ান, আসহাবে মাদয়ান ও আসহাবে আইকা বলা হয়। এরা মূর্তিপূজা করত। নিজেরা নবির কথা মানত না। যারা মানত তাদের বাধা দিত ও নির্যাতন করত। পথিকদের ধনসম্পদ লুটে নিত। মাপে-ওজনে কম দিত।

মাদয়ানবাসীদের বিকট শব্দ, অগ্নিবৃষ্টি ও ভূমিকম্প দ্বারা ধ্বংস করে দেওয়া হয়।

এরপর শূয়াইব (আ) হায়রামাওত যান এবং সেখানেই ইন্তিকাল করেন।

## হযরত ইলিয়াস (আ)

হযরত ইলিয়াস (আ) ছিলেন মূসা (আ)-এর ভাই হারুন (আ)-এর বংশধর। তিনি জর্দানের ‘আলআদ’ নামক স্থানে জন্মগ্রহণ করেন। তখনকার ইসরাইলের শাসনকর্তা ছিলেন আখিব অথবা আখিয়াব। তিনি হযরত হিয়কীল (আ)-এর পরে এবং আল ইয়াসা (আ)-এর পূর্বে বনি ইসরাইলের হিদায়াতের জন্য প্রেরিত হয়েছিলেন। তিনি হযরত হিয়কীল (আ)-এর স্থলাভিষিক্ত হন। তিনি শামের বাসিন্দাদের হিদায়াতের জন্য প্রেরিত হয়েছিলেন। তাঁর প্রচারের কেন্দ্র ছিল শামের শহর ‘বালাবাকু’।

ঐ সময় ইসরাইলিরা আল্লাহকে ভুলে যায়। তারা এক আল্লাহর ইবাদত না করে নানারকম শিরকে লিপ্ত হয়। তারা মূর্তি ও তারকাপূজা করত। তাদের প্রধান মূর্তি ছিল বা‘ল দেবতা। নবির কথায় বাদশাহ ইমান এনেছিল। কিন্তু তার স্বীর প্ররোচনায় আবার শিরকে লিপ্ত হয়।

আল্লাহর আজাবে বৃষ্টি বন্ধ হয়ে গেল। ৩ বছর ধরে ভীষণ দুর্ভিক্ষ চলছিল। ঐ সম্প্রদায়ের লোকেরা নবির কাছে এসে আবেদন-নিবেদন করায় তিনি আল্লাহর কাছে দোয়া করলেন। কিন্তু বিপদ কেটে যাওয়ার পর আবার প্রতিজ্ঞা ভঙ্গ করে মুশরিক হয়ে যায়। তাদের উপর আজাবের জন্য তারা নবিকেই দোষারোপ করে। তারা তাঁর প্রতি ঘোরতর শত্রুতা শুরু করে। তিনি তাঁর অনুসারীদের নিয়ে স্থান ত্যাগ করেন। তাদের উপর আবার আল্লাহর আজাব আসে।

## হযরত যুলকিফল (আ)

হযরত যুলকিফল (আ) ছিলেন আল্লাহ তায়ালায় একজন প্রিয় বান্দা। যুলকিফল অর্থ প্রতিজ্ঞা রক্ষাকারী। দায়িত্ব পালনকারী। তিনি হযরত আইয়ুব (আ)-এর পুত্র ছিলেন বলে উল্লেখ আছে। নবি হযরত ইয়াসা (আ) খুব বৃন্দ হয়েছিলেন। তিনি তাঁর একজন প্রতিনিধি নিযুক্ত করতে চাইলেন, যিনি তাঁর পক্ষ থেকে নবির কর্তব্য পালন করতে পারেন। নবি তার অনুসারীদের একত্রিত করে বললেন, যার মধ্যে তিনটি শর্ত বিদ্যমান থাকবে তাঁকেই আমি প্রতিনিধি নিযুক্ত করব। শর্ত তিনটি হলো:

১. সর্বদা দিনে রোযা রাখা,
২. সারা রাত ইবাদত করা,
৩. কোনো সময় রাগ না করা।

এক ব্যক্তি উঠে বললেন, এ তিনটি গুণ আমার মধ্যে আছে। নবি প্রথম দিনের সমাবেশ শেষ করলেন। পরবর্তী দিনে আবার সমাবেশ হলো। নবি পূর্ববর্তী শর্ত আবার উল্লেখ করলেন। এবারও ঐ ব্যক্তি উঠে আগের মতো বললেন। নবি তাকে প্রতিনিধি নিযুক্ত করলেন। হযরত যুলকিফল সারাজীবন শর্ত পূরণ করে চললেন।

ইবলিস শয়তান তাঁকে পথভ্রষ্ট করার জন্য এক ময়লুম বৃন্দের বেশে পর পর তিন দিন তাঁর ধৈর্যচ্যুতির চেষ্টা করল। তাঁকে রাগাতে চাইল। কিন্তু পারল না। তিনি পরীক্ষায় উত্তীর্ণ হলেন। আল্লাহ তায়ালা তাঁকে পরবর্তীতে নবি করেছিলেন।

## হযরত যাকারিয়া (আ)

হযরত যাকারিয়া (আ) ছিলেন বনি ইসরাইলের একজন নবি। তিনি ছিলেন হযরত সুলাইমান (আ)-এর বংশধর। তাঁর স্ত্রী ছিলেন হযরত হারুন (আ)-এর বংশধর।

হযরত ঈসা (আ)-এর মাতা মরিয়মের অভিভাবক ছিলেন হযরত যাকারিয়া (আ)। তিনি ইবাদতখানার ইমাম ও মোতোয়াল্লী ছিলেন। তাঁর বংশে হযরত ইমরান ও তাঁর স্ত্রী হান্না ছিলেন আল্লাহভক্ত। হান্না ছিলেন মরিয়মের মাতা।

হযরত যাকারিয়ার কোনো সন্তান ছিল না। বৃদ্ধ অবস্থায় সন্তানের আশাও ছিল না। মরিয়মের কাছে অমৌসুমি ফল দেখে তাঁর মনে আশার সঞ্চার হয়। তিনি আল্লাহর কাছে সন্তান কামনা করেন। আল্লাহ তায়ালা তাঁকে পুত্রসন্তানের সুসংবাদ দিলেন যার নাম হবে ইয়াহিয়া।

তাঁর সম্প্রদায় তাঁর আহ্বানে সাড়া দিল না। ইমান আনল না। তারা নবির সাথে শত্রুতা শুরু করল। তাঁকে হত্যা করার ষড়যন্ত্র করতে লাগল। তিনি একটি গাছের কোটরে আশ্রয় নিলেন। ইহুদিরা তাকে গাছসহ দ্বিখণ্ডিত করল। তিনি উহ্ শব্দটিও করলেন না। সবুর করলেন। আমরা তাঁর জীবন থেকে ধৈর্যের শিক্ষা গ্রহণ করব।

**পরিকল্পিত কাজ :** শিক্ষার্থীরা দশজন নবি-রাসুলের নাম খাতায় লিখবে।

## অনুশীলনী

### নৈর্ব্যক্তিক প্রশ্ন

#### ক. বহুনির্বাচনি প্রশ্ন:

সঠিক উত্তরের পাশে টিক ( ✓ ) চিহ্ন দাও।

১) আমাদের সৃষ্টি করেছেন কে?

ক. মানুষ

খ. রাসুল

গ. আল্লাহ

ঘ. জিন

২) মহানবির (স) আন্মার নাম কী?

ক. মরিয়ম

খ. আমিনা

গ. আছিয়া

ঘ. ফাতিমা

৩) হারবুল ফিজর শব্দের অর্থ কী?

ক. অন্যায় সময়

খ. ন্যায় সময়

গ. শান্তি

ঘ. শৃঙ্খলা

৪) হিলফুল ফুজুল কত বছর স্থায়ী ছিল?

ক. ২০ বছর

খ. ৩০ বছর

গ. ৪০ বছর

ঘ. ৫০ বছর

৫) সূরা আলাকের কয়টি আয়াত সর্বপ্রথম অবতীর্ণ হয়েছিল?

ক. ৩টি

খ. ৪টি

গ. ৫টি

ঘ. ৬টি

৬) মহানবি (স) কতো বছর বয়সে নবুয়ত লাভ করেন?

ক. ৪০ বছর

খ. ৪৫ বছর

গ. ৫০ বছর

ঘ. ৫৩ বছর

৭) হযরত মুসা (আ)-এর পিতার নাম কী?

ক. ইউসুফ

খ. ইমরান

গ. ইদরীস

ঘ. ইউনুস

৮) হযরত মুসা (আ) কোন বংশে জন্মগ্রহণ করেন?

ক. বনি ইসরাইল

খ. কিবতী

গ. বনি বকর

ঘ. বনি হাসেম

৯) ফিরআউনের স্ত্রীর নাম কী?

ক. আশ্বিয়া

খ. হাজেরা

গ. আছিয়া

ঘ. আমিনা

১০) মিশর ছেড়ে হযরত মুসা (আ) কোথায় গিয়েছিলেন?

ক. ইরাকে

খ. ইরানে

গ. সিরিয়া

ঘ. মাদায়ানে

১১) হযরত হুদকে (আ) কোন জাতির কাছে পাঠানো হয়েছিল?

- |           |          |
|-----------|----------|
| ক. আদ     | খ. সামুদ |
| গ. কুরাইশ | ঘ. কিবতী |

১২) হযরত সালিহ (আ)-কে কোন জাতির কাছে পাঠানো হয়েছিল?

- |          |           |
|----------|-----------|
| ক. সামুদ | খ. সেলজুক |
| গ. সাউদ  | ঘ. আদ     |

১৩) হযরত ইসহাক (আ)-এর পিতার নাম কী?

- |                     |                       |
|---------------------|-----------------------|
| ক. হযরত নূহ (আ)     | খ. হযরত ইদরীস (আ)     |
| গ. হযরত ইররাহীম (আ) | ঘ. হযরত সুলায়মান (আ) |

১৪) হযরত ইলিয়াস (আ) কোন নবির স্থলাভিষিক্ত হন?

- |                     |                  |
|---------------------|------------------|
| ক. হযরত হারুন (আ)   | খ. হযরত মুসা (আ) |
| গ. হযরত হিয়কিল (আ) | ঘ. হযরত লূত (আ)  |

১৫) হযরত যুলকিফল কার পুত্র ছিলেন?

- |                    |                    |
|--------------------|--------------------|
| ক. হযরত ইউনুস (আ)  | খ. হযরত আইয়ুব (আ) |
| গ. হযরত ইসমাইল (আ) | ঘ. হযরত লূত (আ)    |

১৬) হযরত যাকারিয়া (আ)-এর পুত্রের নাম কী।

- |              |           |
|--------------|-----------|
| ক. হারুন     | খ. ইউসূফ  |
| গ. ইয়াহিয়া | ঘ. ইমরান। |

খ. শূন্যস্থান পূরণ কর :

১. কুরআন মজিদে ..... জন নবি-রাসুলের নাম উল্লেখ আছে?
২. মহানবি (স)-এর ..... নাম আবু তালিব।
৩. মহানবি (স)-এর ..... উপর অটল বিশ্বাস ছিল।
৪. হিলফুল ফুজুল শব্দের অর্থ ..... সংঘ।
৫. প্রথম তিন বছর ..... জন নর-নারী ইসলাম গ্রহণ করেন।

গ. বাম পাশের কথাগুলোর সাথে ডান পাশের কথাগুলো মিল কর :

বাম পাশ	ডান পাশ
ক. মহানবি (স) এর আন্না আমিনা ইত্তিকাল করেন মহানবি (স) এর	১৫ বছর বয়সে ৬৩ বছর বয়সে
খ. মহানবি (স) হিলফুল ফুজুল গঠন করেন	৬ বছর বয়সে
গ. মুহাম্মদ(স) নবুয়ত লাভ করেন	৪০ বছর বয়সে

**সংক্ষিপ্ত উত্তরের জন্য প্রশ্ন :**

১. মহানবি (স) কতো খ্রিস্টাব্দে কোথায় জন্মগ্রহণ করেন ?
২. মুহাম্মদ শব্দের অর্থ কী ?
৩. পৃথিবীর সর্বপ্রথম নবি (আ)-এর নাম লেখ।
৪. হিলফুল ফুজুল কী ?
৫. মহানবি (স) চাকরদের সম্পর্কে কী বলেছেন ?
৬. প্রাচীনকালে মিশরের বাদশাহকে কী বলা হতো ?
৭. মুসা (আ) কার ঘরে এবং অর্থব্যয়ে লালিত পালিত হয়েছিলেন ?
৮. তিনজন নবি (আ)-এর নাম লেখ।
৯. নারীদের মধ্যে এবং পুরুষদের মধ্যে কে কে সর্বপ্রথম ইসলাম গ্রহণ করেন ?

**বর্ণনামূলক উত্তরের জন্য প্রশ্ন :**

১. মহানবি (স)-এর আন্না ইত্তিকালের পর তাঁকে কে লালন-পালন করেন ?
২. মুহাম্মদ (স)-এর চরিত্রের ৫টি সুন্দর আদর্শ লেখ। সামাজিক জীবনে উক্ত আদর্শগুলোর গুরুত্ব কী ?

৩. শিশু মুহাম্মদ (স) কীভাবে অন্যের অধিকার সংরক্ষণ করেছেন? বর্ণনা কর।
৪. জুয়াখেলার খারাপ দিকগুলো বর্ণনা কর। জুয়াখেলা বন্ধের জন্য তুমি কীভাবে জনমত সৃষ্টি করবে মতামত দাও।
৫. মহানবি (স) নিজ হাতে কী কী কাজ করতেন? নিজ নিজ পরিবারে নিজ হাতে করতে পারা যায় এমন ৫টি কাজের তালিকা তৈরি কর।
৬. দয়া মহানবি (স)-এর একটি উজ্জ্বল আদর্শ— উদাহরণসহ ব্যাখ্যা কর।
৭. মাতৃভক্তির গুরুত্ব বর্ণনা কর।
৮. মহানবি (স) চাকর ও শ্রমিকদের সম্পর্কে কী বলেছেন তার বর্ণনা দাও।
৯. ফিরআউন কী? ওলীদ স্বপ্নে কী দেখে? বর্ণনা কর।
১০. ফিরআউন কীভাবে মারা যায় তার বর্ণনা দাও।
১১. আদ জাতি কোথায় বসবাস করত? তাদের ধ্বংসের কারণ লেখ।
১২. লূত বা মূত সাগর কোথায়? বর্ণনা কর।

## হামদে ইলাহী


কাজী নজরুল ইসলাম

শোন শোন ইয়া ইলাহী  
আমার মোনাজাত।  
তোমারি নাম জপে যেন  
হৃদয় দিবস রাত।

যেন কানে শুনি সদা  
তোমারি কলাম হে খোদা,  
চোখে যেন দেখি শুধু  
কুরআনের আয়াত।

দুখে যেন জপি আমি  
কলমা তোমার দিবস-যামী,  
(তোমার) মসজিদেরই ঝাড়ু বর্দার  
হোক আমার এ হাত।


সুখে তুমি দুখে তুমি,  
চোখে তুমি বুকে তুমি,  
এই পিয়াসী প্রাণের, খোদা  
তুমি আব হায়াত।



## নাতে রাসুল (স)

ফররুখ আহমদ

- ওগো- নূর নবী হযরত  
আমরা- তোমারি উম্মত ।  
তুমি দয়াল নবী,  
তুমি নূরের রবি,  
তুমি- বাসলে ভালো জগত জনে  
দেখিয়ে দিলে পথ ।  
আমরা- তোমার পথে চলি  
আমরা- তোমার কথা বলি  
তোমার আলোয় পাই যে খুঁজে  
ঈমান ইজ্জত ।  
সারা জাহানবাসী  
আমরা- তোমায় ভালোবাসি,  
তোমায় ভালোবেসে মনে  
পাই মোরা হিম্মত ।



**পরিকল্পিত কাজ :** শিক্ষার্থীরা হামদে ইলাহী ও নাতে রাসুল সুর করে শ্রেণিতে পরিবেশন করবে।

২০২৩ শিক্ষাবর্ষের জন্য, ৪র্থ-ইসলাম



তোমরা সৎকর্মে প্রতিযোগিতা কর

-আল কুরআন



জাতীয় শিক্ষাক্রম ও পাঠ্যপুস্তক বোর্ড, বাংলাদেশ

গণপ্রজাতন্ত্রী বাংলাদেশ সরকার কর্তৃক বিনামূল্যে বিতরণের জন্য